

PAVLI PRINCIPIS DE  
LA SCALA ET HVN, MARCHIONIS  
VERONAE &c. DOMINI CREVTZBURGI PRVS-  
SIAE, PRIMI TOMI MISCELLANEORVM, DE RERV  
causis & successibus atq; secretiori methodo ibidem  
expressa, effigies ac exemplar, nimirum, vaticiniorum  
& imaginum Ioachimi Abbatis Florentis Calabriae, &  
Anselmi Episcopi Marsichani, super statu summorum  
Pontificum Rhomanæ Ecclesiæ, contra falsam, ini-  
quam, vanam, confictam & seditiosam cuiusdam Pseu-  
domagi, quæ nuper nomine Theophrasti Paracelsi  
in lucem prodijt, pseudomagicam exposi-  
tionem, vera, certa, & indubitata  
explanatio.



COLONIAE AGRIPPINAE,  
Ex Officina Typographica Theodori Graminæi.  
ANNO M. D. LXX.



482 p 70 B

257

## EPIGRAMMA

## BERNARDI MOLLERI IN PONTIFICVM RHO-

MANORVM VATICINIA D. PAVLI SCALIGERI

Principis opera iam emendata, & ad primi autho-  
ris mentem in lucem traducta.

**P**rodiit effictio Paracelsi nomine codex:  
 Pontificum codex vaticinatur opus.  
 Pontificum pictura manet, glossæ recessit:  
 Nec pietas libro quæ fuit antè, datur.  
 Mentis sit authoris quantum mutatus ab ipsa,  
 Qui literas vidit lixa, videre potest.  
 Hæc sunt hæreseos, sunt docti crimina scurra,  
 Ad libitum filo ducere cuncta suo.  
 Ex cerebro promunt, quod vult infanda malorum  
 Ilias, & proprium fallere scurra cupit.  
 Dant terras cælo: mutant quadrata rotundis:  
 Et nocua miscent arte profana sacris.  
 Scaliger incedit recto qui limite rectus,  
 Ex postliminio triste reduxit opus.  
 Corrigit explosio Paracelsi nomine librum;  
 Rursus & authori tradidit ipse suum.  
 Magni Pontificum quia res cognoscere refert,  
 Hæc igitur doctis iure legenda reor.  
 Vade liber: vasto tradit te Scaliger orbi:  
 Liber & auspicio Cæsaris esto liber.  
 Mæcenate nihil fiat si Cæsare maius,  
 Quid tum Scaligero latius esse putem?  
 Et tum Scaligero melius quid Principe, donec  
 Austrias Austriaco viuet in orbe domus?  
 Tuq; pater patria Cæsar, tu maxime rerum,  
 Scaligeri tandem Principis esto memor.  
 Dum te Spēra tenet poteris prodesse: nec obster  
 Religio: vincit religione pares.  
 Suscipe Pontifices, & eorum suscipe formas:  
 Suscipe Scaligeri munera: sume librum.  
 Sume virum: miseri nihil asperare laboreis.  
 Principe nil misero tristius esse puto.  
 His tua (crede mihi) studijs, non propria quarit:  
 Ausoniam quarit restituisse fidem.

INVICTISSIMO

INVICTISSIMO GLO-  
RIOSISSIMOQUE SACRI RHOMANI  
IMPERII IMPERATORI, CAESARI, DIVO

MAXIMILIANO HVIVS NOMINIS SECVNDO, RE-

*gi totius Orientis, Patri Patriæ, Catholico, felici,*

*augusto. Paulus Princeps de la Scala &*

*Hun, &c. se supplex*

*commendat.*



Extus iam agitur annus, Cæsar Opt. Max. quòd ad Ecclesiæ Rhomanæ còmodum, & tuum emolumētum procurandum & promouendum, Prussia ablegatus sim. Quod vbi animaduertissent Catholicæ religionis aduersarij, omnes artes suas coniunxerunt, quibus impedirent propositum: omnemque idcirco lapidem mouerunt, vt falsa criminatione, & nefaria delatione, in odium & tuū, & Regis adducerer, atq; legatus, publica regis securitate munitus, inauditus, non citatus, indefensus, contra iura legationis, omniumq; populorum leges & consuetudines, proscriberer. Itaque vt hominum consccleratorum, tetram atque immanem, & omni supplicio vindicandam coniurationem, libidinē & tyrānidem, intellexi, mox publicis typis subieci meam apologiam, atque editam in lucem Regi transmisi, meq; à maximo, quod mihi ab impijs hominibus obiecebatur, crimine excusavi, illorumq; vefaniam ita cōfutaui, vt vniuersa Europa facilè meis partibus subscriberet: Cæterum preces meæ maximis & continuis cla-



## EPISTOLA

moribus effusæ, nullam mihi hætenus salutem impe-  
 trarunt: neq; iam quicquam proficio subsidium iuris  
 implorando. Conuerti igitur animum ad te, & nomen  
 tuum iam aliquoties inclamaui: sed neque tu aures ad  
 voces meas supplices, & queribundas adhibuisti. Inuo-  
 caui tandem optimorum virorum præsidium, qui cau-  
 sam meam & legationem dispicerent, & Reuerendissi-  
 mo Domino, Ioanni è Comitibus de Hoya, Episcopo  
 & Principi Monasteriensi Catholico, docto, prudenti,  
 & Sacræ Rhomanæ Ecclesiæ, atq; nominis tui studio-  
 sissimo præfuli, fidem facerent: illeq; deinde re cogni-  
 ta, & tibi, & Pontifici maximo, & Regi, & Senatui, & or-  
 dinibus Regni, sicut ex adiuncto literarum exemplari,  
 apparet, innocentiam & legationem meam reteret.  
 Ego postremò pro Colophone Miscellanea de rerum  
 causis, tuo nomini dicaui, & Nasi calumnias dilui, &  
 ad Cardinalem atque Senatum de instauranda Rhoma-  
 næ Ecclesiæ doctrina scripsi, vnde nulla difficultate  
 meâ erga te & Ecclesiam Rhomanâ, fidem & obseruan-  
 tiam intelligere poteris: quibus etiam addidi hisce die-  
 bus vaticiniorum Ioachimi & Anselmi de statu Rho-  
 manorum Pontificum, contra cuiusdam Magi proter-  
 uiam, tibi haud ingratâ explanationem: quam & ipsam  
 tuo numini nuncupo, consecro, & religiosam illam de-  
 dicationem, denuò & me quoq; totum etiam atq; etiâ  
 tuis commodis defero, summaque religione deuincio,  
 obsequio do, atq; in perpetuum constituo. His omni-  
 bus puto aduersus te satis animi mei candorem, reue-  
 rentiam, & fidem, & mendacia hominum amētissimo-  
 rum, quibus in hæc mala fortunarumq; angustias præ-  
 cipitatus

N V N C V P A T O R I A .

cupitatus, sum constare: vt nō videam quid obesse possit, quo minus veterem illam tuam erga me clementiam, quam tantopere nullam intermittens occasionem maxima cum humilitate imploro, exorem. Exaudi ergo voces meas Pater Patriæ vnice, percipe quæso preces meas, attēde verba & clamorem meum, Rex meus, & Imperator meus. Sanè tantò magis me exaudire debes, quantò maior inde ad Ecclesiam, Imperium, et regnum tuum, salus, commodum, & incrementū redit. Quid obsecro maius et gratius tibi contingere poterit, quàm pax et tranquillitas Ecclesiæ, hæresum exterminatio, et regni tui iustum et honestum augmentum? Non putes te hæc vllis Comitibus, vllis Cōcilijs, tot sumptibus, tot laboribus, et periculis coactis, cōsequi posse: legatione mea fortè facilius, quod aio, eluxisset. Verba, quæ profero, mea non sunt: probari possunt: neque aliud scripta mea omnia sonant. Proinde cū et ad te, et ad Ecclesiam tantum emolumenti, ex mea legatione redeat, et ego propter eam tantis malorum fluctibus opprimar, ne quæso differ auxilium tuū, quin potius accurre ad supplicem tuæ clementiæ, extrahe me ex profundis gurgitibus calamitatum, quibus innocens absorbeor: eripe vitam meam de manibus sicariorū, animam meam ab omnibus proiectam et derelictam, è canū rabidorum faucibus eripe: erue me ex ore cruēto leonū, defende salutem meam, ab impetu hominum immanium et ferorum: restitue innocentiam meam Prussiæ, impartire mihi tuas hortatorias, et commendatitias ad regem Polonię affinem tuum, dominum meum Clementissimum, et effice, vt mihi in Prussia ius et fortuna mea



## EPISTOLA

næ meæ reddantur, & in legum violatores animaduer-  
 tatur: agè tuum priuilegium habeam, quo typographi-  
 cas insidias reprimere & libros pro defensione Ecclesię  
 Rhomanę cōscriptos excudere valeā: tum tua & Pon-  
 tificia & regia authoritate liceat mihi nulla vi interpel-  
 lante omnes Vniuersitates & Conuentus lustrare, om-  
 nesq; Ecclesię Rhomanę hostes ad publicum certamē,  
 vita interposita, prouocare, (neq; enim illi se aliud ex-  
 petere profitentur) senties demum quid hæc res, &  
 Ecclesię, & tibi, & vniuersæ Reipub. Christianę salutis,  
 commodi, laudis, & glorię perpetuæ atq; sempiternæ  
 sit allatura. Plura in eandem sentētiam ex Miscellaneis  
 & Vaticinijs istis intelligere poteris. Tuū iam est opti-  
 me Cæsar, in re tā ardua & vniuerso orbi vtili ac neces-  
 saria ocys deliberare, et insonti prospicere, Ecclesię  
 & tui imperij vtilitati consulere, & debitas pœnas ab  
 impijs tyrannis repetere. Hac ratione efficies profectò,  
 vt et religio et sanctitas in animis mortalium recipiant  
 antiquum dignitatis locum: & populus maximo con-  
 sensu excitabitur, ad colendum & venerādum summa  
 pietate nomen Dei: et ego nullo tempore tanti benefi-  
 cij memoriam deponam, te semper ac nomen tuum  
 splendidissimum celebrabo, inter omnes pios & Chri-  
 stiani nominis cultores: atque ad Deum Opt. Max. pre-  
 ces ardenti pietate incensas, fundere nunquam inter-  
 mittam, quò extet monimentum in te diuinæ bonita-  
 tis admirabile atque semper durans, tuq; res diuinas cō-  
 templari, iustitiam colere, & humanā societatem tueri,  
 totamq; viuēdi rationem in modestia, & animi magni-  
 tudine atque in rerum humanarum contemptione &  
despicientia

# N V N C V P A T O R I A.

respicientia, & in omni virtute ponere perpetuò valeas, ac animum in corpore, intelligentiam conclusam in animo, ita dirigere, vt in terris iustè cum fide ac pietate viuens, ad cœlum migres & secum beatus æuum agas sempiternum Amen. Quod superest Cæsar inclyte, faxit Deas, vt tibi Comitia, quę iam celebras, ex animi tui sententia succedant, tuq; diu Catholicus, augustus, felix, saluus & incolumis valeas, & me clementi responso digneris. Datum Monasterij 3. Id. Iulij 1570.

## SEQVITVR EXEMPLAR LITERARVM,

**R**euere[n]dissimi, ac Illustrissimi Pręsulis, domini Ioannis Comitis de Hoya, Dei & Apostolicę sedis gratia Episcopi et Principis Monasterięsis, administratoris Osnaburgęsis et Paderbornensis diocęsiũ, vigilantissimi, doctissimi et catholicissimi, ad Pium quintum Pontificem Rhomanę et vniuersalis Ecclesię optimũ maximum: Maximilianũ secundum Imperatorem Cęsarem gloriosissimũ: Sigismundum Augustum regem Poloniaę potentissimum: Stanislaum Hosium Cardinalem et Episcopũ Varniensem: Iacobum Vckaniski Archiepiscopum Gnesnensem, legatum natum, et regni Poloniaę primatem: N. Padniewski, Episcopum Cracouiensem: Stanislaum Karnkoroski Episcopum Vlodislauensem et Pomeranię: Adamũ Konarski Episcopum Poseniensem: Petrum Miszkowski Episcopum Plocensem: Franciscum Craniski prępositum Plocensem, regni Poloniaę vicecancellarium, pręsules dignissimos.

SANCTIS-



# SANCTISSIMO AC BEATISSIMO IN

CHRISTO PATRI AC DOMINO, DOMINO PIO, EIVS NO-

minis Quinto, Sanctæ Rhomanæ ac Vniuersalis Ecclesiæ Pontifici Opr.

Max. Domino nostro clementissimo.

Sanctissime ac Beatissime Pater Domine  
mi clementissime.



Esquiannus iam est, quod ad petitionem Illustris Domini Pauli Scaligeri, intercessorias literas nostras, ad Serenissimū Polonia Regem Dominum & amicum nostrum charissimum ac obseruādis-  
simum dedimus, quibus deprecabamur, vt ipsi tu-  
tò, in Regno, & statibus Serenissimæ Celsitud. suæ, quibus, cū  
legationis publicæ munere fungeretur præter culpam eiectus, ac  
denudatus est, causam suam contra insultantes aduersarios age-  
re, defendere, & prosequi liceret. Et cū is nobiscum in non exi-  
gua expectatione fuisset, nostras suasque preces, tantum apud  
Serenissimam Celsitudinem suam potuisse valere, vt proscriptio-  
ne abolita & cassā, ipsi accessus tutus, suæque innocentiae & caus-  
sæ defensio pateret publicè: nihilominus querulenter nobis expo-  
suit, se à Serenissima Celsitudine sua, nihil responsi accepisse ha-  
ctenus, nec se mirari satis posse: imò animo planè angī, quod &  
Serenissima Celsitudo sua etiam ne ad nos quidem rescribe-  
re, suamque voluntatem & declarationem patefacere sit dignata.  
Quæ res, cū ipsi in detrimentum vergat summum, & mora, qua  
premitur, S. R. Ecclesiæ, propter quam ablegatus fuit, & cui  
studium, industriam, fidem & omnem suam operam impendit,  
parum sit fructuosa: denuò nos cohortatus est, & studiosè roga-  
uit, vt deprecationem nostram ad Serenissimam Cels. suam, non  
tam propter illius causam, quàm S. R. E. commodum, & utili-  
tatem maximam, quam hinc illam omnino percepturam cogno-  
uimus,

uimus, ipsi impartiremur, quo scilicet Ecclesiae, ac innocentiae & defensionis suae intuitu, regnum, ducatus, status, prouinciaq; demum Sereniss. Celsit. suae omnes patefactae ipsi, ac tutae essent. Id verò à Sereniss. Cels. sua, vt peteremus confidentius, sua effecit innocentia, & fide dignorum quorundam virorum praeclara testimonio publica, quibus nos edocuit, ipsi status sui quaestionem, non solum iniquè, & petulanter motam, sed causa incognita, eoq; absente & legatum agente, ab aduersarijs omnia sinistrè tentata, parata, & proscriptionem summo sui & Rhomanae Ecclesiae incommodo proclamata fuisse. Itaque non diffidimus serenissimam Cels. suam non solum sponte, tanto ac tam eximia eruditionis pietatis, & fidei Catholicae addictissimo viro, ac propugnatori acerrimo, benefacturam, sed clementi & beneuolo animo passuram etiam esse, vt ipsi liceat regnum, terras, & dominia Sereniss. Cels. suae vniuersa, tutò & absque periculo ingredi, suamq; causam de iure tutari, & Ecclesiae Rhomanae emolumentum per legationem sibi iniunctam prouehere. Quo autem id fiat significantius, & is praeter haec omnia, etiam à Sereniss. Cels. sua, antequam quid contra ipsum statuatur amplius postliminij iure planè restituatur, omniq; studio ac beneuolentia iuuetur, submissemus beatitudinem vestram, vt istius rei consequendae, in nostri & sui gratiam sanctitas vestra simul hortator sit, atque domino Scaligero, suas itidem hortatorias & commendatitias impartiat, ac pro illo clementissimè intercedere dignetur. Id ea qua est affectus obseruantia erga sedem Apostolicam promeretur. Quod superest sanctitati & beatitudini vestrae, ad multos annos omnia prospera precamur, & nos eidem deuotissimè commendamus, suamq; desuper expectamus clementem responsionem. Ex Iburgo 9. Kalend. Martij, 1570.

\*\*

Lite



*Literas ad Casarem & regem, mutatis mutandis, per omnia  
eiusdem cum pontificijs tenoris, ordinis, formæ, & continuatio-  
nis, Episcopus iussit fieri: sed ne ille quidem, quæ ad Polonia præ-  
sules sunt datæ, nisi conclusione differunt: videlicet, Reuerendis-  
simam, D. V. studiosè rogamus, vt nobiscum apud Serenissimam  
Cels. suã deprecator & intercessor, ac promotor sit, & nostra of-  
ficia sibi quàm paratissima ducat. Valeat R. D. V. cui ad mul-  
tos annos omnia precamur prospera, & suam desuper expe-  
ctamus beneuolam responsionem. Datum ex arce no-  
stra Iburg. vt suprâ. Subscripsit Princeps,  
& Secretarius Laurentius  
Scradaeus.*

**AD**



AD ZOILVM.

*Hæc quicunque cupis rabie temerare canina,  
Ne, precor, occulto sub lare clausus agas.  
Si tibi quid Pallas tribuit, si doctus Apollo,  
Dentur ab ingenio publica scripta tuo.  
Sin minus, at tacitis me perges lædere sannis,  
Zoile: non tecum sic ego teclius agam.*

\*\*

2

APPEN-



APPENDIX AD ZOILVM, ET  
ad vniuersas Sectas.



Quod si verò quid est Zoile, quemadmodum non potest non aliquid esse, quod sugillare, & calumniari in hoc opere valeas: cum nullum sit remedium aduersus morsus Sycophantæ: Ecce ut veritas, & fidei meæ fundamenta, quibus sanctam, Catholicam, Apostolicam, & quidem Rhomanam Ecclesiam colo, tantò magis elucescat, non tibi hæc mea scripta modò, sed me quoque ipsum, quocunque in loco in arenam mecum omnibus tuis sectarijs descendere voles, siue Rhomæ coram summo Pontifice, & Reuerendissimo cœtu Cardinalium, siue Vienna Austriae, coram gloriosissimo Imperatore, eiusque sanctissima Repub. siue Lutetia Parisiorum, siue Cracouia Polonorum, coram Sereniss. & Christianiss. regibus & vtriusque cum Aule, tum Academia, amplissimo confessu, siue Colonia Agrippinae, coram omnibus vniuersi Imperij Illustriss. Electoribus, Principibus, & prudentissimis Senatibus, siue malueris Vvitebergæ Saxonum, aut in quacunque Europæ Academia, Deo fauente, offero: paratissimus, si cussa cecidero, cadere & vita, ut & tu, & tui consecutores consequamini vitam: ea tamen ratione, ut id mihi nulla vi interpellante præstare liceat. Datum Monasterij nono Kalend. Augusti, 1570.

PAV-

**PAVLI PRINCIPIS DE  
LA SCALA ET HVN, MARCHIONIS  
VERONAE, &c. DOMINI CREVTZBURGI PRVS-  
SIAE, PRIMI TOMI MISCELLANEORVM, DE RERV  
causis & successibus atq; secretiori methodo ibidem  
expressa effigies ac exemplar, nimirum vaticiniorum  
& imaginum Ioachimi Abbatis Florensis Calabriae, &  
Anselmi Episcopi Marsichani, super statu summorum  
Pontificum Rhomanæ Ecclesiæ, contra falsam, ini-  
quam, vanam, confictam & seditiosam cuiusdam Pseu-  
domagi, quæ nuper nomine Theophrasti Paracelsi  
in lucem prodijt, pseudomagicam exposi-  
tionem vera, certa, & indubitata  
explanatio.**





## VATICINIUM PRIMVM.



### IOACHIM ABBAS.

Stellas congregabit, vt luceat in firmamento cœli. Ascende calue vt amplius decalueris, qui non vereris decaluare sponsam, vt comam vrsæ nutrias: vade & pascē columbam granis purissimis à fera pefsima conculcandis: sed caue ne fatua pietate delusus, grana infecta, quibus vrsam pascis, columbæ propines, ne tali cibo infecta grauitè infirmetur, tardè & difficulter curanda.

## PAVLVS SCALIGER.

3

Paracelsus, siue quisquis ille sit Pseudomagus, qui imagines ex Ioachimi Abbatis & Anselmi Episcopi vaticinijs confectas, & vt ille ait, olim Nurenbergæ repertas, se ex fundatissimo vera Magiæ vaticinio deduxisse & exposuisse profitetur, splendidi-  
dissimè mentitur. Nam primam hanc imaginem dicit esse Rho-  
mani Pontificis cum duobus vrsis, alteri per os monetam in-  
gerentis. Ceterùm Ioachimus ipsemet interpretatur non mo-  
netam sed grana esse. Ita istum pseudomagum aut solas imagines  
sine autoris adumbratione habuisse, consentaneum est, atq; pro  
sua libidine & interpretatum esse, & deprauasse: aut si adum-  
brationes illas vidit, exquisita quadam malitia & impostura ma-  
gica: non tam magicè, quàm affectatè, libidinosè, nefariè, & me-  
ra vesania, atque crudelitate, Pseudomagicè tractasse & consul-  
tasse. Nihil dicam de stulto illo illius tripartito genere vaticini-  
orum, cùm Astrologica prædictio, omnibus pijs suspecta sit, &  
Cacodemonibus attributa: nisi fortè per Astrologicam diuinatio-  
nem, necessitatem Physicam intelligat, quæ ad naturales effe-  
ctus, & actiones pertinet, quam nemo prudens vnquam negauit,  
veluti quæ Geneseos libris abundè probatur, & quoq; lib. Regū  
cōfirmatur. Magica autem diuinatio, cuius ille facit mentionem,  
est nihil aliud, quàm quædam consequentiæ necessitas: scilicet  
Deum pœnas irrogare delictis: sed quando & quas, qualesq; hu-  
ius Magiæ non est discernere: nisi aliam Magiam, cuius tamen  
ibi mentionem nullam facit, putet. De prophetia iam aliud est,  
hæc enim ad absolutam necessitatem spectat. Quod porrò ad Mat-  
thæi capitulum negat referri naturalia signa, sed & Solis &  
Lunæ amissionem luminis, pestem, terræ motum, famem &c.  
tantum figuratè intelligenda esse: huic Pseudomago repugnat  
concor omnium Catholicorum & vetustissimorum interpretum



sententia, putà Origenis, Augustini, Chrysostomi, Effrem, Hieronymi &c. qui & historicè & figuratè de extremo iudicio Christi & Apostolorum verba exponunt, sicut suo loco prolixius tractauimus. Neglectis igitur insani hominis opinionibus, ad rem veniamus, & quid nam voluerint Ioachimus & Anselmus iuxta propriam illorum interpretationem, & historicam atq; symbolicam veritatē dignoscamus. Neq; verò curo quo genere illi diuinationis, an spiritalis, naturalis, artificiosi, popularis, an dānati vsi sint, id quod nos Epistola de ratione prophetandi, & libris instit. Philosoph. exposuimus: hoc tantū vrgebimus verāne fuerint quæ prædixerint, & quid quomodōue portenderint. Iste autem Ioachimus natione Calaber fuit, & monachus ordinis sancti Benedicti, atq; in Florensi cœnobio eiusdem professionis Abbas. Multa scripsit, & in omnibus fermè libris suis consuevit miscere prognostica. Commentatus est in Apocalypsim & Esaiam, Ieremiā &c. & contra Petrum Lumbar dum theologum librum composuit, qui postea Concilio Lateranensi reiectus est. Vixit tempore Urbani tertij, & anno Domini 1178 Veronæ eundem conuenit. Itaque primum Ioachimi vaticinium ad Papam quidem, sicut & reliqua omnia, refertur: sed longè diuersa ratione, quàm Pseudomagus interpretatur, qui putat per vrsos illos designari eos, qui Papæ adstant, eumq; dilacerandi potestatem habent, auroq; & argento corrumpuntur &c. Ceterum veritas rei talis est, hunc Ioachimum vaticinatum esse, de primo qui sequeretur Pontifice ex familia Vrsina. Quod præter alios Theolosphorus de Cusentia presbyter & eremita libro, quem anno Domini 1386. de statu Ecclesiæ scripsit, fol. 8. testatur, inquiens hæc vaticinia à Nicolao tertio ex ordine cœpisse. Is ergo erat Ioānes de Vrsinis Caietanus nuncupatus, deinde Nicolaus tertius Papa declaratus & inauguratus anno 1277. Appellat illum caluum, amplius decal-

uandum

uandum, propterea quòd nō verebatur decaluare sponsam, id est spoliare Romanam Ecclesiam, cuius Episcopus esset, vt comam vrsæ nutriret, id est familia Vrsinæ prospiceret. Nihil enim in Pontificatu duxit antiquius, quàm Caroli Siciliae regis potentiam imminuere, & stellas congregare, quò luceret in firmamento cœli, id est potentia superare reliquas Rhomanorum familias. Duos proinde vrsos ad eam rem nutriuit, id est, duos nepotes Bertholdum Vrsinum, & Latinum Cardinalem, ad fastigia rerum euexit: illum comitem Rhomandiola, hunc Hetruriæ Legatum constituens, quorum opera voti compos fieret. Dum ergo Regem nimis persequeretur, & suos nimis amaret, multaq; eis condonaret, multa etiam Ecclesiæ decedebāt, & ille caluus decaluabatur. Quapropter inquit, Vade & pasce columbam, id est Catholicam Ecclesiam, granis purissimis, id est purissima & optima religione, pietate, proposito & intentione: quo nomine, cum literis & nuncijs Rudolphi Imp. recepit omnem Rhomandiola pro Ecclesia, atque etiam Bononiam, & Hetruriam omnē opulentissimas & feracissimas provincias: sed à fera pessima cōculcandas, hoc est à duobus prædictis Vrsis, qui illas ab Ecclesia abalienarunt. Idcirco monet Pontificem, ne fatua, id est ficta pietate delusus grana infecta, id est bona Ecclesiæ abalienata, quibus vrsam pasceret, columbæ propinaret, hoc est Ecclesiæ vniuersali obedientiam, & pietatem simularet, atque eiusmodi cibo illam ad infirmitatem vsq;, quæ difficilè curari posset, inficeret, scilicet rerum orbis Christiani damno atque incommodo magno: vnde tandem odium non tam patrum, quàm populorum incurrit. Huic enim Pontifici in animo fuerat, duos Reges creare, vtrumq; Vrsinum: quorum alterum Hetruriæ, alterum Lombardia præficeret: qui inde Theutonicos partem Alpium incolentes, hinc Gallos Sicili-



am & regnum Neapolitanum tenentes, armis in officio continerent. Vt verò id ei facere liceret, Petro Aragonum Regi persuaserat, vt iure hæreditario Cōstantiæ vxori suæ regnum Siciliae repetere anniteretur. Senatoriam autem dignitatem ipse à Carolo ad se transtulit: vetuitq; perpetuo edicto, ne quis rex aut princeps magistratum ipsum petere, aut obire auderet. Quocirca nepos Latinus Cardinalis in Hetruria Legatus, restitutis vbiq; Gibellinis, Florentiæ ac in cæteris Hetruriæ vrbibus pro arbitrio animi magistratus imposuit. Munus verò Senatorium, quod principibus & regibus demandari consueuerat, ipse solus obiuit. Suos ita amauit, vt aliunde raperet, quod eis condonaret. Nam quibusdam nobilibus Rhomanis castella vi abstulit, ac suis dono dedit: maxime verò Surianum. Itaque imaginis huius hic est sensus, Seges spicis vberibus & crebris in sinistra manu super quam columba sidit, sunt bona Ecclesiæ, quæ Ecclesia per columbam significatur. Huius segetis grana, id est fructum bonorum Ecclesiasticorum, tradit dextra manu duobus vrsis, id est largè munificè & liberaliter confert duobus nepotibus, vt luceāt in firmamento cœli, id est vt regia dignitate præfulgeant, super segetem & columbam, id est fines Italiæ siue Ecclesiæ, quos defendant aduersus Theutones & Gallos, vt dictum est. Vnde manifestè apparet, hanc primam prædictionem Abbatis non ad omnes Pontifices, sed ad hunc solū Nicolaum tertium pertinere, & arrogantem hunc, atque adulerinū Magum, non tam erroris, q̃ splendidissimi mendacij, & certissimæ ignorantie veræ magiæ, conuinci. Hæc ita esse, qui vitā Nicolai tertij inspiciat, intelliget, & imposturā Pseudomagi nulla difficultate deprehendet. Quòd autem in hoc Pontifice præter summas virtutes & laudes illius, historijs proditas, quoq; hæc & alia quædam, sicut & in multis alijs, vitia deprehendantur,

non

non Pontificatui, neque ulli alie rei id tribui debet quàm peccatis populi. Deus enim facit regnare hominem hypocritam, propter peccata populi. Iob. 34. Ideoq; nos etiam Petrus Apostolus in prima sua epistola cap. 2. docet subditos esse oportere cuius humanæ creaturæ propter Dominum, siue regi tanquam præcellenti, siue præsidibus non solum bonis ac humanis verum etiam prauis. Qui enim potestati resistit Deo resistit. Rom. 13. Merito quoque illis obtemperandum est, tanquam reddituris rationem, pro ouibus suis. Quoniam inquit Apostolus, Obedite præpositis vestris, & subiaceate eis. Ipsi enim peruigilant, quasi rationem pro animabus vestris reddituri, ut cum gaudio hoc faciant, & non gementes, hoc enim non expedit vobis. Heb. 13. Itaq; iste Pseudomagus, & omnes illius consecratores, tanquam hæretici, fugiendi sunt, qui tam iniquis & cogitatis ineptijs, atq; imposturis plebem decipiunt, totq; turbulentis erroribus homines palantes implicat, & in magistratum concitant, & Pontifices maximos in odiū & contemptum populi adducunt. Imitatores enim sunt vetustissimorum hæreticorum, videlicet Hydroparastarum, Templariorum, Fraticellorum, Valdēsium, Begardorum, Beguinarum & similium. An propterea Israel damnandus est, quod Saul rex etiam à Deo delectus, & prophetiæ spiritu decoratus, tandem inobediens Deo factus, & spiritu maligno agitato, Dauidem seruum Dei, regem propheticum, tanta atrocitate, & crudelitate insectatus sit? An propterea fugienda est religio Mosaica, aut regij vatis scripta damnanda, quod Dauid, qui dictus est vir secundum cor Dei, adulterium homicidio copulauerit? An ideo fugienda est Cathedra Moysis, & damnanda scripta Salomonis, quod videamus Salomonem, cui in principio regni Deus dederat sapientiam ultra mortales omnes, eò dementiæ perductum esse, ut peregrinis simulachris immolaret? Idem fecit successor illius Ieroboam, qui vitulos aureos



los aureos cōflatiles in Dan & Nephtalim posuit, & idololatra,  
 pessimus populū Israel ad idololatriā induxit, vnde totius populi  
 Israel destructio secuta est: & diuisus est vniuersus Israel à domo  
 Dauid, necsecutus est quisq̃ domum Dauid, nisi tribus Iuda, &  
 tribus Benjamin: an propterea igitur fugiēda erat domus Dauid?  
 Ita & hodie potior pars Europæ, & vniuersa Asia, & Aphrica  
 partim hæresi infecta, partim infidelitate circumsepta, diuisa est  
 à sede Petri: Ideonē sedes Petri mala erit: certè non plus quàm  
 Domus Dauid, quam decem tribus dereliquerunt. Sed neque re-  
 ges Iuda peccatis caruerunt. Roboam enim succedens Salomoni  
 in regno, sed non in sapientia, spreto seniorum consilio, per adole-  
 scentum temeritatem conturbans populum duas tantum tribus  
 retinuit, & ita diuisa Monarchia Dauid, nec vnquam postea in-  
 staurata est. Huic successit Abia filius, qui & ipse peccata paren-  
 tis peccatis suis cumulauit: An propterea detestandum erat re-  
 gnum Iuda? Asa successor Abiæ licet per annos. 36. morem gesse-  
 rit Deo & idola ex domo patris sui Dauid abstulerit, tādē verò  
 & ipse fœdus cum rege Syriæ percutiens displicuit Domino. Iosa-  
 phat quoq; (bonus aliās) impijs regibus Israel quandoq; præstitit  
 auxilium. Ioram succedens pessimus fuit, & occidit fratres suos,  
 & vestigia regum Israel secutus est. Ochosias filius, patris simi-  
 lis extitit. Ioas successor à Iorade Pontifice rex constitutus, cun-  
 ctis diebus Ioradis rectè vixit, quo mortuo & ipse desijt esse bo-  
 nus, & lapidari iussit Zachariam. Amasias successor, post bona  
 initia malum habuit finem, qui etiam Deos Seyr adorauit. Ozias  
 Amasie filius, benè quidem coram Domino incessit, sacerdotium  
 tamen vi sibi vsurpauit, sub Azaria pontifice: idcirco lepra per-  
 cussus, & regno deiectus fuit, atque pro ipso Ioatham filius re-  
 gnauit. Ahas filius Ioathæ pessimus fuit idolo latra. Ezechias fi-  
 lius optimus equidem: sed etiam hic, siue propter elationem, siue  
 propter

propter elationem, siue propter ægritudinem ad mortem vsque  
valetudinarius fuit. Manasses filius Ezechiae pessimus fuit idolo-  
latra, & prophetas occidit, licet postea pœnitentia ductus, veni-  
am obtinuerit. Amon filius patrem imitatus est quidem in vitijs,  
sed non in pœnitentia. Iosias successor pius & optimus diuinæ le-  
gis per omnia fuit sectator. Ceterum & ipse peccauit, quia con-  
tra voluntatem Domini pugnavit aduersus regem Aegypti. Ioa-  
thas successor totus malus fuit. Iechonias successor & ipse malus  
fuit: Sedechias successor tertius filius Iosiae, & vltimus regum Iu-  
da & Ierusalem, quoq; malus per omnia fuit, atq; ideo quia non  
audiuit Ieremiam prophetam, periit, & omnis Iuda cum eo, abdu-  
ctus est in Babylonem, cui & oculi sunt eruti, & filij occisi, & v-  
niuersus populus à Chaldaeis trucidatus: & qui gladium effuge-  
rant, in seruitutem redacti sunt Chaldaeorum. Atque hæc series  
regum Iuda, est linea Christi, in qua nemo peccatis, pauci idolola-  
tria caruerūt: an propterea regnum Iuda abijciendum, aut linea  
Christi, quasi inde Mefias non promanaret, negligenda erat? Ita  
fac pontifices omnes mali sunt, an ideo pontificatus malus? Nihil  
dicam de pontificibus, qui præcesserunt vaticinia Ioachim, &  
Anselmi equidem sanctissimis tum Martyribus, tum Confessori-  
bus: hos solos inspicias, qui his vaticinijs describuntur, nulla diffi-  
cultate senties, longè plures bonos fuisse pontifices Romanos,  
quàm reges Iuda. Quare sicut propter malos reges, regnum non  
erat malum: ita propter quosdam malos pontifices, pontificatus  
minimè censendus est malus. Post reditum autem populi Israel  
de Babylone, exactis regibus, pontifices & duces in auguraban-  
tur, qui modus vsque ad Herodem seruatus est: vt videlicet sum-  
mi sacerdotes tenerent primatum, duces verò essent substituti,  
semper tamen duces erāt de tribu Iuda, iuxta prophetiam Iacob,  
Non auferetur sceptrum Iuda, & dux de fœmore eius. Quorum

B primus



primus pontifex Ihesus, & Dux Zorobabel. Hunc Ducem secutus est Abiud, de quo & sequentibus vsq; ad Ioseph nihil habetur in scripturis, nisi quod à Matthæo numerantur ita: Abiud genuit Eliachim, qui Azar, qui Sadoch & c: Quocirca gesta illorum debite cognosci nequeunt. Ex pontificibus autem Ihesum secutus est Ioachim, & Elizaphat boni, Iudas sanctus quidē, sed multis seditionibus agitato. Ioannes quintus pontifex Hebræorum, & filius Iudæ, fratrem Ihesum, qui ad pontificatum aspirabat, occidit. Iudas sextus pōtifex optimus fuit. Onias filius & ipse bonus & pacificus. Simon filius Oniæ cognomine iustus. Eleazarus, Ptolemæo Philadelpho iubente 72. legis interpretes in Alexandriam misit. Onias filius Simonis secundus. 11. Hebræorū pontifex mente paruulus, pecunijs auarus. Quamobrem tota penē Iudæa periclitata est, quod zelo auaritiæ negauerit tributa Euergeti Aegypti regi. Simon filius Oniæ. 21. Pont. bonus. Onias magnus Simonis filius, qui fugiēs tyrannidem Antiochi, in Aegypto exstruxit templum simile Ierosolymitano, grauitè peccauit. Simō filius Oniæ bonus, habuit tres filios, Oniam, Ihesum, & Ioannem, qui postea ad tres principatus sacerdotij peruenerunt. Onias fuit pius, qui tandem ab Andronico occisus est. Iohannes genuit Mathatiam sacerdotem, qui habuit quinque filios, Iudam, Ionathā, Simonem, Eleazarū & Ioannem. Mathatias autē sacerdos, non fuit pontifex. Quia Demetrius Sother, Syriæ & Asiæ rex, filius Seleuci, occiso Antiocho Eupatore, & Lysia tutore, Alchimū pōtificem cōstituit, cum quo Bachides missus Ierosolymam, multos Iudæorū occidit. Huic se Iudas Malchabæus filius Mathatiæ opposuit, & Nichanorē occidit. Hic Iudas fuit vir bellicosissimus, & fortissimus, & tantus triumphator, vt Israel nec ante se, nec post se parē habuerit, cuius gloriosa facinora libris Machabæorū expressa sunt. Hic templū triennio profanatū, cum fratribus purgauit. Postremò tandem pro le-

ge Dei, cū tribus annis Pōtificatū administrasset, in bello cecidit. Huic successit Ionathas frater, & pōtifex & Dux Iudæorū, non impar Iudæ fratri virtute, qui posteaq. 19. annos rexisset populū Iudæorum, à Triphone dolose captus, cū filiis interficitur. Simon tandem succedit, frater Ionathæ, filius Mathatiæ, tertius Iudæorum Dux, pariter & pontifex, qui sedit annis 8. religiosus & prudentissimus, & ipse nequiter à genero suo occisus. Iohannes Hircanus Simonis filius, à Ptolomæo duce in conuiuio Ierichi iure obtinuit Sacerdotium, idq. 23. annis gessit optimè. Hunc secutus est Aristobulus filius, & ipse bonus pontifex & Dux, à Rhomanis amicitia impetrauit: sedit annis 26, & multas seditiones à Phariseis & Essæis pertulit: tandem verò matrem cum duobus fratribus in vincula coniecit, primusq; diadema regni sibi inposuit, & fuit rex & sacerdos vno tantum anno: fratrem suum interfecit. Huic successit frater Alexander, rex & sacerdos, regnavitque annis 27. fratrem suum secundò à se genitum occidit: tertium regno priuatum secum viuere coegit: hic vsque adeò tyrannus fuit, vt spacio sex annorum mille seniores peremerit, octingentos quoq; vxoratos viros vnā cum vxoribus ac liberis in plateis patibulis affixerit, qui eius crimina detestabantur. Hic habuit duos filios, Hircanum & Aristobulum, & post mortem regnum reliquit Alexandræ vxori, quæ plurimum apud populum gratia valebat. Itaque Hircanus filius Alexandri, vigesimustertius Iudæorum pontifex à matre constituitur, qua mortua Aristobulus arma mouit aduersus fratrem Hircanum, illumq; in campis Ierichontinis vicit: Hircanus autem ad Aretham regem Arabum confugit, indeq; reuersus cum magno exercitu Ierosolymam obsedit. Visa hac fratrum dissensione, Scaurus soluit obsidionem ratus temporis commoditatem adesse, qua Iudæam tributariam Rhomanis subigeret. Quocirca Pompeius Ierosolymam veniens,



in urbem Hircani factionibus receptus, templum expugnauit, & profanauit, licet inde nihil tulerit. Tandem Hircano de nouo principatum sacerdotij donauit, & Iudæam sub tributo constituit, Aristobulum cum duobus filijs Alexandro & Antigono, totidemq; filiabus, captiuos Rhomam abduxit. Alexander Aristobuli filius, dum cum patre Rhomam abduceretur, elapsus est, & Hircano patruo insidias tetendit: verum Antiochie à Scipione securi percussus perijt. Antigonus tertius frater, solus cum duobus filijs è captiuitate Rhomana euasit, & Cæsarea, Iudæaq; positus, Antipatrum Idumæum, virum strenuum, Iudææ procuratorem cōstituit, & rursus patruo suo Hircano regnum concessit: ita tamen vt non rex vocaretur. Antigonus ad Pachorum Parthorum regem confugit, & ibi vsq; ad obitum Cæsaris permansit: deinde urbem expugnauit, & comprehenso Hircano, aures illius dentibus truncavit. Quamobrem M. Anthonijs astante Octauiano, Herodem regem Iudææ declarauit: qui violenter urbem ingressus, Antigonom comprehendit, & ad Anthonium in Antiochiam vinctum remisit: vbi securi & ipse percussus interijt. Atque hic est finis generis Asamoneorum, quod de familia sacerdotali fuerat: & regnum Iudææ, atque per successionem sacerdotum, vicina iam natiuitate Domini nostri Ihesu Christi, defecit. Et sic Mosis prophetia impleta est, Nō deficiet princeps de Iuda, nec dux de fœmoribus eius, donec veniat, cui repositum est, & ipse erit expectatio gentium. Iste Herodes Hircanum principem sacerdotum, & eius filium, qui patri in sacerdotio succedere debuerat, interfecit: scribas præterea omnes, postquam multa funesta scelera perpetrasset, ac diuinæ legis interpretes interemit. Paruos in Bethleem simili scelere, cum Ihesu Christi natiuitatem Magorū indicio cognouisset, peremit. Quo factō Herodes repente morbo intercutis percussus, & scatentibus toto corpore vermibus miser-

bus miseram exalauit animam, quinque superstitibus filiis, scilicet Archelao, Herode Antipa, Antipatro, Lysania, & Philippo. Ex quibus quatuor fuere Tetrarchæ, vt ex Euangelio apparet. Deinde cum Valerius Rhomanus à Tiberio imperatore procurator in Iudæam missus fuit: is suscepto magistratu primus apud Iudæos pontificatum vendere cœpit: & dum præfuit multos pontifices successiue posuit & amouit. Et primò quidem Annam à sacerdotio amouens, Hismaelis Iabi cuiusdam filium pontificem designauit: sed & hunc non multò post abiciens, Eleazarum Annæ pontificis filium in sacerdotem surrogauit. Post annum autem, & hunc ab officio remouens, Simoni cuidam Cemiti filio, ministerium pontificatus tribuit, sed non amplius & ipse, quàm vnius anni spacio est perfunctus pontificatu. Quo amoto, tandē Caipham pontificem maximum constituit, virum arrogantem, & alienæ felicitatis inuidum. Hos autem duos pontifices Euangelista commemorat: quia captus Ihesus in horto continuo per satellites ad Annam primò ductus est, tanquam socerum Caiphæ, & tandem Annas misit eum ad Caipham. Hanc pontificum seriem ideo recitavi, vt Neopisti videant, etiam ex pontificibus semper plures fuisse malos, quàm bonos: non tamen propterea pontificatum, aut Cathedram Mosis fuisse reijciendam, & funditus euertendam, quòd scribæ, & Pharisei, tam deprauatis & perditis moribus, fictâq; pietate, Christi acerrimi hostes ad mortem vsq; fuerint, Christus ipse testatur docens, eos in Cathedra Mosis sedentes audiendos esse, nec nisi eorum opera fugienda. Hic Christus illegitimis pontificibus, pecunia & malis artibus qui pontificatum consequuti fuerant, obtemperandum esse præcipit: & nos pontificibus in Cathedra Petri legitime sedentibus minus obtemperabimus? nonne etiâ prauis non tantùm bonis Petrus apostolus, vt supra retuli, iubet nos oportere subditos esse?



An propterea Apostolatus detestandus est, Quia Iudas apostolus existēs, Christū Iudæis tradidit? aut quia Petrus Apostolorū princeps, qui fortē vsq; ad mortis societatem animū professus est, ter Dominū suū abiurauit? aut quòd Paulus Christianos acerrimè insectatus sit? imò verò ordo Dei, verbū ipsius, & Ecclesiæ spiritus spectandus est: non personæ. Prophetavit Deus per Caipham, quia anni illius pontifex erat: cui aut dubium, quin Caiphas homo perditissimus fuerit? nō idcirco Caiphas erat audiendus, quia Caiphas esset, sed quia pontifex, per quē Deus loquebatur. Quis est expers peccati? Ioannes apostolus Certè mendacē eum dicit, omnisq; veritatis expertem, qui se peccati labe immunē profitetur. Si ergo nō est, qui faciat bonū vsq; ad vnū, vt quid igitur nos mutuis cōicijs proscindimus? quid est, quòd alter alterum iudicamus? sanè non aliam ob causam, quàm vt tandem nos ipsi iudicemur: tales enim certa manet cōdemnatio. Videamus oēs reges à Deo institutos, continuamq; Christi regalem lineam, & pontificum omnium, paucissimos profectò deprehendemus bonos, longè plures malos & idololatrias: & tamen ex illis nasci Christus voluit, & eos, qui se morti adiudicarunt, audiendos esse docuit, in Cathedra Moysis sedentes: quantò magis ergo pontifices in Cathedra Petri sedentes audiendi erunt? si illi audiendi erant, quorum successio destructa fuit, quorum sacerdotium finitum, quorum regnū defecerat: quantò magis ij audiendi sunt, quorum successio floret, quorum sacerdotium est sempiternum, vt regius vates psal. 109. testatur: quorum deniq; regnum sine fine manebit? Nam etiamsi temporibus Antichristi, cuius præcursores hodie plurimi conspiciuntur, obscurabitur, aut consummatione seculi oblitterabitur, tamen tantò clarius & infinitis modis præstantius redibit, instaurabitur, & elucescet. Mosaici sacerdotij & regni finem nobis & Iacob, & Moses prædixere: Christi autem regni & Sacerdotij, David testatur

statum perpetuum atque sempiternum fore ordinem, illumque secundum præscriptum Melchisedeci. Itaque ex his omnibus liquido constat, Cathedram Petri omnino esse observandam, & in illa sedentes etiam malos, esse venerandos, propter ordinem per Christum instauratum Melchisedeci. Nam, ut dictum est, malos Pontifices & magistratus dat nobis Deus, propter peccata nostra. Nobis ergo & nostris peccatis malitiam vel pontificum, vel magistratum tribuamus, & non aut Pontificatui, aut Pontificibus, aut magistratui. Hodie verò pro dolor omnes se egregios spectatores præbent alienorum delictorum, suorum ne meminerunt quidem. Sed valeant hæc portenta, quæ certissimum idcirco manet exitium: valeat insanus Pseumagus cum sua emētita Magia, & portentosis figmentis, cuius insignis malitia, & clarissima impostura, vel ex quinto vaticinio patebit. Hic enim negat, Deum ex linea Papæ verbi Dei precones excitare. Adducit rationem: (puto Magicam si diis placet) Quia Petrum & Andream ex reti piscium, & non ex Caiphæ, vel Annæ linea excitavit: atque ideo, inquit, multo minus ex linea Rhomani Pontificis, aut ex eius numero verbi sui concionatorem verum excitabit. At autor illarum figurarum, figura quinta dicit, Pontificem illum per eandem figuram designatam, benedictum fore, & in nomine Domini venturum, & sponsum legitimum sponse, id est Ecclesiæ Rhomanæ futurum, ut ibidem videre est. Deinde istius Pseudomagi magia, nescio ex qua sentina & cloaca flagitiorum desumpta, quam egregiè argumentetur, vel idiota discernere potest. Lex enim & Prophetæ usque ad Christum: Euangelium à Christo initium habet, Lex à Mose. Sacrificij legalis ordo Leviticus fuit: neque ex alia tribu, quam ex Levi sacerdotes veteris legis fiebant, qua finita, meritò & ordo finitus fuit. Cumque novæ legis sacerdotium institueretur, quis non videt, non ex ordine Levitico, sed



co, sed ex ordine Melchisedech, cuius Malachias meminit, sumendos fuisse sacerdotes? Petrus ergo & Andreas, non propter Caiapham vel Annam, sed propter finem legis, & Leuitici ordinis adimpletionem, secundum ordinem Melchisedech à Christo sacerdote & summo Pontifice sacerdotes & Apostoli instituti sunt. Et siquidem hic ordo Melchisedech æternus est, dicit enim Psal. 110. Tu es sacerdos in æternum secundum ordinem Melchisedech: quid insanit insanus Pseudomagus, & fore ait, ut sicut Leui ordo cessauit, ita cessaturum & ordinem Melchisedechi, & nescio quemnam alium subsecuturum comminiscitur? Quid igitur ait Malachias? Non est, inquit, mihi voluntas in vobis, dicit Dominus omnipotens, & sacrificium non accipiam de manibus vestris. Quoniam ab ortu Solis vsque ad occasum nomen meum glorificatur inter gentes, & in omni loco incensum offertur nomini meo, & sacrificium purum. Quoniam magnum est nomen meum in gentibus, dicit Dominus omnipotens. His Prophetæ verbis manifestè probari Missæ sacrificium docet vetustissimus martyr Irenæus lib. 4. cont. hæres. Valent. cap. 32. Sed & suis, inquit, discipulis dans consilium, primitias Deo offerre ex suis creaturis, non quasi indigenti, sed ut ipsi, nec infructuosi nec ingrati sint, eum qui ex creatura panis est, accepit & gratias egit, dicens, Hoc est meum corpus. Et calicem similiter, qui est ex ea creatura, quæ est secundum nos, suum sanguinem confessus est, & noui testamenti nouam docuit oblationem, quam Ecclesia ab Apostolis accipiens in vniuerso mundo offert Deo, ei qui alimenta nobis præstat primitias suorum munerum in nouo testamento, de quo in 12. Prophetis Malachias sic præsignificauit, Non est mihi voluntas &c. manifestissimè significans per hæc, quoniam prior quidem populus cessauit offerre Deo: omni autem loco sacrificium offertur, & hoc purum, nomen autem eius glorificatur in gentibus.

ABBAT. IOACHIM ET ANSELM.

17

*bus. Hæc ille. Vnde constat & Leviticum ordinem cessasse, & Melchisedechicum æternum fore, & Magi huius vanitatem & imposturam omni supplicio vindicandam esse.*

## VATICINIVM II.



IOACHIM ABBAS.

Clauibus claudet et non aperiet. Post Lunam ascendet Mars, sitiens sanguinem baptismalem: ascendet autem de turri ad altissimum solium, qui Solem cla-

C rissi



rissimum obfuscabit. Cum lilio et cruce aquilam cruciabit. Minimè ædificabit mihi templum, quia vas sanguinis est: zelo immoderato, virtute simulata, denigrans et dissipans superflua: solus cunctans pacem, deuorans vniuersa.

## PAVLVS SCALIGER.

*Per Lunam intelligit Nicolaum tertium, qui quo ad Ecclesiam decreuit, et quo ad suam familiam, quã euexit, creuit: & res dubias post se reliquit. Post huius inquit Pontificis mortem, eligetur alius, patria de Turri, qui bello profundet Christianum sanguinem. Hic ergo fuit Martinus quartus, Simon antea vocatus, tituli sanctæ Cecilie presbyter Cardinalis, natione Gallicus, patria Turonensis. Qui ascendit de turri, id est, de Turonensi patria ortus, ad altissimum gradum scilicet Pontificatus & obfuscavit solem clarissimum, id est Palæologum Imperatorem, pacta Lugdunensis Concilij non seruantem, & Petrum Aragonensem, contra ius fasque Siciliam occupantem, excommunicauit, atque sanguinem baptismi effudit, quia bellum contra Foroiulianos ab Ecclesia deficientes in Flamminia gessit. & causam dedit Vrsinis, vt Ioannes Latini fratris vlturus iniurias, tutaturusque dignitatem sibi à populo Rhomano traditam comparato satis iusto exercitu in Viterbienses mouens, eorum agros longè ac latè populatus sit, & Palæologus cum Petro Aragonie rege aduersus Carolum regem Sicilie inito fœdere bellum grauissimum gereret. Deinde etiam hic Martinus Cum lilio et cruce aquilam vexauit, quia auxilio Caroli Sicilie regis Ludouici Galli fratris & Imp. Constantinopolitanum anathemate notauit, & suis artibus noui motus in Cisalpina Gallia oborti sunt, Turriani admodum potentes Mediolano pulsi, Florentin*

rentini & Lucenses grauiſſimis incurſionibus, per Luchinum in  
 Heturiam Vicarium ab Imperatore miſſum, ſpretis Pontificis  
 interdictis, vexati, ac inter reges funeſtiſſimæ clades ſecutæ. La-  
 taque minimè ædificauit Eccleſiam Domino, quia vas  
 ſanguinis fuit: nam inter alia propter regnum diſcordiæ, Galli  
 nullo ſexus diſcrimine habito audita veſperi campana cæſi ſunt.  
 Qua in re adeò certè ſeuitum eſt, vt etiam mulieres Gallico com-  
 preſſu prægnantes, cæſæ dicantur. Hinc tritus ille ſermo eſt,  
 cùm quis multorum interitum exoptat, vt veſperas Siculas  
 commemoret. Quocirca Martinus quartus immoderato  
 zelo qua erga Carolū afficiebatur, & virtute ſimulata deni-  
 grauit et diſſipauit, quæ reſidua erant, vt Carolus filius  
 Caroli magna calamitate affectus, & ſuperatus non longè à Nea-  
 poli ingenti ſuorum clade, in Siciliam primū, deinde in Arago-  
 niam captiuus abductus ſit. Quare Pontifex grauib; cenſuris  
 interpoſitis, dedit in prædam occupanti regnum Petri. Atque  
 ita dum cunctaretur Pontifex pacem, & ſuppeties Carolo,  
 deuorauit vniuerſa, quia odijs & bellis inteſtinis cuncta in  
 ruinam conuerſa ſunt. Ita clauibus clauſit, quod aperire de-  
 bebat excommunicando Palæologum & Aragonem. Inſanit igitur  
 inſanus Pſeudomagus, qui hanc Prophetiam, contra expreſ-  
 ſam mentem autoris, non dubitauit, ſeditioſa ſua expoſitione, eò  
 detorquere, vt omnium Paparum ſpem atque ſolatium hoc vati-  
 cinio aſſereret in Galliæ rege ſitam eſſe: & hoc pacto Dominium  
 Cæſaris ſuis ceruicibus Papas excuſſiſſe. Iam porrò nemo non vi-  
 det, qui vel obiter Martini hiftoriam legit, hoc vaticinium, in ſo-  
 lum Martinum quartum, quadrare.



## VATICINIVM III.



## IOACHIM ABBAS.

Duros corporis sustinebit labores. Accipe supplā-  
 tator excelsos honores: arbor inutilis, & infructuosa,  
 quid cogitas te facturum ingentia, cū sis mente &  
 corpore debilis. Implere quæ cogitas non valebis. quia  
 modicum vigilabis, citò dormies et non surges, semper  
 in tribulatione viues, quamvis parum.

PAVLVS

## PAVLVS SCALIGER.

*Hoc vaticinium Pseudomagus in locum septimum retulit, vsque adeò suae magiae peritus scilicet. Quod si Mago credendum esset, non Nicolao quarto, sed Benedicto duodecimo conueniret. Istae autem prophetae ita sunt dispositae, vt ex ordine Pōtificibus immineant. Quare & hic Pseudomagus quantum aberret, etiam cecos latere nequit. Est ergo sensus, Martino quarto successurum Honorium quartum, patria Rhomanum, è gente Sabella. Hic Honorius excelsos honores consecutus, licet neminem ledere in Pontificatu suo constituisset, omnibus prodesse quo ad fieri poterat, prouocatus Petri Aragonum regis iniuria, qui regnum Siciliae occupare conabatur, Martini interdicta contra Petrum confirmauit, atq; hinc supplātor factus est, & arbor inutilis, & infructuosa, quia dū Edoardus Angliae rex in Vasco niam se confert, pacem compositurus inter Carolum adolescentē regis Francia filium, quem diximus bello captum, & Ferdinandum Aragoniae regem (Petrus enim pater ex vulnere ad Germaniam accepto, sub hoc Honorio mortuus est, & filiis Ferdinando & Iacobo relictis, huic Siciliam, illi Aragoniam ex testamento reliquit) confecta iam ex sententia res erat, & de libertate Caroli agebatur, cū interim legatus Apostolicus & Comes Atrebatensis Auelini Comite adiuvante, Cathinam urbem occupant, eoq; ex Hetruria collectas copias transmittunt. Hanc ob rem Edoardus re infecta in patriam redijt. Deinde superato Guidone Feltrano Honorius Flamminiam recipit. Multa mente voluebat, & plurimum ad propositum suum facere putabat quòd Rudolphus Imperator comparandae pecuniae studiosus, in Hetruria populos liberos faceret, eos potissimum, qui se pecunia redimerent. Haec inquam venditio non displicuit Honorio (licet indigna tanto principi videretur) quòd ea ratione Ecclesiastica ditio,*



futura securior videbatur, cū nō amplius liceret Imperatori liberas ciuitates vexare. Itaq; quāuis & corpore propter podagrā & mente propter Gallicas factiones, quia vbiq; Gallorum regū partes fouit, debilis fuerit, plurima tamē cogitabat perficere, nisi tribulationib. & duris laboribus quos sustinuit cōfectus citius, videlicet anno secūdo sui Pōtificatus, mortuus fuisset. Ita et hoc vaticiniū iuxta seriē historicā per optimē Honorio quarto cōuenit: & Pseudomagi insania manifestē apparet, qui hinc figurā septimā confecit, Papā videlicet clauas gerētem, quē claua feriat famul⁹. Neq; enim claua est quā gestat famulus, sed arbor inutilis siue truncus, sicut vaticiniū habet & vetustissimæ figuræ ad oculum exhibent, quarū nobis ante lustra tria Ferdinandus rex postea Cæsar inclytus, copiam fecit, & iam Typographus noster, antiquitatis, & rerum abditarum studiosissimus, Theodorus Graminæus, antiquo typo, antiquitus excusas transmisit. Itaque & figuræ ordine & iconibus ipsis incognitis, quomodo futurorum seriē explanabit? Vnde nullo labore constat, Pseudomagum illum ex proposito figuras illas siue imagines corrupisse, & contra autoris mentem pro sui animi libidine detorsisse. Attribuit homo ignarus hanc imaginem Sibyllæ, cū tamen Abbatis Ioachim sit, vt prædicta vaticinia testantur. Cū ergo iste Pseudomagus non habeat verum Iconis discrimen, nec sensum inde verum depromere potest, taceo quod & hanc imaginem, sicut & reliquas, in genere ad Pōntifices petulantissimē referat, atq; hinc Pontificum siue cleri, & populi discordiam perperā eliciat. Quod aut caput penes pedes Pontificis & famuli descriptū sit, denotat mortem regis Petri, qui ex vulnere vt dictum est occubuit. Famulus autē ille cum trunco Ioachim Abbatem vel spiritum propheticum significat, qui vt suprā Pontificem alloquitur. Valeat igitur homo impudens, cum suis somnijs.

VATI.

VATICINIVM IIII.



IOACHIM ABBAS.

Oriens bibit de calice iræ Dei.

Omnino ad maximum gradum ascendisti miser, de  
 coelo stellato regnans planeta, descendisti in baratrum  
 vanitatis, primam sponsam viduatam relinquens. Heu,  
 heu imprudens, qui es totus circaturpe nutrimentum  
 Vene



Veneris occupatus: ad terram benedictionis non cogitas: tua in parte negligentia perdurat: cùm hoc audis irremediabiliter luge, erit enim tribulatio, qualis non fuit ab initio, vsque modò: quadrante viues, et subitò in Babylone morieris: vir mortis es, sed aliqua bona sunt in te inuenta. Cede igitur maiori, et meliori te, quia Dominus transtulit à te regnum Dei. In oriente commotio, et post commotionem ignis deuorans vniuerfa.

### PAVLVS SCALIGER.

*Pseudomagus impudentissimus impostor & hic deprauat imaginem, depingit enim Papam inter duos sedentem medium, dextraque tenentem anguem, & vas auro plenum, quod iuueni porrigit egregio: pauperem verò sinistra manu detrudit senem, ac à se repellit. Deinde hanc imaginem collocat octauo loco, cùm quartum sibi iure vendicet, autore ita decernente, & explicante, vt sit Pontifex medius, & ex parte sinistra vidua cui manum humeris apposuit valedicens, ex parte dextera iuuenicula, cui porrigit manu dextra quam draco morsu impetit poculum vini, & non vas auro plenum. Sensus igitur est, quòd Honorium debeat sequi Pontifex sub quo Oriens bibat de calice iræ Dei, id est sub quo Thureus inuadat orientales regiones. Is fuit Nicolaus quartus, natione Picens, patria Asculanus, Hieronymus antea vocatus, Ordinis minorum frater & generalis. Hunc dicit ad maximum gradum ascendisse miserum, id est ad Pontificatum maximum, & de cœlo stellato regnantem planetam, id est ex sancto Seraphico ordine, in quo generalis tãquam planeta regnans præerat minoritis descendisse baratrum*

trum vanitatis, id est seculi huius delicias, pompam, luxum, & curas atque molestias. Primam sponsam viduatam reliquit, id est monasticam vitam deseruit, & imprudens totus se conuertit ad turpe nutrimentum Veneris, id est ad seculi huius fastigium. Quocirca vidua illa Monasticam vitam, iuuenula verò huius seculi culmen & gloriam portendit. Itaque ad terram benedictionis, id est ad cœlestem illam Hierusalem non cogitat, quia negligentia circumseptus detinetur. Ideò hortatur illum vt se audiat & lugeat, quia futurae sunt inquit angustiae & tribulationes inauditae & incredibiles. Erant enim Rhomae variae seditiones sedente Nicolao, variaeque Christianorum dissensiones & dissidia, quib. dissidijs fretus Soldanus, Tripolim Asiae ciuitatem insignem, interfecto Christianorum praesidio, igni ferroque euertit. Parem calamitatem & Sidon & Barutum pertulere. Restabat Ptolemaida (vulgo Acon, cuius Episcopus Ioannes Gritto, hodie suffraganeus Mediolanensis Vestphaliae, id est Monasteriensis, vir apprimè doctus, multarum rerum experientia praeditus, pecunijs pro sua conditione praediues, viget) in annos duos inducias à Soldano consecuta. Hanc vt tueretur Nicolaus Pontifex, milites ad vexillum Christi vocat, ære suo conductos. Hi ad mille & quingenti fuere. Hos postea multi nullo dato nomine, nullis signis & auspicijs secuti, cum Ptolemaidam peruenissent, non minora Christianis, quàm Sarracenis damna intulere. Soldanus autem cum res suas repetisset, nec redditae essent, nostris omnibus exitiū comminatus est. Magna inter Christianos de possessione Ptolemaidae concertatio tum orta erat, cum eam Patriarcha Constantinopolitanus, Templarij Theutonici, rex Cypri, Siciliae rex Carolus vindicare anniterentur. Erat & Pisanis in animo Ptolemaidam repetere (vt ipsi dicebāt) suo iure, quos profectò bellum in Hetruria ortum à tanta rei fœ-

D      ditate



ditate auertit. Gibellini in Guelphos concitati, omnibus pariter exitium minabantur. Quocirca in Aretinos primum arma conuersa sunt, petētib. id exulibus Gibellinis. In agro Tiphernate collata sunt castra castris, commissū praelium, magnāq. de Florentinis Guelphis cedes fieri cepta: verū nō ita multō pōst mutata fortuna, cadentib. in praelio Guilielmo Petramala Aretino Episcopo, et Feltrano comite, ex Gibellinis ad tria millia interfecta, & duo millia capta dicuntur. Oppugnabatur tum & Caieta à Iacobo Aragone. Et ne quid deesset ad perturbādā Christianorū quietem, inter Philippum Franciæ, & Edoardum Angliæ reges grauiſſimum bellum exortum est: quæ res et Christianos in Asia mirificè perturbauit, et hostib. nostris delendi in Asia Christianū nomen audaciam & spem dedit. Soldanus enim qui tum egrotabat, & paulō pōst mortuus est, ad centum et quinquaginta millia hominum, filio duce Ptolemaidam miserat, quā ferro ac flamma euertit. Eodem tēpore mortuo Rudolpho Imp. electus Adolphus Haßus, ab Alberto Rudolphi filio in agro Spirensi praelio interficitur. Nicolaus aut Pontifex tædio animi, quod malè sibi omnia cedere videret, quodq. etiam plus q̃ Pontificem decebat, in partes declinauerat, Rhomæ sui pontificatus anno quarto moritur mēse vno, die octauo. Idcirco inquit Abbas quadrante viues, et subito morieris. Expletis enim quatuor annis, mensem vnū et dies octo nō excessit. vir inquit mortis es: sed aliqua bona inuenta sunt in te. Oēs enim pariter amabat, nec plus se debere affinis & cognatis, quā cuius bono arbitrabatur. Virtutes & vitia faciebant vt in hunc magis, quā in illum inclinaret. Ceterū quia vir mortis erat, ob causas enumeratas, subiicit Abbas, Cede igitur meliori, id est Celestino quinto: quia Dominus transtulit à te regnum dei, id est Pontificatū, siue patrimonium Christi, In Oriente commotio, id est discordie Christiana-

*Christianorū, & post commotionem ignis, id est Soldanus, deuorans vniuersa. Cū ergo Pseudomagus huius vaticinij figuram ad Pontifices omnes, omnesq̃ presbyteros de iuniorib. fœminis &c. multò magis, quàm de vetulis sollicitos detorquet, eosque meretricib. dare pecunias, honestis verò pauperibus & viduis nihil: patrem ac matrem ac honestatem omnem deserere, vt meretricibus adhæreant, nugatur: egregiè more suo delirat, seq̃ & magiæ suæ, & rerum ignorantissimum ostendit.*

VATICINIVM. V.





## IOACHIM ABBAS.

Voce vulpina perdet principatum. Benedictus qui venit in nomine Domini cœlestium omnium contemplator, simplex eductus de terra tenebrosa ascendit, & descendit. nam vox gemina & vulpina ipsius principatum vorabit, et tribulatus peregre morietur. O quantum dolet sponsa de casu legitimi sponsi, ad deuorandum tradita leoni. Cur ô simplex homo sponsam dimittis truculenti canis latratibus tribuendam. Cogita nomen tuum, et prima opera fac, vt recipiaris in partibus orientis.

## PAVLVS SCALIGER.

*Hoc vaticinium Pseudomagus loco tertio ponit, cum tamen autor illud quinto tribuat. Deinde hypocrisim Pontificiam ille hac imagine describit, quasi verbis, Pontifex Deum adoret, corde vulpes existat. Cæterum veritas ita habet. Pontifex qui Nicolaum sequetur, pius & sanctus erit, atque vulpina quorundam persuasionem Pontificatui renunciabit. Talis fuit Cælestinus quintus, Petrus Moroneus antè vocatus, professione Anachorita, patria Esfernienfis, secundo à Sulmone miliario Cœnobium incolens, instante Carolo rege & Latino Cardinali præsentibus ducentis millibus hominum Aquilæ Pontifex creatus: adeò maiorem omnium admirationem, quo ob sanctitatem vitæ à tanto fastigio rerum sponte remotior esse videbatur. Idcirco cœlestium omnium contemplator à Ioachimo vocatur, & in nomine Domini venisse, at simplicem eductum & de terra tenebrosa, id est remotiori ab hominū consuetudine, quia Eremita erat, ascendisse ad Pontificatum, & descendisse, id est Pōtificatu per abdica-*

abdicationē defunctum esse. Nam vox gemina & vulpina ipsius principatum vorauit. Cum enim eandem vitæ normam austeritatemq; Cælestinus, in qua tot ante annos fuerat maceratus, seruaret, & à priore vita ob pontificatum nequaquam declinaret, adeoq; benignus & facilis omnibus petentibus esset, contemptum dignitatis & imminutionem Pontificatus, quidam Cardinales, rati inde orituram, & maximè Benedictus Caietanus Cardinalis Anagninus vir in iure Ciuili & Canonico peritissimus, & vasser, qui primum locum apud pontificem tenebat, ex iure vndique ad suam intentionem selectis decretis persuasit optimo Pontifici, velut cui impositum esset salutis animarum totius orbis onus, vt se Pontificatu abdicaret. Itaque Cælestinus respondit, nil aliud se facturum, quàm quod Deus vellet, quodq; Carolus rex qui renunciationi vehementer aduersabatur, & Cardinales è repub. Christiana esse censerent. Tum verò Cardinales, & in primis Caietanus ille abdicationem Pontificis quærentes, vt id quàm primum agat proposito reip. Christianæ discrimine, quod sua simplicitate imminere omnium ceruicibus ostendebant, affirmantes omnia mala tum accidentia die iudicij sibi imputatum iri. Motus his verbis vir sanctus, & simplex, futurum se in eorum potestate dixit, modo id iure fieri posset. Quare constitutio omnium consensu facta est, licere Pontifici abdicare se magistratu. Quam quidem constitutionem Bonifacius octauus eius successor postea confirmauit quemadmodum lib. 6. decretalium apparet. Tum verò Cælestinus ad priuatam vitam se redigens alterius subrogandi pontificis Cardinalib. ex instituto potestatem dat, Pontificatus sui mense sexto. Atque ita Benedictus Caietanus plurimorum consensu Pontifex creatus, Cælestinum ad Eremum abeuntem, ex itinere ad se retrahit, eundemq; præfecto arcis Fumonis, quæ in Hernicis est custodiendum tradit. Hac ratione motus (vt ipse dicebat) ne autores



seditionum aliquā calamitatem hoc duce, Ecclesie Dei aliquan-  
 do inferrent, licet reuera hominis sanctitatem admirarentur.  
 Vtcunque est, constat hominem ipsum magnæ ingratitudinis &  
 calliditatis fuisse: quippe qui ambitionis causa & virum sanctū  
 deceperit, dum eum magistratu se abdicare compulit, & captum  
 vitam Eremiticam appetētem in arce Fumonis dolore animi an-  
 te tempus mori coegerit, anno vno, mense quinto post initum Pō-  
 tificatum. Sunt qui scribant Cælestinum post mortem adeo mira-  
 culis claruisse, vt plerunq; in Concilijs de eo in sanctos referendo  
 habitamentio sit: fuisseque plerosque, qui eum pro sancto cole-  
 rent, & in catalogo Confessorum recenserent. Eius autem ce-  
 lebritas XIII. Calend. Iulij, qua die moritur, quoque obserua-  
 tur, ex institutione Clementis quinti Auenioni facta. Ita iam  
 patet quibus dolis optimus Pontifex circumuentus fuerit, &  
 vulpina voce principatum amiserit, & quomodo peregrè tri-  
 bulatus mortuus sit, & quanto dolore hanc optimi Pontifi-  
 cis abdicationem multi tulerint, atque sponsus legitimus leo-  
 ni traditus deuorandus fuerit. Hic simplex sponsus  
 sponsam dimisit truculenti canis id est Caietani latrati-  
 bus tribuendā. Cogitauit nomē suum, quod sit cælestium  
 contemplator, & fecit opera prima, Anachoritæ scilicet: quo-  
 circa receptus in partibus Orientis, hoc est catalogo Sancto-  
 rum adscriptus. En quā optimè historia vaticinio Ioachimi con-  
 ueniat, & pseudomagi impostura splendidissima appareat, nemo  
 non videt. Imaginis ergo huius papa flexis genibus coram ex-  
 tensa manu super arborem de cœlo stellato denotat hunc  
 sanctum Pontificem manu Dei benedictum. Vulpes à tergopen-  
 dens ad cucullum, Caietanum Cardinalem: vexillum retro se po-  
 situm & erectum abdicationem Pontificatus, & traditionem  
 vulpi. Hic velim in memoriam reuocari, quod primo vatici-  
 nio de

ABBAT. IOACHIM ET ANSELM.

31

*nio de linea Papa dictum est. Nemo enim non intelligit hunc  
Papam omnium votis sanctissimum fuisse, & somnia Pseudo-  
magi seditiosissima & mendacissima omnibus iam palam inno-  
tescere.*

## VATICINIVM VI.



## IOACHIM ABBAS.

Fraudulenter intraſti, potenter regnaſti, gemēs mo-  
rieris. Ecce homo de Scariotis progenie, occultū prin-  
cipatum



cipatum habens, quo agnus ruit, Neronicè regnās, moriens desolatus. Abbreuiabuntur enim dies illi, quibus totum mundum, tyrannus terribilis, conturbat, gallum ferit, aquilam deplumat. Gallus & aquila, eius superfluam auferent potestatem. Columbarum portans oliuæ, & in petræ foraminibus nidificans. cuius securitas est in angulo testamenti, quid tantum affectas Babylonicum principatum, quem obtinere non poteris? contra iustum assurget, & ipsum vinculis alligabit.

### PAVLVS SCALIGER.

*Pseudomagus huius vaticiniij figuram quarto loco tribuit, cū tamen autor earum, sexto illam ponat. Et quidem rectè. Sextus enim hic est Pōtifex ab Vrsino, prima imagine denotato, cui hoc vaticinium conuenit, videlicet Bonifacius octauus, natione Herenicus, patria Anagninus. Benedictus Caietanus antea vocatus, qui verè ex progenie Iudæ Iscariotis fuit. Nam cū esset Sancti Martini in montib. presbyter Cardinalis, adeò Pontificatus dignitatem exoptauit, vt nil ambitione & fraude prætermiserit quod ad eam consequendam pertinere arbitraretur. Circumuenit enim Cælestinum quintum & persuasit illi abdicationem Pontificatus: sed etiam aiunt hunc Bonifacium subornatores quosdam clanculum immisisse qui noctu demissa quasi cœlitus voce in cubiculum Cælestini hominis simplicis ei persuaderent vt pontificatū dimitteret, si saluus fieri vellet: quem tandem proditoriè captū, vt ex superiore vaticinio patet, miserè detinuit: idcirco retro Pōtificem, mœsti monachi sedentis iconē, representatur: vnde fit vt Ioachimus dixerit hunc Bonifacium occultum principatum habiturum, quo agnus, id est Cælestinus quintus ruit. Neronicè*

nicè regnavit, quia imperatoribus, regibus, principibus, nationibus, populis terrorem potius quàm religionē inijcere conabatur: quique dare regna & auferre, pellere homines ac reducere pro arbitrio animi contendebat: aurum vndique conquistum, plus quàm dici potest sitiens. Moriens desolatus fuit. Sarra namq; Columnensis, à Bonifacio diu multumq; vexatus, Pontificem Anagninæ in domo paterna cepit, captumq; Rhomam perduxit vbi quinto & trigesimo die post dolore animi confectus periit. Propterea prædixit Ioachimus, Fraudulenter intrasti, potenter regnasti, gemens morieris. Atque ita decurtati sunt dies illi, quibus totum mundum tyrannus terribilis conturbavit. Tantæ etenim arrogantia Bonifacius iste fuit, vt omnes ferè cõtemneret: & gratias à Nicolao quarto, & Cælestino quinto reuocauerit. Gibellinos quoque vno odio omnes mirifice persecutus est. Cardinales quosdam, (qui scripserant ad reges, ad principes, ad nationes, de arrogantia Bonifacij, & de ambitione, quòd contra ius fasq; Pontificatus sedem occupasset, reiecto fraudibus Cælestino, eodemq; in carcerem coniecto) vnâ cum tota Columnensium familia, publico decreto schismaticos pronunciauit, beneficijs, dignitatibus, fundis paternis, castellis, oppidis, priuauit: quam priuationem Bonifacius postea in decreti formam retulit, vt libro apparet, quem sextum appellant. Sumptis deinde armis Bonifacius, concitatisq; multis cruce signatis, eos opprimere conatus, Præneste quo, se cum Sarra viro insigni, eorum patruo, cuius paulò antè fecimus mentionē, receperant, obsidione cingit. Dilapsos inde capto ac direpto Præneste Zagarolum & Columnam confugientes persequitur: vnde non ita multò post abire ob multitudinem hostium necesse fuit, à quibus hæc item castella diripiuntur, maximè verò Columnæ paternum solum. Prochetum Archiepiscopum Genuensem, quoque ob nomen factionis



Gibellina Archiepiscopatu priuauerat. Urbem Eugubium, quæ Gibellinorum auspicijs ab Ecclesia defecerat, breui recuperauit. Alberto duci Austria Imperij confirmationem bis, terq; petenti negauit. Tantum preterea, mortuo Iacobo Aragonio, cum Robertus Caroli filius, Calabriae dux, in Siciliam traiecisset, Cathinamque cepisset, repente bellum exortum erat, ut tota ferè Italia tumultuaret; Pontifice nullibi ad pacem conficiendam auctoritatem suam interponente. Tantus quoque subito terræ motus exortus, quantus nūquam antea: quo quidem multis diebus per interualla plurima durante, ædificia passim corruere. Apparuit tum quoq; cometes magnæ alicuius futuræ calamitatis indicium. Philippū regē Francorū ob contumaciā & violatū ius gentiū anathemate percussit, omnesq; Francos iuramento regio absoluit, & habito generali Cōcilio, Philippū eiusq; regnū, Alberto Imperatori subiecit: quem initio Pontificatus sui repulerat. Idcirco dicit Ioa- chim: Gallū ferit. Aquilā deplumat. Gallus & Aquila eius superfluā auferent potestatem. Id quod factū est. Philippus enim superbiam Pontificis domiturus, Sarra Columnensem cum Nogaretio Gallo Rhomam mittit. Sarra seruili habitu Latium ingressus, collectis vndique amicis, Nogaretium cum ducen- tis equitibus Gallis mercede conductis, è militia Caroli Valesij, patrimonij sancti Petri præfecti, Ferētinum præmittit: qui inde sibi si opus esset auxilium ferret. Ipse verò Anagninam clam noctu ingressus adiuantibus Gibellinis, quos Bonifacius diu multumq; vexauerat, Pontificem nil tale metuentem, in domo paterna ca- pit, refractis valuis, captumque Rhomam per ducit, vbi quinto & trigesimo die post dolore animi confectus periit, Pontificatus sui anno octauo, mense nono, die decimo septimo. Atque ita de- curtati sunt dies illi, quibus Gallum infestabat, Aquilam de- plumabat, & potestas illius per Colūnam & Gibellinos ablata.

Itaq;

Itaque alloquitur illum inquit, Columba ramum portans oliuæ, id est fructum patrimonij Petri, & in petre foraminibus, hoc est ditionibus & fundis nidificās, cuius securitas est, in angulo testamenti, id est Anagnia ubi captus est. Quid tantum affectas Bābylonicum id est Rhomanum principatum? quem obtinere id est retinere non poteris? contra iustum id est Clementem quintum insurget, & ipsum vinculis alligabit: captum enim præfecto arcis Fumonis, custodiendum tradidit. Iam ergo planè cōstat imago hæc: Pontificem hunc esse Bonifacium octauum: retro sedentem monachum Cēlestinum quintū captum: Aquilam occidentalem baculo tridente manu dextra premit, id est excommunicatione, bello & insidijs. Gallus ascendit baculum tridentem, id est Sarra Columna: à quo & capitur. Columnenses autem pro symbolo gallum gerunt. Idem etiam de Carolo Valesio Comite Philippi Francorum regis fratre, qui filiam Balduini vltimi Constātinopolitani Imperatoris in vxorem duxerat intelligi potest, (Hic autem Balduinus è Comitibus Flandriæ erat) si Gallum pro Frācis accipias. Huic enim concesserat, vt socero suo liceret imperium ipsum repetere, à quo depulsus fuerat. Errat igitur toto cælo Pseudomagus, qui hic Gallos & anseres introducit, atque illis signis presbyteros minores, communioresque sacrificulos, & vniuersum statum Ecclesiasticum, eorumque fastum, superbiam, abusum, & seductionem, & id genus alia, notari nugatur, cui res gesta, & auctoris vaticinia, & imago ipsa, & magica traditio ex diametro repugnant.

E . VATI



## VATICINIVM VII.



IOACHIM ABBAS.

Viri sonis Inuidiæ orbabuntur.

Hæc est avis nigerrima coruini generis: niger, Nero-  
nis opera dissipans. subitò morietur in terra Perousa.  
Cum videbit fructum pulcherrimum ad vescendum  
suauem, tunc nutriet in gremio, qui sibi mortis initi-  
um ministrabit.

PAV.

## PAVLVS SCALIGER.

*Pseudomagus hanc imaginem quinto loco ponit, cū tamen, autore ita indicante, septimum sibi vendicet. septimus enim ab Ursino Pontifex fuit Benedictus undecimus, natione Italus, patria Tarvisinus, Nicolaus antea vocatus, Cardinalis Hostiensis. Hunc appellat auem nigerrimam coruini generis, quia erat ordinis Dominici. Hic Neronis opera dissipauit, id est cognita regis Philippi causa, hominem Bonifacii censuris irritum absoluit: in gratiam præterea recepit Ioannem & Iacobum Cardinales Columnenses, quos ingenti odio Bonifacius factionis Guelphæ studiosus, plus quàm Pontificem decebat, persecutus fuerat. Subitò mortuus est, in terra Peroufa: mortuus enim est Perusij sui Pont. mense oct. auo, die decimo septimo. Viderat iam fructum pulcherrimum, ad vescendum suauem. Pacata enim Italia, Tartariam, Syriam, & Palestinam Christianos ingressos iuuare decreuerat. Nutriuit in gremio, qui sibi mortis initium ministrauit: id fuit Perusium, eo enim profectus cum Curia fuerat, & eam ciuitatem vnicè amplexus est, in qua mortis initia accepit. Viri sonis iudicij orbabūtur: Italia enim seditionibus vehementer laborabat. Itaq; Benedictus retro coruum habens volantem, Italia est, dissidijs & seditionibus laborans. Arbor suavis ad pascendum est pacata Italia: fructus pulcherrimus est iuuare Christianos Tartariā, Syriā & Palestinam ingressos. Draco quem in gremio nutriuit Perusium est. Hæc clam, quod capite ex cauda eminente significatur, conatus illius morte anteuertit. Fuisse autem hunc Benedictum virum optimum ac sanctissimum declarant miracula à se post mortem edita, sanatis agrotis, pulsisque demonibus e cordibus*



obsessorum. qui ex hac vita migravit Pont. sui mense 8. die 17. Quapropter Pseudomagus egregiè fallitur, cum draconem Caco-  
demonem Papæ interpretatur, ipsumque Papam diabolum, &  
nescio quamnam calamitatem regni Ecclesiastici, & hæresim  
vermem arboreum, extra omne propositum confingit. Caterum  
veritas satis ex rei historia, & autoris vaticinio impleta in Bene-  
dicto vndecimo elucescit.

### VATICINIVM VIII.



## IOACHIM ABBAS.

Mobilis & immobilis fiet, & maria plura vastabit. Vide hîc Babylonice spôsum fugiētem: spôsā suā sibi abominabilē quasi viduatā relinquēs, nomē Iesu dissonū: crudelis, immundus, iniustus, virtute carens, appetēs vanitatem immoderatē, relaxās clauēs, cursor, gladiator, congregans & corrumpens. Lucidissima stella perdet fulgorem, contra solem tenebrosū finaliter pugnatura. Lunam persequitur: in altum corruet, excelsa obscurabit.

## PAVLVS SCALIGER.

*Pseudomagus huius vaticinij imaginem ponit loco sexto, cū illam autor octauo statuat. Octauus enim ab Ursino Pontifex mobilis factus est nimirum Clemens quintus, natione Vasco, Burdegalensis Episcopus, Bertrandus Gottho antea vocatus, Perusij à collegio Cardinalium absens post longam contentionem Pontifex creatus. Hic Lugdunum Cardinales conuocauit, Curiamque Rhomanam in Gallias transtulit, & idcirco à Ioachimo mobilis nuncupatur, & immobilis tandem, quia hæc translatio Curiae, annis septuaginta quatuor in Gallijs mansit firma, quæ multas Dei Ecclesie prauaricationes, multa inuexit Christiano populo detrimenta. Itaque ait Ioachim, Vide hîc Babylonice sponsum fugientem, id est Rhomanum Pontificem, Rhomā discedētem, Rhomā quasi abominabilem & viduam relinquēs. Rhomæ enim templa magna ex parte ob solitudinem & situm corruere, absentibus his, ad quos quidem ea restituere pertinebat.*  
Et quo



Et quoque nomen Iesu prophanauit. quia crudelis, im-  
 mūdos, iniustus, vitijs deditus, vanus, clauē extra suos  
 limites extendens, cursorem & gladiatorem egit, congre-  
 gando & corrumpendo omnia. In coronatione illius Dux Bri-  
 tanniae Dominus maris, ruina muri oppressus mortuus est cum  
 plerisque alijs, dum pompa coronationis, vt fit, per urbem duceba-  
 tur. Huius impulsu Veneti cum Carolo secundo contra Imperato-  
 rem Constantinopolitanum fœdus iniuerunt, vt Lunam perse-  
 querentur, & expeditionem aduersus Sarracenos maturarēt.  
 Henricus Imperator Italiam ingressus est, vnde varia & grauif-  
 sima incommoda Italis illata sunt: cædebantur ciues, necabantur  
 senes, allidebantur infantes, nec vllus crudelitatis modus inerat.  
 Lucidissima stella huius Pōtificis perdidit fulgorem contra  
 solem tenebrosū finaliter pugnatura. Albertum enim  
 Imperatorem Ioannes ex fratre nepos interfecit. Ita Rhoma in  
 altum euecta corruit, & excelsa quæq; obscurata sunt.  
 Quocirca Pontifex equitans & accipitrem manu sinistra ge-  
 rens, & relinquens Ecclesiam post se, fuit Clemens iste quintus  
 deferens Episcopatum Rhomanum, & peregrinum more accipi-  
 tris rapiens: qui moritur Pont. sui anno 8. mense 10. die 15. At  
 Pseudomagus egregius impostor: nescio quid suis nugis hīc com-  
 miniscitur, de potestate Papæ, quasi idcirco, quòd ab Ecclesia sua  
 discesserit, omni iure se exuerit, quasi non nisi Rhomæ Ecclesia  
 Rhomana sicut & imperium Rhomanum administrari possit, aut  
 si aliquis mœnia Rhomanæ ciuitatis non incolat, idcirco nec Ec-  
 clesiam incolere videatur: egregia scilicet consequentia.

VATICINIVM IX.



IOACHIM ABBAS.

Contra Columbam hæc imago turpissima clerico-  
rum pugnabit. De infimo genere ascendet cruenta  
bestia prima & nouissima: quæ filium minimum & in-  
noxium crudeliter deuorabit. Vnus est & pares non in-  
ueniet ad innoxium sanguinem effundendum. Id circo  
tempore suo surget Pseudopropheta & seducet mul-

F tos:



tos: qui per mala sua agnum mitissimum, plagis crudelissimis vulnerabit, ponens os suum in Christum Dominum. offuscabit stellas cœli. Malitia sua sibi opprobrium ministrabit, qui erit solo nomine gratiofus.

### PAVLVS SCALIGER.

*Describitur hic Ioannes vigesimus tertius, Iacobus Caturcensis antea vocatus, Episcopus Portuensis, post longam viginti triū Cardinalium altercationem Lugduni Pontifex creatus, indeque Auenionem cum Curia profectus: qui abdicare se Episcopatu & sacerdotio compulit Hugonem Caturcensem Episcopum, priuatū omnibus Pontificalibus insignibus, annulo, mitra, cappa, pileo, camisiaque Rhomana. Priuatum autem degradatumque (vt istorū vocabulo vtat) ac curiæ seculari traditum omnibus cruciatibus coactum esse vitam cum morte commutare, quod in Pontificem coniurasset. Idcirco cruenta bestia à Ioachimo prædicitur, qui filium minimum & innoxium crudeliter deuorauit: Caturcensis enim & ipse erat. Adeo præterea rebus nouis Pontifex iste studuit vt & simplices Episcopatus bifariā diuideret, ac diuisos in vnum redegerit: & Abbantias in Episcopatus, & Episcopatus in Abbantias vicissim transtulerit. Nouas quoque dignitates, noua Collegia in Ecclesijs constituit, ac constituta prius, in aliam formam transtulit. Instituit & nouum ordinem militum in Lusitania qui Saracenis resisterēt, Beticam, nostris temporibus Granatæ nomen obtinentem, & Aphricam incolentibus, militibusque omnia bona Templariorum annuente rege Portugalliae concessa sunt. Damnavit item illos publico edicto, qui affirmarēt Christum eiusque discipulos nihil priuati habuisse. Præterea hæreticum esse definiuit, si quis assereret, ipsis discipulis, vendendi, donandi, testandi, acquirendi suo pte ingenio ius non competere,*

petere, quòd ad religionem non euntes, in alterius arbitrium trās-  
eant: vnde fit vt domini mancipia non sibi, sed domino acqui-  
rant: vel acquisita prius ex arbitrio & mandato eius pauperibus  
distribuant. Harum autem institutionum literas Apostolicas ad  
Gymnasia publica transmisit, ne amplius scholastici ea de re dispu-  
tare auderent. Damnavit etiam glossulam quādam fratris Petri  
ordinis minorum, qui conuentum quendam tertij ordinis, ad imi-  
tandam Christi paupertatem animauerat, quorum de numero  
multi damnati & exusti fuere. Propterea prædixit Ioachim, hūc  
Pontificem fore imaginem turpiſsimam clericorum, & con-  
tra columbam id est Ecclesiam pugnaturum, & per mala  
sua agnum mitissimum, id est Christum Dominum crude-  
lissimis vulneribus affecturum. Subiicit deinde hūc Papam  
offuscaturum stellas cœli id est Imperatorem & alios principes  
excommunicaturum. Ita Vicecomites interdictis notauit, magis  
in Ludouicum Bauarū, qui titulos sibi imperij vsurpabat, quā  
in Vicecomites inuectus. Tandem videns Pontifex, in Bauaro  
turbandi omnia principū inesse, ei sacra interdicat more solenni,  
vt fieri consuevit: Guidonēq; Petramalam post occupatum Tipher-  
num sacerdotio exautorauit. Nicolaum Estensem Ferrariæ Do-  
minum & Bonacosium Passarinum Mantuæ principem ana-  
themate notauit, Ferrariæque interdixit sacris, donec capta Ar-  
genta redderetur. Misit quoque Ioannem Vrsinum in Italiam  
properè, qui Florentinos & Guelphos omnes in Bauarum confir-  
maret, iam alpes cum magnis excerci tibus transeūtem. Itaque  
Bauarus peruenit Rhomam ibique coronatus Imperator Petrum  
Corbariensem ordinis minorum ex Reatino agro oriundum, Pon-  
tificem statim creat, Ioannis vigesimi tertij æmulum futurum, ho-  
minem quidem humili loco natum sed doctum & ad res geren-  
das aptissimum Habuit hic primò vxorem, qua renuente, & re-



clamante religionem, & habitum S. Francisci suscepit. Creatus itaque Pseudopontifex, ac Nicolaus quintus appellatus, ab Imperatore, & his qui tum cū eo aderāt, vt verus Christi vicarius consalutatur. Creauit is quoque, more aliorum Pontificum Cardinales & Episcopos homines sui ipsius consimiles. Hunc antipapam tandem Bonifacius Pisanus Comes, rem gratam Ioanni Pontifici facturus Auenionem perduxit: vbi in carcerem coniectus, vitam cum morte permutauit. Hinc est vt Ioachim prædixerit tempore huius Pontificis surrecturum Pseudoprophetam, id est antipapā, cuius opera plurimi hæretici & schismatici exorti multos seduxerūt. Itaq; Ioanni XXIII. malitia propria opprobrium ministrauit. Is enim inita cum Ioāne rege Boemiæ amicitia principes Italiæ opprimere studuit. Quibus Robertus rex Siciliæ & Florentini repēte aduersabantur, nullo Guelphorum, aut Gibellinorum discrimine habito. Deinde Mastinus Princeps de La-Scala, Marchio Veronæ, Philippus Gonzaga Mantuæ, Carrienses Patauī, & Estenses Ferrariæ Domini amicitiam & societatem cum Roberto ineunt: Mastinus Scaliger Brixiam ac Bergomum in deditionem accipit, & alij alia aggressi occupant, depopulanturq; , atque passim cæso tum in vrbibus, tum in agris Ecclesiastico præsidio, & regem & Legatum Pontificis omni ope destitutos terga dare compellunt, vt hic Auenionem, ille in Germaniam cum summa ignominia & opprobrio redire coactus sit. Hic Pontifex tandem eodem tempore moritur. Pontific. sui anno 19. mense 4. relicta in thesauris tanta vi auri, quantā nullus ante se Pontifex: quo solo nomine gratus & gratiosus fuit. Iam clarè imaginis expositio apparet. Gladius ex ore Pontificis tyrannidem significat, quam in agnum Christi exercuit: Virga siue flagellum in dextra manu seditiones, & persecutiones: Clauces in sinistra quibus Colūba infidet, excommunicationes & sa-

Et sacrorum interdictiones: monstrum, cuius superior pars hominis, papali corona coronati, inferior verò cauda Draconis est, supplicans Pontifici, ad sinistram sub clauibus positum, designat antipapam illum captum, Et propter caudam humi serpentem, ex humili loco natum. Ergo Et hic Pseudomagus splendidissimi mendacij Et imposturæ conuincitur, hanc imaginem pro sua libidine detorquens, quasi vermis ille astans Papæ, significaret vsus immutationem in Sacramento Cænæ: de quo tamen ne gry quidem hic tractatum est. Deinde non ad omnes, vt Pseudomagus, sed ad hunc solum Ioannem vigesimum tertium hæc imago spectat: sicut Et vaticinium auctoris, Et historiæ veritas testatur.

F 3 VATI.







## IOACHIM ABBAS.

Sex lucidabit Planetas:& vnus finaliter ipsius  
fulgorem excedet.

De sub vrbani montuosis, & validis de terra candi-  
da vir ascendet, actus faciens singulares. Stellas parte lu-  
cidabit, & obscurabit, sed excelsa non auferet, quæ præ-  
dicta bestia offuscauit, sed remanebit agnus grauiter vulne-

vulneratus. Pauca sparget, & multa congregabit, egenus morietur, & propria sepultura carebit. Coruum persequetur. Columba regnabit, totus suus, totus alienus, sponfas multas viduatas relinquens.

## PAVLVS SCALIGER.

*Hoc Vaticinium Benedicto duodecimo conuenit, patria Tolosano, ordinis Cisterciensis, Iacobo antea vocato, sanctæ Priscæ Presbytero Cardinali. Tolosana terra enim est candida, montuosa, & valida, vna scilicet ex ciuitatibus, quæ hodie iura regia reddit. Hic Pontifex sex Planetas illustrauit, id est, sex Cardinales creauit, viros egregios, et instar Planetarum lucentes, non de sua stirpe, sed vndeque ad tantam dignitatem vocatos. Sex præterea principes sua auctoritate decorauit, videlicet Stephanum Columnam, Ioannem Archiepiscopum Mediolanensem, & Luchinum fratres Vicecomites, Mastinum Scaligerum, Philippum Gonzagam, Albertum Carrariensem, Obicionem Estensem. Columna inter hos præcipuè luxit. Reliquas stellas id est principes Passarinos, Fagiolanos, Rubeos &c. obscurauit & maxime in Bauarum censuras à Ioanne factas, vt in usurpatorem imperij confirmauit. At excelsa non abstulit, quæ prædicta bestia offuscavit, sed remansit agnus grauiter vulneratus. i. non recuperauit patrimonium Christi, quod in eodem statu, quo à Ioanne relictum, accepit & reliquit. Pauca in pontificatu egit, ædes saltim pontificias cum turribus et pomietis inchoauit et perfecit: suoque iussu impensaque basilicæ S. Petri templum restituit: quemadmodum in basilica eadem positum Epigramma ad eius statum indicat. Multa congregauit egenus mortuus est: quia multam vim auri non cognatis suis et affinis. sed Ecclesiæ reliquit.*

Pro-



Propria sepultura caruit, quia in Basilica Petri sepultus nō est. Coruum persecutus est, quia tanta fuit constantia, vt dimoueri à recto vel vi, vel precario, vel pollicitationibus nunquam potuerit. Bonos enim diligebat: & vicissim malos, ac sceleratos apertè odio habebat. Ideo columba regnauit, cui sex illi principes paulò antè nominati morem gesserunt. Totus suus fuit, quo ad egestatem, totus alienus, quod ad liberalitatem. Multas sponfas viduatas, id est Ecclesias baudquaquam instauratas, reliquit. Moritur Pont. sui anno 7. mense 3. die 17. Iam patet hæc imago, Pontifex manu dextra trigonum sex stellarum benedicit, id est numero sex Cardinales creat, Aquilam sub trigono stellarum, id est in Imperatorem censuras à Ioanne latas confirmat. Ex Papali, corona à latere regia dependens, denotat Pontificem in Italiam mittere legatum à latere, & Senatui populoq. Romano persuadere, vt Senatoriam dignitatem, quam diu regio nomine gesserant, suis tandem & Ecclesie auspicijs administrarent. Hanc ob rem & Stephano Columnæ Senatoria dignitas in quinquennium prorogata est, & Collegæ annui ei dati sunt. Pudeat ergo Pseudomagum, qui inde mentiri non dubitauit, Papam stellis potestatem sibi in cælos arrogare. Stellas deinde quinque in nubibus collocat, cū in triangulo sex contineantur, Papali benedictione consecratæ. Taceo quòd pro regio diademate imperiale depinxerit, & similia vanissima homo vanus quasi futura quædam præsagia in opprobrium omnium Pontificum, cū non nisi huic Pontifici hæc figura, quem admodum singulæ succedentibus singulis tantum conueniant, falsissimè confingit.

VATI-

## VATICINIVM XI.



## IOACHIM ABBAS.

Stolam suam in sanguine agni dealbabit.

Alta ascendet duplici benedictione præuentus, amator crucifixi, cultor pacis, altus ingenio: verumtamen quæ cogitat nō implebit. alta corruet, infirma sublimabit, ornabit cœlum (nemore succidetur extendens

G

dens



dens manus ad pauperem) viduas dispensabit, & tunc caue sphaera volubilis, & nigra, vt impediaris à vento Aquilonis tribulatione: Cum lilio & cruce te defende.

## PAVLVS SCALIGER.

*Hoc vaticinio describitur Clemens sextus, patria Lemonicensis, Petrus antea vocatus, primò Monachus, deinde Archiepiscopus Rhotomagensis, postremò Pontifex Auenione creatus est. Fuit enim multæ doctrinae vir, compositaq; eloquentiae quod Ioachimus duplicem benedictionem vocat, liberalis in omnes, comis & perhumanus. Caterùm quæ cogitauit non impleuit. Cùm enim intelligeret totam Italiam in tumultu esse, solos Luichinum & Ioannem Vicecomites vicarios Insubriae confirmauit: de reliquis Italiae principibus nulla mentione habita: Existimabat enim solos vicecomites Bauaro resistere posse, in Italiam (vt ipse praedicabat) descensuro, qui vicissim, vt par pari Pontifici redderet, in ditione Ecclesiastica multos vicarios imperiali auctoritate confirmauit. Alta corruit, & euertit atq; infima sublimauit, quia Rhomae creandorū senatorū ex auctoritate Apostolica commutata ratione, Nicolaum Renty, ciuem Rhomanū, publicum scribam, virū quidem erecti ad libertatē, excelsiq; animi, qui occupato armis Capitolio, tantum sibi beneuolentiae, et auctoritatis apud omnes comparauerat, vt facile quò vellet, mentē populi Rhomani flecteret, & quaedam etiam externae prouinciae putarent, per illum Rhomani imperij gloriā renasci, à Carolo Bohemiae rege captum, sibiq; Auenionem missum, et dono datum in vincula coniecit, & Cardinales quosdam Rhomā misit, qui statum vrbs componerent, & Francisco Petrarcha suatore, promiscuè senatores ad tollendam seditionē ex plebe ipsa, crearent,*  
*cūm*

cū non satis constaret in ipsa vrbe Rhoma, qui senatorij quīq;  
plebei ordinis essent, & ignotis parentibus orti. Itaq; declarati  
sunt senatores Petrus Sarra columnensis & Ioannes Vrsi filius.  
Ornauit cœlum, id est Carolum Ioannis Bohemi filiū, ob mul-  
tarum linguarum literarumq; peritiā, in Bauari etiam contu-  
meliā, ab Electoribus in Cæsare designari fecit. Ludouicus Ba-  
uarus tandem de equo cadens in nemore, prope Furstenfeldt, in  
sinu cuiusdam rustici obijt: ideo inquit Ioachim, nemore suc-  
cidetur extendens manus ad pauperem. Viduam di-  
spensauit. Quia Iohannam filiam Andrea, nepotis Roberti  
regis Neapolitani, qui sine stirpe virili moriens, hanc ipsam hæ-  
redem instituerat, et Caroli regis Hungariæ filio vxorem dede-  
rat, quem illa tanquam hominem socordem perosa, per insidias  
interemerat, alteriq; fratruei nupserat Ludouico olim Taren-  
tini principis filio, quem Roberti quoq; fuisse fratrem constabat,  
dispensando absoluit, eundemq; Ludouicum Tarentinum, regem  
Neapolitanū decreuit. Atq; ideo sphæra volubilis, & nigra,  
ipsa scilicet Italia cincta fuit tribulatione. Ludouicus enim  
rex Hungariæ, primi mariti frater tantum scelus vlturus, cum  
paratissimo exercitu in Italiam venit. Vocatur & Carolus Im-  
perator in Italiā à Pisanis ob tyrannidem Vicecomitū, qui etiam  
Bononiam, Anglare, Burgū sancti sepulchri, & id genus alia Ec-  
clesiæ oppida Pontifici ademerant, quare Pontifex cōmotus mis-  
so in Italiam Legato, Florentinos & Mastinū Scaligerū in Vice-  
comitem concitauit. Veritus tandem Imperatorem Pontifex, ne  
Italiam ferro ac flamma vastaret, quemadmodū se facturū, Im-  
perator minabatur, ad pacē componendam animū induxit. pacē  
quoq; & fœdus componere inter Philippū regem Franciæ, cuius  
auxilijs aduersarijs resisteret, & Eduardū Angliæ annexus est.  
Atq; hoc est quod dicit Ioachim, cū lilio & cruce te defende.



Itaque stolam suam in sanguine agni dealbavit: id est Caroli regis Hungariæ filij, à Iohanna interempti. Cumq; foris prodesse Christianis non posset; domi Ecclesiastico senatui consuluit, & boni tandem pastoris officio functus est. moritur anno 1352. Pont. sui anno 10. mense 7. die 28. Proinde hæc figura habet crucem & lilium quo se defendere nitebatur. Caput agni ad pedem Pontificis, interreptum Caroli regis Hungariæ filium, in cuius nece cum Iohanna dispensavit, deuastationem Christianitatis, designat, quum Christianis prodesse non potuit: Gallus ad pedem coronatus, Senatorem Columnensem (symbolum enim Columnensium Gallus est) regia potestate fulgentem, quem Romanis suo nomine præfecit. Serpens est vicecomes (insigne est serpens Vicecomitum) sinistram Pontificis clauis tenentem mordens, id est bona Ecclesiæ inuadens. Insanit ergo Pseudomagus, qui nescio quid de cohortatione ad pœnitentiam Pontificum hanc imaginem agere nugatur, errans etiam in ipsa imagine, nam pro cingulo Monachali, saccum refertum diuitijs, contra mentem auctoris, et pro cruce cum lilio fractum baculum crucis depinxit, vt vel hac ratione satis constet hunc nullam veræ magiæ notitiam habuisse, sed omnia mera libidine conspurcasse.

VATI.

VATICINIVM XII.



IOACHIM ABBAS.

Lupus habitabit cum agno, pariterq; cibabit.

Ad honores ascendet duplex homo iste, veniens de centro nubilofo, concordans discordantes, lunam reuoluens, nouaculam in manu gestans ad superflua refecanda: carnes comedet affas, & vinum bibet myrrha-

G 3 tum



tum, pauper ingrediens, alta considerans, in infimis condescendens.

## PAVLVS SCALIGER.

*Hoc vaticinio significatur Innocentius sextus, patria Lemonicensis, Stephanus antea vocatus, pontificij civilisque iuris consultissimus: Idcirco appellat illum Ioachim hominem duplicem, venientem de centro nubilofo, id est munere & officio procuratorio ad Episcopatū Claremontanum, deinde Cardinalatū, tandem Pontificatum: concordantē, dilectantes, nam tumultuantem ciuitatem Rhomanam in creandis senatoribus, Innocentius optimē sedauit, externo senatore ad urbē misso, Raymundo Ptolemaeo ciue Senensi, qui annum integrū magistratum gessit. Hic Innocentius Lunam reuoluit. Vir enim erat integerrimæ vitæ, magnæq; constantiæ & seueritatis, qui beneficia Ecclesiastica non nisi probatissimis sacerdotibus, tum vita, tum doctrina dedit. Nouaculā in manu gestans superflua resecuit, quia multas reservationes à Clemente factas suspendit, constituitq; statim, vt omnes Prælati, omnesq; qui beneficia habebant, ad Ecclesias suas sub anathematis pœna proficiscerentur. Dicebat enim oues pascuas, à proprio pastore, nō à mercenario custodiri debere. Impensam quoq; domesticā, quæ magna erat imminuit, familiam suam ad certum & honestū redigens numerum, nec domi voluit nisi viros probatissimos. Idem vt facerent Cardinales acerrimo edicto mandauit, dictitans suam, ac omnium Ecclesiasticorum vitam, ceteris exemplo esse debere, ad imitationem saluatoris nostri, cuius tota vita, ad institutionem humani generis respiciebat. Præterea verò sacri palatij auditoribus salaria instituit, ne muneribus corrumpi in decernendis litibus ob inopiam*

piam possent. Dicebat enim, famelicos non facile, etiam ab alieno cibo abstinere, si sit oblata quouis modo edendi facultas. In victu parcus est habitus, ideo carnes comedit assas, & vinum bibit myrrhatum, id est dilutum, quo ille instar lachrymæ ex myrrhæ cortice inciso defluentis, quo mortuorum cadavera incorrupta conseruantur animo incorrupto existeret. Atque ita pauper ingrediens, alta considerauit, & Lupus habitans cum agno, simul nutritus est. Sicut enim ad virtutes cohortator exemplo suo fuit, & in victu parcus est habitus, ita in sumptu bellico largissimus dum bello repetijt, quæ superioribus temporibus Ecclesiæ erepta fuerant. Aegidium namque Hispanum è gente Carilla Cardinalem Sabinum virum insignem è latere suo in Italiam misit, qui bello hostes Ecclesiæ persequeretur, ditionemque Ecclesiasticam tutiorem redderet, eo maxime tempore, quo Imperator Constantinopolitanus, Aragonum rex, & Veneti contra Genuenses inter se fœdera iniere. Nec Rhomæ certè minor perturbatio, quam Constantinopoli tum fuit. Franciscus enim Barocellus Romanus ciuis admodum potens, pulsus è Senatoria dignitate, Ioanne Ursino, & Petro Columnensi, tribunitiam dignitatem sibi usurpat cum his titulis, Franciscus Baroncellus scriba senatus, Dei gratia almæ vrbis Tribunus secundus, ac Romanus Consul. Tum verò Innocentius Pontifex re cognita ad comprimendam hominis audaciam, Nicolaum Renty, qui eodem modo dominatum appetierat, è carcere Auenionensi ductum, Rhomam mittit ad Tribunatum repetendum. Is itaque urbem ingressus adiuvante nobilitate, ac magna plebis parte, Baroncellum è Capitolio deiectum interficit, ac solus tribunatu potitur. Abeunte tandem Carolo Imperatore in Germaniam, Aegidius Legatus omnia ferè oppida breui recepit, quæ aduersary, instigante Ludouico Bauaro in Flaminia, quam Rhomandiolam vocamus, in

Marchia



*Marchia Anconitana in patrimonio S. Petri occupauerāt. Cū autem AEgidius Italiā pacasset, arcesq; in ditione Ecclesiastica plures ac per necessarias edificasset, omnesq; Italos principes ac populum ad officium rede-gisset, ad annum quintum legationis suae successorem habuit, Arduinum Burgundum Abbatem Cisterciensem, hominem rebus agendis nequaquam idoneū. Hanc ob rem abeunte AEgidio, omnes Italiae principes ac populi arma capiunt. Abbas Cluniacensis Bononiam Bernaboui Vicecomiti proditione Aulegiani accipit, et tam Bononiam quā Rhegium aduersus Bernabouem bello prementem acriter defendit, & accitis in societatem belli Cane Scaligero, Philippino Gonzaga, Nicolao Estensi, in Brixianos mouit. Tum Bernabos Brixianorum periculo motus, relicta Bononia ac Rhegio, in hostem proficiscens, apud Montem clarum tanto praelio superatur, vt aegrè deinceps vr-bis mœnia tutatus sit. Eodem ferè tempore Florentini Galeatho Malatesta duce Pisanos superant. Verū composita à Pontifice inter Pisanos & Florentinos pace, Ioannes Haucut Pisanorū stipendys militare solitus, milites omnes passim per omnem Italiam sparsos colligens, magnum omnibus terrorem iniecit, tumultuante potissimum ciuitate Rhomana in creandis senatoribus, quam discordiam Innocentius optimè sedauit, vt suprā dictum est. Non quievere autem compositis etiam hoc modorebus Rhomani. Nam pulso Senatore, septem ciues creant cum summa potestate, quos reformatores totius Reipublicae vocarunt. Hanc ob rem Innocentius Hugonem Lusignaneū, Cypri regem, ad bellum, quod in Thurcos gerebatur, proficiscentem, senatorem creauit, mandauitq; vt magistratum reformato-rum omnino aboleret. Erat autem tum maximè intentus abolen-do bello, quod inter Anglos, & Gallos gerebatur, quo omnibus proficisci in Thurcum liceret. Verū cū Angli in Pitiriensi a-gro Gal.*

gro Gallos superassent, cepissentq̄ regem cum Philippo filio, rem difficiliorem factu fecisse videbantur. Cùm Eduardus magnitudine animi motus, captiuos omnes hac conditione liberat, ne amplius contra se bella gerant: qui non ita multò pòst pacis fœdera rumpentes, Eduardum capere arma, & obsidere Parisios impellunt. Parare & classẽ contra hostes Christiani nominis Innocentius constituerat, cùm & Pisani qui rem nauticam optimè norant, cum Florentinis, & Veneti qui classe plurimum valebant, cum Lodouico Hungariæ rege bella tum gererent. Taruisium enim rex magnis copijs tum obsidebat: nec seditionibus intestinis Veneti carebant. Nam Marinus dux affectatæ tyrannidis conuictus securi percutitur. In tantis verò animi perturbationibus afflictatus Innocentius pontificatus sui anno nono, mense octauo, die sexto moritur. Idcirco inquit Ioachim, Alta considerans, in infimis condescendens. Itaque depingitur Innocentius sinistra manu clauẽ tenens, dextra nouaculam, qua Ecclesiam repurgare conabatur. Est etiam indutus vestibus sacratis, stans in corona, vt intelligamus illum integerrimæ vitæ, magnæq̄ constantiæ & seueritatis virum. quocirca & gladium ad sinistrum latus habet: sed illum primis pedibus lupo obtinente: id quod ex suprà dictis, maximè ex Aegidij, Nicolai, Arduini, & tot intestinis seditionibus liquidò constat. Valeat ergo Pseudomagus cum suis scorpionistis rusticis, & hæreticis presbyteris, quos omnes homo hæreticissimus per Lupum figurari somniat, & alijs id genus nugis.



## VATICINIVM XIII.



IOACHIM ABBAS.

Iste solus clarè aperiet librum scriptum  
digito Dei.

Ad alta vocaris ô Princeps mente canus. quid ago-  
nizas? surge, & esto robustus: interfice Neronem, &  
eris securus: sana vulneratos, accipe flabellum, interfi-  
ce muscas, eijce de templo vendentes, doctrinâ illumi-  
na-

natam assume, annuncia iustum, vita circumcisos: dirige columbam, reprime sitibundos.

## PAVLVS SCALIGER.

*Describitur hic Urbanus quintus, patria Lemonicensis, Guilielmus Grisant antea vocatus, S. Victoris Massiliensis Abbas, absens etiam omnium consensu ad alta vocatur, id est Pontifex creatur. Iste, inquit Ioachim, solus clarè aperiet librum scriptum digito Dei: erat enim vir singularis virtutis, ingentis animi, innocentissimæq; vitæ. Hunc alloquitur Ioachim inquires, O Princeps mente canus quid agonizas? surge, & esto robustus. Statim proinde, ut pontificatum, vocatus Auenionē, inijt, ad tuendam libertatem Ecclesiasticam animum adiecit, eorumq; opera vsus est, qui ad eam rem animati erant. Itaq; Aegidium Cardinalem Hispanū, virum præstantem, cuius antea meminimus, in Italiā cum summa potestate misit, qui ita Canem Scaligerum, Ludouicum Gonzagam, Nicolaū Estensem, Franciscū Carrariū initis fœderibus in Bernabouem, quem Ioachim Neronem appellat, concitauit, ut prælio ab his superatus, & saucius ægrè aufugerit, amisso in bello filio: captisq; Andrea Pepulo Bononiensi exule, Synebaldo Ordelapho, Paulo Mirandula, Guidone Foliano, Azone Corrigiensi, Guilielmo Caualcaboue e gregijs copiarum suarum ducibus. Atque hoc illud est, quod Ioachim ait, Interfice Neronem, & eris securus. Vicecomites enim omnis seditionis et cōtentionis in Italia autores erant, quibus repressis sanauit vulneratos. Et si enim promoti calamitate Vicecomitū, Franciæ, Angliæ, ac Cypri reges misere ad Aegidiū, ut vicecomitib. pacē redderet, neq; discesserint re infecta legati, reddita namq; pax erat: ea tamē diuturna nō fuit. Ioannes enim Haucut vicecomitib. militans, cū Florētinos bello lacerasset, eorū*



*copias apud Miniata oppidum grauitè profligauit. Hanc ob rem Aegidius Legatus Thomam Obicionem egregium copiarum ducem, cum tribus millibus equitum, & satis magno peditatu Florentinis auxilio mittit. Pugnatum est inter Aretium & Cortonam dubio Marte quatuor horis: atque demum Thomas ita hostes superat adnitente peditatu, vt ex sex millibus equitum, qui cum Anglico militabāt, pauci euaserint, atque ipse dux in deditiōem venerit. Huius autem tantæ victoriæ fama permoti qui ab Ecclesia defecerāt statim deditiōem fecere. Rectè igitur prædixit Ioachim, hunc Pontificem accepturū flabellum & interfecturū muscas eiecturūq; de templo vendentes. Flabellum est industria Aegidij, muscæ sunt copiae Vicecomitum: vendentes & repressi sitibundi in templo sunt, qui ab Ecclesia defecerant. His ita feliciter peractis Urbanus ad quartum sui Pontificatus annum in Italiam venit componendarum rerum causa, doctrinam illuminatam assumens, annuncians iustum, & vitam circumcisos, id est pietate, iustitia & sanctis moribus Columbam, id est Ecclesiam instaurauit. Cum porrò Carolus Imperator intellexisset Urbanum Rhomam profectum, eò & ipse quoque cum uxore & liberis statim aduolauit. moritur Urbanus Pontificatus sui anno octauo, mense quarto. Itaque imaginis dextra manus clauis continens auxiliante illi angelo, significat, ope diuina Ecclesiam instauratam esse. Stellis quinque cælitus demissis, ipsaq; manu inde prominente, supra flabellum vel flagellum, significatur industria & confederatione, Aegidij Cardinalis, Canis Scaligerij, cognomento Signorij siue Facini, Ludouici Gonzagæ ac Nicolai Estensis, & Francisci Carrarij, in aduersarios & rebelles animaduersum esse. Aquila denotat Carolū ad Pontificem in Italiam profectum, Pontificem salutasse. Os enim Aquila apertum habet, quasi Pontifici loquatur: apertum  
etiam*

etiam est, quia deuorauit Lucam, adimens illam Pisanis, & Miniate oppidum Florentinis, sibiq; vendicans: & accepit à Florentinis ingentem pecuniam, ne eos bello vexaret. Falsò igitur Pseudomagus somniat à pontificibus recessuram clauium potestatem, & pontifices proprijs virgis pœnas luituros, neuè collidantur Paonem illis, per quem ille Austriacos intelligit, opitulaturum. Licet Austriaci semper Ecclesiæ fuerint deuotissimi: nō tamen Paonem, sed aquilam imago continet: id quod & historiæ veritas declarat. Hæc omnia ad solum Vrbanum quintum referuntur, iam dudum impleta.

H 3

VATI-







IOACHIM ABBAS.

Flores rubei, aquam adoriferam distillabunt.

Obscuratum est aurum, mutatus est color optimus,  
rubigo te consumet, dulce principium inuenisti, sed  
finem tribulatum. Væ primum abijt, & ecce væ secun-  
dum. Fugiamus à facie eius. Clama in fortitudine, quia  
iam incipiunt, vltimi cruciatus. Ha ha vbi est Lucifer?  
quo

quo abierunt stellæ? curramus & non respiciamus retro, quia ab Aquilone pandetur omne malum.

PAVLVS SCALIGER.

Describitur hic ad oculum Gregorius vndecimus, patria Lemonicensis, Petrus Belfortis antea vocatus Clementis sexti nepos, sanctæ Mariæ nouæ Diaconus Cardinalis, Auenione Pontifex omnium consensu creatus, qui fuit tantæ innocentiae, & placabilitatis, adeoq; humanus & pius, vt ab omnib. vnicè diligeretur. Hic Pontificatu inito statim Legatū in Italiam misit, vt res Ecclesiasticas recenseret: qui cum in Italiam venisset, & res Ecclesiasticas recenseret, inita cum vicecomitibus pace, siquidē omnia in perturbatione fuere. Erant enim inimici omnes ipsis Venetis, exceptis vicecomitibus: quæ res initium fuit perturbandi omnia. Ideò inquit Ioachim, obscuratum est aurum, id est Urbani quinti instauratio neglecta: mutatus color optimus, id est status Italiæ per Urbanum compositus: dulce quidem principium inuenit, scilicet pacata omnia, sed tribulatum finem, quia in seditionibus fato concessit, rubigine consumptus, id est intolerabili vesicæ dolore mortuus. Rubigo enim est vitium metalli, & propriè id, quod in ferro contrahi videmus, aridum & rubrum metallū paulatim erodens: Ita in renibus vel vesica quoq; generatur simile quid siue calculus, siue arena, meatum vrinæ prohibens, asperissimumq; gignens cruciatum. Væ primum abiit, quod sub Ludouico Bauaro Imp. excitatum erat: & ecce væ secundū, quod auspicijs Vicecomitum paratū fuit. Plurimæ enim ciuitates se in libertatē vindicabant, & primi Tiphernates (quos Castellanos vocāt) ab Ecclesia desciuere: hos deinceps Perusini, Tudertini, Spoletini, Eugubini, Viterbienses, Foro-



Foroliuenses, Asculani secuti sunt. Idcirco ait Ioachim fugiamus à facie eius: Clama in fortitudine. Clamauerunt sanè in fortitudine aduersarij Ecclesiæ. Occupauerat tum etiam Astorgius Manfredus, sub Bauaro tyrannidis dulcedine gustata, Granariolum agri Fauentini castellum: ad quem opprimendum è Bononia Legatus Ioannem Haucut, cum aliquot cohortibus mittit. Tutati sunt Astorgium Florentini & Bononienses: qui excluso Haucut cum omni præsidio in libertatem se vindicauerunt. Haucut verò cernens Fauentinos ad rebellionem spectare, & ciuitatem crudeliter diripuit cæsis passim omnibus, quos obuios miles habuit, & solum vrbis viginti millibus nummum auri, Nicolao & Alberto Estensibus fratribus vendidit, occupato Bagnacauallo: vbi impedimenta exercitus sui ad tempus reposuit. Hinc est quod dicit Ioachim, iam incipiunt vltimi cruciatus. Ha ha vbi est Lucifer? scilicet obedientia Ecclesiastica, quæ instar Luciferi, tot seculis luxit: quò abierunt stellæ? videlicet principes potestati Ecclesiasticæ subiecti. Curramus & non aspiciamus retro, quia ab Aquilone pandetur omne malum. Pontifex enim cognita rerum permutatione, Cardinalem Gebennensem Legatū cum sex millibus equitū Britonum in Italiam mittit, qui per Taurinos descendentes sine vlllo maleficio, vsque ad Bononiæ portas peruenere, urbem obsessuri. Sed Legatus cognito Florentinorum aduentu, qui Rudolpho Varaneo duce Bononiensibus suppetias ferebant, cum copijs suis Cesennam hyematum concessit: in qua vrbe ita tumultuatum est ob superbiam Gallorum, vt sexcenti Britones interfecti sint, reliqui vrbe eiekti. Qui postea per arcem ingressi, aucti numero, audibus & rapinis omnia compleuere: neque his quidem parcentes quorum ætas suppliciter veniam petit: solæ virgines & iuniores matronæ ad iniuriam reseruatae sunt. Foroliuenses autem veriti  
ne à

ne à legato inopia consilij & Gubernatoris opprimerentur, Syne-  
baldum, Pynum, Ioannem, Theobaldum, Ordelaphos dominos in  
urbem recipiunt, quorum virtute ab impetu Britonum defensi  
constantissimè sunt. Existimans autem Gregorius Pontifex, hæc  
omnia mala, quæ in Italia committebantur, sua absentia fieri,  
nausfragiumque tam diuturnum absente gubernatore committi,  
de profectione sua, ad Italiam vir bonus diu multumque cogitare  
cepit: sed hominè per maximè mouere cuiusdam Episcopi verba,  
qui interrogatus à Pontifice, dum simul inambularent, cur non  
rediret ad Ecclesiam suam, quam haud par erat, tam diu sine pa-  
store nudam relinqui, Cur, inquit, tu summe Pontifex cæteris ex-  
emplū daturus tuum Episcopatum non repetis, Ecclesiamq; Rho-  
manā? Motus his verbis Pontifex, paratisq; in Rhodano 21. trire-  
mibus, alio se iturū simulans, ne à Gallis retineretur, si se profes-  
surum ad urbem intellexissent: ipsam namq; curiā emolumentis  
caussa in Gallia volebant. Genuā itaque primò, inde Cornetū: vn-  
de terrestri itinere nauigationē pertæsus hyeme præsertim, Rho-  
mam peruenit anno Domini 1376. Idibus Ianuarijs, Pont. sui 7.  
migrationis verò Rhomanæ Curie in Gallias anno septuagesimo  
quarto. Quo autem apparatu, quaque incredibili populi Rhomani  
letitia susceptus in urbem sit, honorato quoq; obuiam prodeunte,  
non attinet dicere, Cū vultu, gestu, acclamationibus, omnem  
letitiæ speciem effuderint, vt filij solent, redeunte peregrè exopta-  
to parente. Indigebant omnia aduentu Pōtificis. Nam & mœnia  
& Basilicæ, & publica, ac priuata ædificia vbique ruinam mina-  
bantur, quæ certè magna ex parte restituit, vt turris suo iussu æ-  
dificata ad sanctam Mariam maiorem indicat. Labefacti etiam  
ita ciuitatis mores erant, vt nihil vrbauitatis habere videretur:  
vtq; illi mores aliundè petendi essent, quæ totum orbem terrarū  
quondam ad vrbauitatem redegerat. Collocata itaque in vrbe



sede sua, Pōtifex, vt bonum pastorem decet, omnia circumspicere cœpit, de medelaq̃ vulneribus inferenda cogitare, vt illud Ioachimī impleretur, Flores rubei ex cruento scilicet sanguine nati, aquam adoriferam distillabunt. Pax igitur qua sanari nondum obducta vulnera poterant, sibi diu multumq̃ cogitanti oblata est. Legatum itaque primò ad Florentinos mittit, qui ad arma spectabant, eosq̃ adhortatur, vt aquas pacis conditiones non detrectent. Hi verò Pontificis potentiam suspectā habentes, ne ad pacem cogerentur, cum Bernaboue hoste, paterno, auitoq̃, fœdus & amicitia ineunt. Postea verò Ioannem Haucut pecunia, & pollicitationibus corruptum, ab Ecclesia in partes suas trahunt, quo successu elati, nullum iniuriæ contumeliæq̃ genus prætermittunt, quod in Pontificem transferri posset: quæ ex re anathemate notati, hac insolentia vsi sunt, vt etiam sacerdotes suos, quibus à sacris interdictum erat, celebrare contra ius fasq̃ cœgerint. Tum verò Pontifex à precibus ad arma conuersus, conciliatis prius Bononiensibus, qui suo nomine urbem gubernarent, Varraneum mercede conducit: hac in re Florentinorum artibus vsus: eiq̃ exercitū Ecclesiæ committit, paulò post, in Florentinos moturo. Id ne vt destinauerat statim faceret, discordia inter Genuenses & Venetos orta effecit. Veritus enim est, ne aliqua externa vis Italiam inuaderet, si ipse quoque cum Florentinis decertaret. Nam dum Andronicus Genuensium auxilio fretus, quibus Tenedon Insulam mercedem facinoris permiserat, patrem Caroli Ioannem Constantinopolitanum Imperatorem regno deturbasset, Veneti eundem in patriam reduxerunt, ac Tenedon Insulam ab eo accepere. Quæ ex re indignati Genuenses in aliud tempus vindictam distulere, veriti Pontificis anathema, qui vtriq̃ populo interminabatur, nisi ab armis discederent, cum diceret neutri eorum bellum illud competere. Sed dum vir san-

ctus

Etus accuratè agit omnia, quæ ad Pōtificem pertinent, intolerabili vesicæ dolore, ut dictum est, moritur anno Pont. sui 8. mense 5. anno Domini 1378. quinto Calend. April. tantoq̃ omnium cum gemitu & lachrymis sepelitur, quāto nunquā antea quisq̃ sepultus est. parente enim & unico genitore priuati omnes videbātur: lugebantq̃; non modò præsentem, verum etiam futuram calamitatem, in quam sublato optimo Pontifice ob patrum discordiam incidere. Iam imaginis sensus facilè patet. Papa enim baculum peregrinationis manu dextra gerens, significat, illū terrestri itinere Rhomam tanquam peregre exoptatum parentem redisse. Miles gladium in Pontificem vibrans & læcæ à latere, cladē Cesennatem significāt, qua sexcēti Britones, ex parte Pōtificis inrerfecti sunt. Prohibuit autem manus Dei, sua diuina prouidentia, partim per Pōtificias censuras, partim per stellas, id est Principes Pontifici morem gerentes, ne planè copiae Pontificis funderentur, & potestas illius euerteretur, quin potius ille resumptis viribus in aduersarios atrocissimè intenderetur: significāt quoq; defectionem Haucut ad Florentinos & iniurias atq; contumelias à Florentinis Pontifici illatas, qui etiā anathemate notati, contra ius fasq; sacerdotes, quibus à sacris interdictum erat, celebrare compulerunt. Gladius à sinistris Pontificis, cuius capulus ad pedes ipsius est, designat Pontificem à precibus ad arma conuersum, sicut ex prædictis apparet. Valeat proinde & hic Pseudomagus in postor cum suis ementitis vêturis punitio- nibus, quæ tamen prophetia ad hunc solum Gregorium Pontificē spectabat, in eoq; impleta est. Quàm deinde benè Pseudomagus sua magia vtatur, vel imago illius patefacit, quæ duos gladios penes Pontificem depictos continet, cū saltem vnus esse debeat, vnius, non duorum Pontificum.



## VATICINIVM XV.



IOACHIM ABBAS.

**Terribilis es, & quis resistet tibi?**

Hæc est fera vltima aspectu terribilis, quæ detrahet stellas: tunc fugiant aues, & reptilia tantummodo remanebunt, fera crudelis, vniuersa consumens, infernus te expectat. Terribilis es, & quis tibi resistet?

PAV-

## PAVLVS SCALIGER.

Notatur hoc vaticinio Urbanus sextus, patria Neapolitanus, antea Bartholomæus Barenfis Episcopus dictus, homo planè ineptus, rusticus, inexorabilis, callidus, et iniuriarum memor, ac vindex, malebat videri & metui potius, quàm diligi. Hic Pontificatu accepto, non pacem inter Christianos componere, sed magis Cardinalium, & Ioannæ reginæ iniurias vlcisci pro viribus conatus est: propter quod Florentinos anathemate notatos, ut in suam deduceret sententiam, absoluit. Natura prorsus inquietus erat: quocirca apud Nuceriam Cardinales creans, quosdam ex antiquis in carcerem coniecit, homo infelicissimus. Hic Pontifex fera aspectu terribilis, & vltima Ioachimo appellatur: in hoc Pontif. enim de statu summorum Pontificum prophetia illius finit. Aspectu autem terribilis, hic Pontifex non iniuria dicitur, cum nihil boni in Pontificatu suo, sed omnia mala egerit, feraq; crudelis, vniuersa consumens, omnibus metuenda fuerit. Habuit Antipapam Gebennensem Cardinalem, natione Gallum, cui Clementi septimo indita appellatio fuit, fauentibus Ioanna regina, & octo Cardinalibus: vnde magna discordia in Ecclesia Dei orta, & diuturna, videlicet 39. annorum quam schisma vocant, cū pars Christianorum principum Urbano, pars Gebennensi faueret. Neque hoc modo contenti seditiosi Cardinales Britones, qui multa Ecclesiæ Castella, multas vrbis villas iam diripuerant, arcesq; occupauerant, in Pontificem & Rhomanos mittunt. Ad pontem Salarum Rhomanus populus hosti in composito agmine obuiam factus, superatur, & ceditur. Verum cum postea apud Marinum pugnam magna animorū concitatione inisset, adeo Britones cadunt, ut vix nuncius tantæ cladis superfuerit. Qui in arcibus erant, se aliquandiu ac suos tutati sunt, maximè verò



arcis Surianæ præfectus, qui post multos annos Martino Pontifici deditionem fecit. Interim Genuenses odium quod in Venetos mente conceperant, ostendunt ascito in societatem belli Ludouico Hungariæ rege, Austriæ duce, Patriarcha Aquilegiensi, et Francisco Carrario: Cum à partibus Venetis rex Cypri Perinus Lusignaneus, et Vicecomes Bernabos essent, et utrinque dubio Marte acriter pugnatur, mari, terra, omnia depopulatur, ferro ignique absumuntur, quo tempore etiam Bombardicus usus, à sono et tonitru sic dictus, innotuit: multæ utrinque cædes inuicem acceptæ datæque sunt. Accessit tum Venetis et Calocoannes Græcorum Imperator, & Peram Genuensium, Constantinopoli vicinam oppugnare aggressus est. Videbat enim Genuenses pluribus bellis, & quidam grauissimis implicitos. Sed Andronicus eius filius patri ac Veneto æquæ hostis, Thurcorum, Bulgarorumque præsidij & societate fretus, eam acerrimè defendit: eoque terroris patrem deduxit, ut in partes Genuensium statim transfiret. Urbanus verò non intentus componendæ paci inter Christianos, ut par erat, sed iniurias à Iohanna regina acceptas vlcisci cupiens, Ludovicum Vngariæ regem impulit, ut Andreasque fratris mortem se adiuvante vlcisceretur: qui Carolum filium in Tarvisinis contra Venetos dimicantem in Iohannam concitans, res Venetorum propè afflictas meliusculas fecit. Itaque Carolus ex Hungaria contra Iohannam accitus cum octo millibus equitum in Italiam venit, Aretium primò in potestatem suam redegit, Guelphorum & Gibellinorum seditionibus diu agitatū. Florentini veriti ne sustinere tanti regis impetum non possent, pacem à rege, datis quadraginta millibus nummum auri redimunt. Carolus salutato Rhomæ Urbano regnum ingressus, superatis etiam Iohannæ ducibus Neapolim deditionibus ciuibus, capit. Dum hæc ad Neapolim, & Aretium agerentur, noua belli nubes Italiam inumbravit. Nam Ludouicus Andegauensis, à regibus Fran-

corum

corum originē ducens, Italiam ingressus cū triginta millibus equitum, nō longē à Bononia confederat, à Clemente antipapa impulsus: non tam vt reginā Iohānam obsessam liberaret, quā vt Urbanū armis Pontificatu deijceret: Ludouicus per Marsos iter faciēs, ad Cassiensem saltū iam peruenerat. Adhuc enim ad 12. milia equitū expectabat, qui Italiā ingressi, duce Andegranio, per Placentinū, Lucensem, Florentinū, Senensem agrū iter facientes, Aretiū iam peruenerāt, urbemq; à Guelphis introducti, post illatā ab Albrico cladē, diripuere. Interea Ludouicus Andegauiensis moritur. Quocirca Andegranius in Gallias redijt, ipsiq; milites bini terniue mendicantes etiā in patriam se contulerunt. Tū verò Urbanus terrore Gallico liberatus, Neapolim se conferens, à rege petit, vt sibi liceat creare nepotem suū Campanum principem: quod cū impetrare nequiuisset, homo sub specie iusti et honesti minus Urbanus, ac nulli gratus, ad minas cōuersus, eò iracundiae regē compulit, vt custodijs adhibitis, per aliquod dies prodire in publicū nequiuert. Verū dissimulata ad tempus iniuria, Nuceriam ad vitandos aestus (vt ipse dicebat) cum bona regis venia profectus: Communitaq; firmis praesidijs vrbe, et novos Cardinales creat, & septem ex veteribus in carcerem conijcit: quod diceret eos cum rege & antipapa contra se coniurasse. Propterea inquit Ioachim, hunc esse feram terribilem quē detrahet stellas. Præterea verò & processum (vt istorum more loquar) contra regem inchoauit, missa de more citatione: qui breui se venturum Nuceriam respondit, diluiturumq; obiecta crimina, non verbis modò, verū etiam armis. Nuceriam itaque cum satis magno exercitu veniens, urbem obsidet. Motus autem hac indignitate Raymundus Balcianus è gente Ursina, Comitum Nicolani filius, qui postea Tarentinus princeps est habitus, suis copijs fretus, quas sub rege ductauerat, Urbanum cum tota Curia, ad proximum littus



*littus deductum, Genuensium triremibus ad id instructis paratisq̃ imposuit. Propterea inquit Ioachim tunc fugiant aues, & reptilia tantummodò remanebunt, id est quæ Pontificem comitari non poterant. Quibus triremibus dum Genuam Pontifex defertur, ex septem Cardinalibus Nuceria captis, quinque saccis inuolutos in mare demersit & reptilibus, mandauit. At verò mortuo Ludouico Hungariae, procures Hungari Carolum statim per Legatos accersunt: qui eò profectus dum conuentum ad res componendas celebrat, curante regina, quæ odium dissimulauerat, obtruncatur. At Urbanus circumactò anno, quo se Genuam contulerat, intelligens Ecclesiasticas ciuitates à Florentinis ad libertatem (vt antea) incitari, Lucam primo, mox Senas & Perusium peruenit. Confirmatis deinde aduentu suo ciuitatibus, desiderio (vt ipse dicebat) videndi Neapolim. Ferentinum vsque proficiscitur: ea mente reuera, vt Ladislaum admodum puerum, & Ioannem Caroli filios hæreditate paterna deturbaret. Multi enim procures Ludouico Andegauensi studere soliti, potiundi regni spem ei præstabant, sed magna vsi fide Caietani, pueris in vita retentis, regnum quoque cum summa laude seruauerunt. Pontifex ergo re infecta Rhomam redijt, & tandem Pontificatu infelicitè defunctus moritur, anno Pont. sui II. mense 8. paucis admodum eius mortem, vt pote hominis rustici et inexorabilis, flentibus. Cuius sepulchrum Rhomæ in Basilica beati Petri adhuc visitur cum epitaphio satis rustico et inepto. Ideò Ioachim ait: Infernus te expectat terribilis es. Depingitur hic itaque iste Pontifex, tanquàm Draco, veneno suo insidijs & artibus vniuersam Europam, & circumiacentes regiones inficiens: habens caput humanum, auriculas asininas, coronam regiã, ex qua galea prominet, Iudeorum, & gentilium, atque Ithurcorum modo retorta, vt intelligamus illum fuisse hominem rusticum, callidum,*

callidum, vindictæ cupidum, corde iniquum, & ad omne malum propensum. Caudæ caput alterum inest, id est Antipapa, nouem stellis adornatus, hoc est octo illis Cardinalibus & Iohanna regina, qui partibus suis fauebant. Hic Antipapa magnum ignem ore conflatur, dum Urbanum mouet, ut clam & ex insidijs omnes illas turbas Italiae procuret. Ludouicum Hungariae regem enim aduersus Ioannam idcirco prouocauit, cuius tandem nomine Carolus cum exercitu ingressus Neapolim cepit: Ludouicus Gandauensis & ipse ad vastandam Italiam venerat. Omnes isti huius Pontificis artibus vitam cum morte permutarunt: ideo supra draconem, tres magne stellæ depictæ cernuntur. Minores quinque inclusæ, significant, ex septem illis Cardinalibus Nuceria captis, quinque illos saccis inuolutos, & in mare demersos. Luna enim domina maris est. Itaque insanus Pseudomagus valeat cum sua galea Caiphæ & Annæ, et similibus futurorum præsagiorum ineptijs. Hæc enim omnia ad annum Domini 1389. impleta sunt. Reuelata autem erant Ioachimo, dum esset Abbas in monasterio Florensi in Calabria, circa annum Domini 1176. Concludit has reuelationes Abbas hoc pacto: Potens est Dominus mutare propositum suum, quia in manibus eius omnia astra sunt cœli.

K SEQVVN-



SEQVVTVR AN-  
SELMI EPISCOPI MARSICHANI VA-  
TICINIA SCRIPTA AB EO, ANNO DO-  
mini 1278. quæ post obitum Bonifacij Papæ  
Octavi in lucem data erant  
Perusij.

## VATICINIVM XVI.



AN-

## ANSELMVS EPISCOPVS.

Incipit principium malorum, hypocrisis  
abundabit.

Neq; zelus, neque vrsa catulos pascens, in quinque Rhomam sceptrum conturbat nouam: & triginta sex annis miser ambulabit. Primus filius, fere habens quinque filios, à figuris mediis tibi est: area autem ciuitas barbaros in se recipit. Cum autem viderit vrsa, matrem Canum, miserabiliter lugebit, in altitudine coeli, vt à Deo consequatur auxilium. Multos decipis misera, nequissima, sub aliena pelle vnita: falcem conuerte intra, absconde deceptionem: immuta faciem, sicut benè manens: canes nutris nouos, vt eos habeas in medio tempestatum: sed Christus manifestabit cogitationes tuas: serpens autem omnes velociter cōsumet, cum ijs quos lactas: lactaberis pœnaliter, & manus expandes, quum pedes peruerteres, sicut abijciens te ipsum extra: sed Dominus hypocrisim tuam ostendet. Quid mali facis o tu habens faciem canis admixtam alieno morfu? Quid tu feris? quid mundo aperis os tuum ad pusillos? quomodo eructabit cor tuum verbum bonum ciuitati?

## PAVLVS SCALIGER.

*Cum vidisset Anselmus Ioachimi varicinia ultra 15. Pontificē se nō extendere, ille tandē adiecit prognosticon totidē Pontificū. Et siquidē Ioachim in terribili pōtifice desijt: Anselmus incipit à principio malorū, et abundātia hypocrisis. Itaq; suis coloribus successorē Urbani videlicet Bonifaciū nonum, patria Neapolitanū, Petrum Tomacellū antea vocatū depinxit. Neq; zelus inquit,*

K 2 neque



neque vrsa catulos pascens, id est, neque Pontifex, neq; magistratus vllus afficiuntur commoditate catulorum, Reip. Christianæ: sed in quinque sceptrā, id est, in quinque Pontifices transmittit schisma quod Rhomā conturbat nouam. Bonifacius enim fuit tanti animi consilijque, vt primus populi Rhomani vim omnem in Pontificem transtulerit, creatis suo nutu magistratibus omnibus, munitaq; sancti Angeli arce in mole Hadriani sita ad Tiberis pontem, quo ab vrbe in Vaticanum itur: Munitisque item pontibus, quibus in transtiberim Rhomani commeant. Iubileum tandem celebravit: atq; ita Rhomæ vrbis ad Ecclesiæ subiectionem reductæ gloria & pecunijs iubileo anno perceptis auctus, rem aggressus est nouam, quæ Pontifices Rhomanos successores suos, non minus orbis Christiani, quàm Rhomæ Dominos reddidit. Lege etenim promulgata constituit, non licere cuiquam sacerdotij, ad quod promoueretur, beneficiū consequi, priusquàm primi illius anni æstimationis pecunias Pontificali ærario dissoluisset. Bonifacius ergo annatarum vsum beneficijs Ecclesiasticis primus imposuit, hac conditione, vt qui beneficium consequeretur, dimidium annui proventus fisco Apostolico persolueret, quā consuetudinem omnes admisere præter Anglos, qui id de solis Episcopatibus concessere: in cæteris beneficijs non adeo. Triginta sex annis à Pontificatu suo Ecclesia misera & schismatica incessit. Primus filius feræ, id est schismatis, Bonifacius est, successor Urbani, penes quem schisma cœpit, & qui filios quinque habuit, scilicet hunc Bonifacium, Innocentium septimum, Gregorium duodecimum, Alexandrum quintum & Ioannem vigesimum tertium, omnes Pontifices in ipso schismate. Medius à figuris primus filius Bonifacius est. Quia inter Urbanum & Innocentium. Prima etenim figura Urbanus sextus est: secunda, Bonifacius nonus: tertia Innocentius septimus. Reliqui filij enim ex

vna figura promanarunt. Innocentius quippe, quòd simul Cardi-  
 nales tres creauerit, postea tres Pontifices, videlicet Angelum  
 Cornarium, tandem Gregorium duodecimum, successorem Inno-  
 centij. Petrum Philardum Cretensem, tandem Alexandrū quin-  
 tum, successorem Gregorij duodecimi. Hunc secutus est Ioannes  
 vigesimus quartus, sed depositus, & tertius filius Ottho Colum-  
 na, Martinus quintus in eius locum suffectus. Aerea autem ci-  
 uitas Rhoma dicitur, quòd vniuersa Europæ æs ad eam compor-  
 tetur, & omnes populi illius vectigales quodammodo sint. Hæc,  
 inquit Anselmus, sub hoc Bonifacio barbaros recepit. Vndiq;  
 enim religionis caussa populi Rhomam confluebant, propter iu-  
 bileum annum. Itaque videns magistratus, matrem canum, id est  
 Pontificem, cui ad summam gloriam nil certè defuisset, nisi affi-  
 nium et cognatorum affinitatibus obtemperans aliquam notam  
 contraxisset. Multa enim crimina per Simoniacam prauitatem  
 committebantur, petentibus contra ius fasq; omnia tum fratri-  
 bus, tum cognatis: quorū magna multitudo quæstus gratia Rho-  
 mam venerat. Idcirco vr̃sa id est magistratus populusq; Rhoma-  
 nus, vehementer agrè ferebant, illum suos ad tantum fastigium  
 euehere, & indies orabant Deum, vt se tantis miserijs liberaret.  
 Multos enim decipiebat Bonifacius miserè, idq; sub aliena pelle  
 vnitus. Indulgentiæ enim, quibus vnitus erat, & quidem plena-  
 riæ ita passim vendebantur, vt iam vilesceret clauium & litera-  
 rum Apostolicarum autoritas. Propterea hortatur illum Ansel-  
 mus, vt falcem conuertat, intret in conscientiam, & abscon-  
 dat deceptionē, immutet faciem instar benè agentis: quan-  
 do quidem canes nutriat nouos, vt eos habeat in medio tempesta-  
 tum. Reuocare ergo hæc omnia Bonifacius conatus, cognatorum  
 precibus eò identidem redire cgebatur. Vnde melius actum cum  
 Ecclesia Dei censerem, si Pontifices, reiectis affinibus & cognat-



tis, vel saltem in mediocri fortuna collocatis, Pontificiæ dignita-  
 ti potius, quàm carni consulerent. Hinc subiungit Anselmus, sed  
 Christus manifestabit cogitationes tuas. Serpens enim,  
 id est Ladislaus rex, quem in sinu suo aluit, & in regnum pater-  
 num restituit, omnes velociter consumet, cum ijs quos la-  
 ctas, hoc est fundamento regni sui confirmato, omnes proceres  
 dominatu priuauit, & parere recusantes è patria deiecit. Idem  
 præstitit huius successor Innocentius septimus, & ipse de sinu suo  
 eductus. Lactatus ergo est pœnaliter Pontifex. Nam in tanta  
 rerum perturbatione diu afflictatus, dolore laterum tandem mo-  
 ritur. Atque hoc illud est, quod Anselmus ait, Manus expandes,  
 cum pedes peruerter, sicut abijciens te ipsum extra, id est o-  
 mnia te moriente fient irrita, & Dominus tuam hypocrisim  
 ostendet. Ideo in hæc verba prorumpit Anselmus, Quid mali  
 facis ô tu habens faciem canis admixtam alieno morfu?  
 quid tu feris? quid mundo aperis os tuum ad pusillos? quomodo  
 eructabit cor tuum verbum bonum ciuitati? Fortè his  
 verbis quoque innuere voluit, quòd quendam virum, quem san-  
 ctitati deditum commemorant, Pontifex, vt quidam aiunt, inno-  
 centem è medio sustulerit. Ex alpibus namq; descenderat in Ita-  
 liam, anno ante Iubileum, presbyter quidam cum magna homi-  
 num multitudine. Is quidem albo indutus panno, tantam mode-  
 stiam vultu ac verbis præ se ferebat, vt ab omnibus sanctus ha-  
 beretur. In Italiam itaque descendens, magnam hominum ac mu-  
 lierum multitudinem, in sententiam sui ipsius breui deduxerat.  
 Linteis albis circumuoluti omnes sine discrimine, mares an fœ-  
 minæ, rustici an ciues, serui an liberi essent, passim veluti pecora,  
 vbi nox oppressisset dormiebant. Publicè in vicis epulabantur,  
 perlatis vndique certatim quasi ad sacrum epulis. Crucifixum sa-  
 cerdos ipse præ se ferebat: quem lachrymari ob hominum errata  
 dicti

dictitabat. Id quoties accidisset, succlamabant omnes, veniam à Deo petentes. Laudes beatæ virginis canebant euntes & stantes, hymnis ad id aptè compositis. Ex Cisalpinis autem in Flaminiam, Hetruriam, Picentes aucta opinione sanctitatis veniens, non plebem modò rudem & crudelem, sed & Principes, & Episcopos ciuitatum in sententiam suam facile pertraxit. Substitit Viterbij cum magna multitudine labore itineris fessus. Rhomam inde (vt ipse dicebat) ad visenda loca sancta, sanctorumque corpora venturus. Sed Bonifacius fraudem subesse veritus, quòd diceret hominem superstitiosum pontificatū appetere, adiuuante illa multitudine, milites aliquot præmittit, qui hominem comprehensum ad se perducant. Sunt qui scribant huius fraudem questione detectā fuisse, hominemq; in tanto facinore deprehensum, meritis pœnas luisse, igne scilicet, quo exustū ferunt. Sunt etiam qui dicant nil fraudis in homine deprehensum fuisse, sed id fictum à Pontifice abolendo rumori, quo hominem per inuidiam captum et necatum affirmabant. Vtrum verius sit, Deus nouit. Puto tamen hanc rem hic Anselmum tetigisse. Moritur Pontifi. sui anno 14. mense 9. anno Domini 1404. Itaque sensus imaginis est, Pontificem vrsū humeris gerere, id est, Remp. Rromanam, & tamen vrsū ex vtroque latere, lugentibus propter schisma & alia incommoda perniciem Ecclesiæ Rromane totiusque Reipub. Christianæ, nullam opem adferre. Valeat ergo Pseudomagus cum sua futura punitione, quam somniat per vrsos futuram.

Autor enim ipse, et veritas historie testatur, hoc vaticinium in Bonifacio nono consummatum esse.

VATI.



## VATICINIVM XVII.



## ANSELMVS EPISCOPVS.

Decimæ dissipabuntur in effusione sanguinis.

Secundus est filius: alia fera, volans serpens ad meridiem, iunctus nigro, & niger totus priuatus lumine, à coruis manifestatus, tempore & figura localibus, qui succedunt paterno fini: existens enim serpens niger destructor Vrsæ. O quæ esca miserorum coruorum: existens

stens genus abominabile eorum, Ab oriente miserabiliter turbabis te ipsum, simul & ciuitatem tuarum gentium dabis in tempore messi.

PAVLVS SCALIGER.

*Successorem Bonifacij noni Innocentium septimum, patria Sulmonensem, Cosmatum antea vocatum, sanctæ Crucis presbyterum Cardinalem, Rhomæ, tumultuante tota Italia, Pontificem creatum, dicit esse secundum à Bonifacio filium, in schismate procreatum. Aliamque feram, volantem scilicet serpentem ad meridiem, scilicet Rhomam, iunctum nigro, id est Bonifacio, & niger totus priuatus lumine. Nam quam secordiam Bonifacio & Urbano, existens Cardinalis, exprobauit, dicens eorum secordia fieri, quo minus schisma Ecclesiæ Rhomanæ, totiusque Reipub. Christianæ perniciens, hætenus extinctum & sublatum sit, in eam ipse incidit. Factus enim Pontifex, in multis Urbani & Bonifacij vestigia secutus est, & quos priuatus carpebat non modò quod tantopere laudabat effecit, verumetiam iniquo animo ferebat, si quis apud se ea de re verbum vllum fecisset. Propterea & tempore & figura successit paterno fini, à coruis id est Rhomanis manifestatus. Adeo enim tumultuosè omnia gubernabat, vt cum semel Rhomani restitui in libertatem, reddiq; sibi Capitolium, Pontem Miluium, & arcem Hadriani peterent, instarentque item vt schisma, sicut in ipsa creatione sponderat, rem perniciosi exempli de Ecclesia tolleretur, bella extingueret, & seditiones, rege Gallorum ad eam rem conficiendam operam suam pollicente: ac Petro Luna antipapa, nequaquam tantam concordiam abnuente, Rhomanos ipsos Pontifex perinde ac coruos, fures, & latrones ad Ludouicum nepotem diuertentem, apud hospitale san-*



Et spiritus via saxeae, tanquam ad certum carnificem miserit.  
 Undecim enim ciues Reipublicae suae labenti, negligentia Pontifi-  
 cis, consulturi, statim necantur, è fenestrisq; deiciuntur, quòd  
 diceret eo modo tolli seditiones & schisma, non alio quidem mo-  
 do posse. Hac autem seuitia motus populus Rhomanus, accito  
 Ladislao Apuliae rege, arma capit, supplicium de Ludouico sum-  
 pturus. Verùm Pontifex declinaturus populi furorem, Viterbi-  
 um cum Ludouico citato gressu proficiscitur. Tum verò populus  
 cùm seuire in autorem tanti facinoris non posset, in aulicos iram  
 conuertit, quorum bona magna ex parte direpta sunt. Seruati  
 tamen quidam dicuntur, in aedibus Cardinalium Rhomanorum,  
 qui adiuuantibus clientibus, agrè tamen ad se confugientes tuta-  
 ti sunt. Capto deinde Capitolio, occupatoq; ponte Miluio, arcem  
 Adriani occupare frustra conati sunt, adiuuantibus etiam Rho-  
 manos, Ioanne Columna Troiae Comite, Gentile Monterano Co-  
 mite Carrariae, egregijs tum copiarum ducibus, & Ladislai Re-  
 gis auspicijs militantibus. Verùm superueniente Paulo Vrsino,  
 mandato Pontificis, cum Mostarda, & Ceccabolino turmarum  
 praefectis, in pratis Neronianis Iohannem Columnam & reli-  
 quam Ladislai militiam fundunt. Hanc ob rem quidem Rhoma-  
 ni multis incommodis circumuenti, cùm & homines & eorum  
 pecora abigerentur, residente etiam ira iam antea concepta,  
 Pontificem in gratiam recipiunt, rogantq; vt ad urbem redeat.  
 Erat enim natura comis & blandus, adeoque Pontificij ciuilibusq;  
 iuris peritus, vt facile homines, tum rationibus, tum suauitate di-  
 cendi, in sui ipsius sententiam alliceret. Rebus itaque hoc modo  
 compositis, Rhomam veniens plures Cardinales delegit, ex qui-  
 bus tandem tres Pontifices inaugurati sunt, videlicet Grego-  
 rius duodecimus, Alexander quintus, & Martinus  
 quintus confirmatoque pontificatu suo, Ludouicum nepotem  
 agri

*agri Piceni Marchionem creat: eundemq̃ Firmanum principem  
constituit. Moritur pontifi sui anno secundo. Atque ita serpens  
niger destruxit vrsam, Rempublicam Rhomanam: & abo-  
minationem, escam miseris coruis parauit. Cæterum non multò  
post Pontifex se ab oriente miserè deturbauit, Rhomæ namque  
mortuus vnicuique scelerato peccandi licentiam reliquit, simul et  
ciuitatem Rhomanam antea gentibus tempore messis prædam  
dederat: Ladislaus enim occupauerat Rhomam, & Perusium  
deditione acceperat. Iam patet decimas, id est Ecclesiæ faculta-  
tes dissipatas, in effusione sanguinis. Itaque Papa vexillum Ec-  
clesiæ tenens dextra manu, significat hunc Pontificem de Rho-  
manis & Ecclesia triumphasse: Leua continet arundinem su-  
pra quam coruus volat in os serpentis, id est Pontifex quasi aliud  
agens Rhomanos mittit ad Ludouicum nepotem, tanquàm  
carnificem, deuorandos. Valeat igitur Pseudomagus  
cum suo diabolo, et e mentita columba,  
atque dialogo.*

L 2 VATI.





## VATICINIVM XVIII.



## ANSELMVS EPISCOPVS.

Potentia vestigia Simonis magi tenebit.

Supplicium tertium avis crucifera, equus corniger,  
 principium habens unitatem, & finē vocationis, vnius  
 recurvæ figuræ numerorū extremæ, Sicut in tempore  
 boni anni veniet dies, in qua tenebit immediatè figuræ  
 curæ

curuatæ multam, magnus quidam rex volucrum. Solus enim recipiens principium, media die explebit in cornuto, mediâte stella poli vespere, & propterea multum velox existens ad bella paratus. O genus Bizantij habens aditus nobis inclinatos: ô amice, sed vltima sylaba lucrabitur te in locis irriguis, propter spem, & finis cornu est.

## PAVLVS SCALIGER.

*Anselmus hoc vaticinio notat Gregorium duodecimum, natione Venetum, antea Angelum Cornarium dictum. Hic enim maximæ seueritatis et sanctimonie vir, pontificatu suscepto, iterato ad deponendum Pontificatum se scripto adhibitis notarijs, & testibus obligauit, si Benedictus antipapa, qui alterum Pontificatum in Gallia tenebat, se quoq; abdicaret. Cohortantes igitur in principio sese prædicti Pontifices, & ad mutuam abdicationem offerentes, de loco, quo sine discrimine vterq; venire posset, disputatio erat. Qua de re cum inter ipsos non satis conueniret, collusores, et fidefragi, ab vtroq; Cardinalium conuentu sunt habiti, & maioris diuisionis autores. Quapropter Concilium Pisis celebratum est, in quo collusionis conuicti, Pontificatu ambo priuati sunt, & Alexander electus. Ceterum absente Gregorio armis omnia Rhomæ circumsonabant. Gregorius autem quasi profugus Ariminum ad Carolum Malatestam se contulit, ab eoq; per quàm benignè acceptus. Benedictus autem ad Castellum Panischolæ locum munitissimum confugit. Porro licet vterq; exautoratus fuerit, neuter tamen destitit à creatione Cardinalium, maximè verò Gregorius, qui dum Lucæ esset, in primis de consensu Cardinalium, qui nondū ab eo decesserant, Gabrielem Condelmarium, postea Eugenium quartum, Cardinalem creat. Hic*



tandem ad Concilium Constantiense misso Carolo Malatesta Oratore, pontificatu se liberè abdicauit. Itaque potentia vestigia Simonis Magi tenebat, cum præponeret publicè vtilitati priuam gloriam & emolumentum. Supplicium ergo scilicet tertij filij, videlicet auis crucifera id est aquila, quam supra coronam gerit, & equus corniger id est unicornis: Nam propter vnitatem quidem Gregorius suscepit Pontificatum, eo tamen fine, vt propter eandem vnitatem, exigente vocatione, suscipiat recurram numeri figuram, quæ est C. quod centum significat, hoc loci autem denotat, Cessa. Adueniente ergo boni anni die, id est Constantiensis Concilij: urgente rege volucrum, id est Cæsare, qui solus in cornuto, id est Gregorio gente Cornaria, media die, id est in confessu Cardinalium: principium, id est traditam potestatem Gregorio, recipiens expleuit, id quod mediante stella poli, id est Carolo Malatesta, principe Arimini, & quidem vespere, id est ad extremum, cum videret rem secus fieri haud posse, propter metum belli, ad quod Cæsar velox & paratus erat. Idcirco exclamat, O Bizantium, id est Constantinopolis, vtinam haberes auditum paratum, ô amice: Sed vltima syllaba id est voluntas liberaque abdicatio lucrata est illum in locis irriguis, id est ad mare propter spem, quæ cornu sedauit, vt esset agri Piceni consensu omnis conuentus legatus. Unicornius igitur in hac figura vnitatem significat, supra mitram papalem aquila, Cæsarem: à dextris adolescens Carolum Malatestam oratorem. Quasi dicat propter vnitatem et concordiam Gregorius duodecimus in gratiam Imperatoris, per Malatestam oratorem abdicabit se Pontificatu. Valeat proinde Pseudomagus, cum suis somnijs, qui hîc nescio quid de castitate unicornis, & clauibus Pontificum somniat: sed & aquilam omisit, vsque adeo peritus suæ magiæ, scilicet.

VATICINIVM XIX.



ANSELMVS EPISCOPVS.

Confusio & error incitabitur.

Iste ab vrsa, carens gladijs, & homo mouens incisionē  
rosæ: tamē ficcabitur sicut rosa. Incidet rosam cui⁹ mo-  
tus tertius: & est tertia litera, & tertium elementum si-  
gnificat, manus falx: illa in prima litera incidit rosam,  
miserum elementum illud. Inde recipiens eam non  
miser-



miserebitur tuis: quamuis in principatu maneat. Vide enim, iste incipit colligere, rosam ante ferens. habens finem, in quo multum frustra lætare.

## PAVLVS SCALIGER.

*Vaticinium hoc depingit Alexandrum quintum, natione Cretensem, Petrum Candianum antea vocatum, virum doctrina & sanctitate vitæ præclarum, in Concilio Pisano, Gregorio & Benedicto abrogatis, omnium consensu, Pontificem creatum. Hunc dicit ab vr̄sa esse, & carere gladijs, id est Rempub. Romanam, non ferro, sed verbo gubernare, atque cum quouis Principe optimo, & liberalitate & magnitudine animi, conferri posse. Adeo enim munificus erat in pauperes, & viros sua benignitate dignos, vt breui nil sibi reliquerit. Vnde per iocum dicere interdum solebat, se diuitem Episcopum fuisse, pauperem Cardinalem, mendicum Pontificem. In eo enim defuit habendi cupiditas, quæ vna cum re & ætate accrescit simul. Sed hoc vitium cadere in viros bonos, & rerum humanarum contemptores non potest: qui quò magis consenescent, eò minus viatici indigere se cognoscunt: & ob hanc rem cupiditates sedant, refrenant auaritiam, ac cæteras animi labe expellunt. Tanti præterea animi Alexander fuit, vt Ladislaum regem tum potissimum, qui ditionē Ecclesiæ, Pontificibus absentibus, diu multumque vexauerat, oppidaque aliquot vi occupauerat, in Concilio Pisano approbantibus qui tum aderant, regno priuauerit: iusq; illud Andegauia Duci competere declarauerit. Idcirco inquit Anselmus, Et homo mouens incisionem rosæ, id est regis Neapolitani, siccabitur sicut rosa: octauo enim Pontificatus sui mense Bononiæ mortuus & sepultus est. Cum verò Alexander grauiter ægrotare cœpisset, nossetq;*

noſſetq; mortem propè inſtare, Cardinales ad ſe venientes ad concordiam, ad pacem, ad tuendam Eccleſiæ dignitatem adhortatur. Teſtatus prætereà eſt per eam mortem quam ante oculos ſe continuo cernere dicebat: nec reformidare, conſciētia benè actæ vitæ motus, ſe exiſtimare & credere, quæ in Concilio Piſano decreta fuiſſent, rectè atque integrè facta eſſe omnia, ſine dolo malo fraudeue. Cùm hæc dixiſſet lachrymantibus omnibus qui aderant, illud Saluatoris verbum agrè proferens, Pacem meam do vobis, pacem meam relinquo vobis, ſtatim moritur. Pontific. ſui menſe octauo. Cæterùm Ladislai illa priuatio, magnam conſuſionem & errorem concitauit. Incidit enim Alexander roſam, hicq; motus tertius eſt, cùm ſecundus in Innocentio ſeptimo fuerit, & ſupplicium tertium in Gregorio duodecimo, & tertia litera, tertium ſcilicet elementū, vtpote manus falcaria (nam primum elementum eſt litera prima, ſiue columna, cui ineſt rex Apulie coronatus: ſecunda cui ineſt imago monachi, id eſt Alexandri quinti, hic Pontifex enim fuit frater ordinis minorum: tertia cui ineſt, manus, id eſt concilium, falcem monacho, id eſt Pontifici tradens) in prima litera ſiue columna (columnis autem ſtabilitatem & potentiam indicat: ſic concilium ſtabile & potens eſt: itidem & Pontificatus & regnum, ex quorum diſſenſione conſuſio & error: ſicut ex illorum concordia, robur & fortitudo naſcitur) incidit roſam, id eſt regem regno priuauit. Miſerum appellat illud elementum, quia recepta roſa Ladislaus non eſt Pontificis vlliſ, quàm diu vixit, miſertus, licet Pontificatu potentes fuerint. Varia enim fortuna inter pontifices ſequentes & regem ſemper fuit. Itaq; cœperat Alexander colligere Eccleſiam, à roſa initium ſumens, ſed propter vitæ ſuæ ſubitum finem, fruſtra laborauit. Valeat ergo Pſeudomagus cum ſua idololatria, ſuisq; nugis, et impoſtura: ne hic quidem prætermiſit imponere: pro fal-



ce enim cornu pinxit: idq̃ contra autoris mentem, vt vetustissimum exemplar, & textus ipse Anselmi, testatur, vt tantò commodius suas nugas distrabere astutissimus serpens valeat. Neq; enim aliam causam subesse puto, cur verba vaticini, si vidit, omiserit, quàm vt, neglecta interpretatione prophetiæ, ipse sibi novam & seditiosam confingeret.

## VATICINIVM XX.



ANSEL-

## ANSELMVS EPISCOPVS.

Elatio paupertatis, obedientia, castitas, gastrimargiæ & hypocritarum destructio.


Vide iterum alienum medium, falcem magnam, & rosam quam fert tertium ante duplicatum primum elementum. Item coniuncta fore quatuor mensium, te scribo, & principatus ante omnia, templa idolorum, post paululum resuscitabo, tres ante tres annos in vnũ. Viues senex valde, præcipitaberis in infernum duabus tribulationibus, in medio.

## PAVLVS SCALIGER.

*Depingitur hic Ioannes vigesimus quartus, patria Neapolitanus, & nobilis Baldesar cognomento Cossa, Bononiæ omnium consensu Pontifex creatus. Appellat illum medium, id est in medio constitutũ Pontificem, sed alienum, quia depositus tandem in Concilio Constantiensi fuit. Falcem magnam id est apparatus & copias, quarum duces Paulus Ursus, & Sfortia, aduersus Ladislaum, mittuntur, et Rosam quam fert tertium ante duplicatum primum Elementum, id est rex Apuliæ: ob oculos Pontifici Anselmus ponit, vt benè deliberet, quod semel statuendum putauerit. Hoc est, admonet officij Pontificem, vt diligenter consideret, quæ mala sequi possint, si in regem bellum moueat: videlicet id fore, vt alienus de medio fiat, hoc est Pontificatu deiciatur. Ladislaus enim Pontificem vicissim sequenti anno bello vexare cœpit. Ideò Pontifex timore correptus Florentiam primò, postmodum Bononiam venit, ac tandem Mantuam ad Ioannem Franciscum Gonzagam profectus est. Deinde & Laudæ, & Cremonæ cum Sigismundo Cæsare, de*  
M 2 pellen.



pellendo Ladislao, qui Rhomam & multa Ecclesie oppida occupauerat, conuentum habuit. Inde ad Concilium Ioannes omnium nationum consensu citatus (quod Anselmus coniuncta appellat) Constantiam, ad tollendum schisma proficiscitur: admonentibus tamen quibusdam ne id faceret, quod vererentur, ne cum Pontifex accederet, priuatus reuerteretur, quod etiam contigit. Itaque superueniente Sigismundo, multa crimina Pontifici obiecta sunt, quorum causa mutato habitu familiaq, clanculum noctu fugiens, cum iam quatuor mensibus in concilio fuisset, Scaphusam se contulit, veritus ne quid grauius in se consuleretur. Idcirco, inquit Anselmus, Coniuncta fore quatuor mensium, te scribo, id est, vbi Concilium quatuor menses superauerit, te accuso: & principatus ante omnia templa idolorum, post paululum resuscitabo, tres ante tres annos in vnum, id est nationes omnes videlicet Italicam, Gallicam, Germanicam, Hispanicam, & Anglicam in tria idola, videlicet Ioannem, Gregorium, & Benedictum suscitabo: harum enim nationum suffragijs in Concilio tria illa deposita sunt idola, & vnus electus omnium votis Martinus quintus. Triennio autem Heydelbergæ Ioannes captus asseruatus est, senex valde, & in infernum, id est captiuitatem illam, in medio, Concilij scilicet precipitatus, duabus tribulationibus, quod & vinctus esset, & sine vlllo cubiculario famuloué Italico. Captiuitas per se tribulatio fuit vna: secunda illa fuit, quod Theutonici erant custodes omnes, quibus cum Ioannes non nisi nutu & signis loquebatur, cum nec ipse linguam Theutonicam, nec illi vicissim Italicam scirent: Tres igitur annos ante triennium sue captiuitatis suscitati erant principatus ante templa idolorum. Nam & Apulia rex Ecclesiam vexauit, & totidem annis vero Pontifice Ecclesia caruit, multisq, schismaticis patuit, qui verè templa Idolorum dicuntur. Iam in

confesso est, sub hoc Pontifice elationem paupertatis fuisse, quia pauperum facultatibus elatus, vi sibi pontificatum vendicavit, inquit ad Cardinales, votum à se poscentes, Date mihi Petri chlamidē ego eam dabo Pontifici, palliū humeris suis imponens, cuius potentiam veriti Cardinales: Bononiensis enim Legatus erat, & stipatus militibus, natura miles, illum in Pontificem metu crearunt. Atq; hoc innuit rosa quā manu sinistra gestat. Obedientia tandem in eo fuit, nam à carceribus liberatus, ad Martinum venit sese pedibus Martini subiciens, eum ut Pontificē verum & unicum recognovit, sed etiam obedientiam omnes nationes itidem præstiterunt: Castitas instaurata: gastrimargia atque hypocrisis sublata est, cū omnes nationes, & in primis Imperator, nimio gaudio effusus, nullo habitu dignitatis suæ discrimine, conclaue ingressus, gratias omnibus egit, qui tantum virum & tam necessarium Reipub. Christianæ propè extinctæ delegissent: & ante Pontificem prostratus, cum summa veneratione eius pedes exosculatus est, quem contrā Pontifex, non secus ac fratrem in precio habuit, eiq; gratias egit, quòd sua opera et industria pax tandem Ecclesiæ Dei reddita esset. Hinc constat Pontificis imaginem, magnam falcem manu dextra continentem & metentem, bellum aduersus regem Ladislaum pro Ecclesia, designare. Crus cum pede nudum truncatum à sinistris, deiectionem & denudationem Ioannis repræsentat. A dextris litera B. siue pro litera ipsa sumatur, siue pro chalybe igniaria, carcerem, & tribulationem, maximè cū supina iaceat  denotat. Valeat ergo Pseudomagus cum suo monacho concionatore, somnijsque vigilantium.



## VATICINIVM XXI.



## ANSELMVS EPISCOPVS.

Incisio hypocrisis in abominatione erit.

Vacca ante quintum, & filij vrsæ pascentis figura,  
manifestat locum, & modum, vnde adueniens solus  
manifestat, vel denotat mihi primos amicos: & habens  
virtutem, dispensa circa amicos: propterea inuenisti fi-  
nem

nem dulcissimum, solus sublimaris ad gloriã, & mortuo relinques, potentissimè potentias: sicut imbrem enim benè inuenies potentias.

## PAVLVS SCALIGER.

*Describitur Martinus quintus, patria Rhomanus, Ottho columna, prius vocatus, non magis suo, quàm Ecclesiæ iam labentis tempore Pontifex in Concilio creatus, nationum omnium, & Cardinalium consensu. Qui in pontificatu constitutus non somno, & otio, sed negotio & sollicitudini deditus, omnia ad rem pertinentia miro perfecit modo. Vir antea nequaquam sagax existimatus, sed benignus. In pontificatu tamen ita opinionem de se prius habitam redarguit, vt sagacitas quidem in eo summa: benignitas verò neque superflua, neque minima reperiretur. Quid agendum, & quid vitandum esset, statim re proposita acutissimè iudicabat. Brevis in dicendo, cautior in agendo, adeò vt prius rem factam, cernerent homines, quàm ab eo excogitatam putarent. Ex eius ore nullum verbum tam crebrò quàm iustitiæ prodibat. Ad suos persæpe conuersus, maximè ad eos qui prouincias & ciuitates gubernabant, his verbis utebatur, Diligite iustitiam, qui iudicatis terram. Indigebat tum profectò tali Pontifice Ecclesia Dei, qui nauiculam Petris schismatis, & seditionum omnium fluctibus quassam, redigere in portum salutis gubernaculo admotus sciret & posset. Summa: Vir hic in omni vita integer fuit. Idcirco vacca ante quintum, scilicet Martinum constituitur, id est Ioannes vigesimus quartus sese pedibus Martini subicit, id quod factum est opera filij vrsæ, id est, Sigismundi Rhomani Imperatoris, cuius figura, id est industria, manifestant locum & modum, scilicet Constantiam & artem, unde*



unde Martinus adueniens, solus manifestauit amicos, id est solus  
 pacem & concordiam in Ecclesiam Dei, diu schismate & varijs  
 calamitatibus vexatam inuexit. Virtute igitur, potestate scili-  
 cet Pontificali adornatus, omnia circa amicos dispensauit, id est  
 ritè disposuit, quæcunque ad amicitiam & tranquillitatem spe-  
 ctarent. Nulli tum latrones extabant maximè deuicti, & ex-  
 tincto Brachio Alphonsi militiæ duce, nulli sicarij & fures, lice-  
 bat tum frui ocio et liberè per syluas noctu etiam ac tutò comme-  
 are. Ac licet inter Philippum Ducem Mediolanensem, et Vene-  
 tos subortum erat bellum calamitosum: vno in anno ter collatis  
 signis pugnatum est, bis æquo Marte vtrunque discessum, tertio  
 Philippi copiæ superatæ & Carolus Malatesta totius exercitus  
 dux captus: Quocirca extremum remedium Philippo erat Sigis-  
 mundum Vilhelmum & Brunorum Scaligeros in Venetos con-  
 citare (vt fidem inueniat series nostra, & Venetorum splendi-  
 disimum mendaciū elucescat, qui omnibus suis historijs tradunt,  
 Scaligerorum familiam extinctam esse in Vilhelmo Canis Rabi-  
 di filio, eiusque duobus liberis, Antonio & Brunoro à Francisco  
 Carrario, tempore Innocentij septimi, necatis. Hic porrò Marti-  
 nus ab Innocentio quintus Pontifex est, sub quo & Sigismundus  
 & Brunorus Scaligeri, dolo Venetorum, filij Canis & Bartho-  
 lomæi vltimi qui Veronæ imperauit, apud Hungariæ regem ex-  
 istentes, in Venetos concitantur) Martinus tamen Pontifex  
 Philippi res in maximo discrimine videns pacem inter Philippū  
 & Venetos felicissimè composuit. Propterea inuenit hic Ponti-  
 fex finem dulcissimum, id est summam obedientiam omnium na-  
 tionum, & solus fuit sublimatus, id est ad summum fastigiū pon-  
 tificatus, existimationis, pietatis, & iustitiæ euectus. Qui etiam  
 mortuus potentiam summam atque obedientiam, suo successorī  
 reliquit, non secus ac imbrem, cælitus affluenter demissum. Hinc  
 factum

factum est, ut hypocrisis in abominationem venerit. Itaque Imaginis hic est sensus, Papa compositis ad commiserationem manibus, probitatem & pietatem indicat. Vacca ante pedes Ioannem vigesimum quartum humiliatum, qua humilitate Martinus motus, illum primum Cardinalem Tusculanum effecit. Imperator et Imperatrix, siue rex & regina, Sigismundum atque consortem illius innuit: ambo enim Concilio interfuerunt, & reuerentiam Martino exhibuerunt. Significatur etiam rex Alouisius, Ludouici regis filius, qui à Martino regni Neapolitani titulum consecutus est, Cardinalium omnium consensu. In regnum namque per adoptionem à regina Ioanna Ladislai sorore vocatus erat. Quade re Alphonsus Aragonū rex, de Martino conquestus est, quòd diceret eius opera se à regina Ioanna abrogatum regno esse, què prius heredem instituerat, & Alouisium regis Siciliae filium, nouum heredem institutum. Ad hunc etiam Pontificem Oratores Constantinopolitani Imperatoris venere, pollicētes Græcos, quod ad fidem pertineret, velle in sententiam Latinorum venire, si æquæ conditiones proponerentur. Quæ omnia per semi imagines illas regum, intelligenda veniunt. Siue ergo per imaginem regis Imper. Sigismundus, siue rex Alouisius, aut Alphonsus: siue per reginæ imaginem, Imperatrix, vel regina Ioanna intelligantur, idem est: quòd si duæ regum imagines sunt, aut duos reges designant, Alouisiū et Alphonsū, aut duos Imperatores denotant: maximè verò Imperatores Orientalem et Occidentalem, illis designari putarem, quorum alter Pontifici obedientiam præstiterat, alter præstare cupiebat, sicut in Eugenio quarto patet. Pascata hoc modo vndique Ecclesia Dei, vir integerrimus, pontificatus sui anno decimoquarto, mense tertio Rhomæ Apoplexia moritur, ætatis suæ anno 63. & sepelitur in basilica Constantiniana comitante populo Rhomano, comitante Clero, non aliter

N fiente



*flente quàm si Ecclesia Dei, si vrbs Rhoma vnico atque optimo  
parente orbata fuisset. Valeat ergo Pseudomagus cum suo Tau-  
ro & id genus ementitis nenijs.*

## VATICINIVM XXII.



## ANSELMVS EPISCOPVS.

*Occasionem filij Balac sectabuntur.  
Alia Vrfa secundò pascens catulos:& in omnibus il-  
la,*

la, præterquam in vmbra tantum: natura temporum, natiuitas abortiua. In vltima enim scribitur vltimæ. Subsolares antè, vtrisque Coronis manifestantur, diuisiones, totius pænitentia.

PAVLVS SCALIGER.

*Describitur hic Eugenius quartus, patria Venetus, familia Condelmeria, Gabriel antea vocatus, Gregorij 12. ex sorore nepos. Vir certè in vita varius. Principio enim Pontificatus sui malis consilijs ductus, diuina humanaq; omnia perturbauit. Nam et populum Rhomanum, Cardinalis Vrsui artibus, ad arma excitauit: & Concilio Basiliensi, vnde infinita mala orta sunt, auctoritatem dedit, approbatis eorum per literas Apostolicas decretis. Idcirco inquit Anselmus, Alia vrsa secundò pascens Catulos, id est Pontifex hic à primi vaticinij Pontifice Nicolao tertio, familia Vrsino, secundus est, qui factioni Vrsinae faueat, contra Columnensium inueteratum odium. Qui quidem Pontifex in omnibus similis fuit Nicolao, quod ad patrocinium Vrsinorum attinet, sed in vmbra tantum, id est, non ex Vrsina gente, sed Vrsinam gentem tantum adumbrans & representans, veluti quòd sub vmbra sua, suoq; patrocinio, idq; malis consilijs, omnia fierent. Verum postea ad se ipsum rediens, & remota vmbra, omnia prudenter ac constantissimè egit, vir aspectu insigni & veneratione dignus: liberalis in omnes, tum vel maximè in literatos, quorum familiaritate delectatus est: ad iram non facillè mouebatur ob iniurias illatas, & maledicentiam hominum, aut mimos, & dicteria scribentium: Gymnasia omnia, & in primis Rhomanum quàm diligentissimè fouit: Religiosos mirum in modum dilexit, eosque opibus, & immunitatibus auxit: constans in*



pactis seruandis, & à vino abstinētissimus fuit. Bella autem ita  
 amauit, quod in Pontifice mirum videri debet, vt & Ladislaum  
 regem, cum Iuliano Cardinali in Thurcos miserit: quorum de nu-  
 mero ad triginta millia vno praelio caesa, inter Hadrianopolim,  
 & Danubium sunt: & Delphinum Caroli regis Franciae filium,  
 composita prius inter regem et Ducem Burgundiae pace, cum ma-  
 gno equitatu in Basilienses concitauerit: cuius impetu dissipatus  
 ille conuentus est, & adimpletū, quod Anselmus praedixit. Na-  
 tura temporum, natiuitas abortiua, id est Basiliense Con-  
 cilium, pro ratione temporis, non tempestiue ortum est. Proinde  
 in hac vltima occasione filij Balac, id est dissensione, et schisma-  
 te, praescribitur vltima. Felix enim in Concilio Basiliensi vltimo  
 schismate, ob varias, An Pontifex esset supra Concilium, nō sine  
 scandalo Reipub. Christianae disceptationes, artibus Philippi Du-  
 cis Mediolanensis Eugenio infensi Pontifex creatus, & praescri-  
 ptus est, id est ad mortem vsq; Eugenij permansit. Vnde magnae  
 seditiones in Ecclesia Dei exorta sunt: cum Christiana Respub.  
 trifariam diuisa, aut Felicem, aut Eugenium sequeretur, essentq;  
 qui neutrales vocarentur, videlicet Germani, quod neutri obtem-  
 perarent. Ceterum ante istas subsolares, id est Pontificias Conci-  
 liorumq; diuisiones, vtrisque coronis manifestatae sunt poeniten-  
 tia totius. Et Sigismundus enim Caesar ab Eugenio coronam im-  
 perij suscepit, eodem anno, quo Nicolao Scaligero filio Sigismun-  
 di Vilhelmi, mortua priore vxore Barbara Leopoldi Austrij fi-  
 lia, secundam videlicet Isabellam, Leonelli Astae, & Alexan-  
 dria Marchionis filiam elocauit: atque Concilij tempore ante ele-  
 ctionem Felicis, mortem cum vita permutauit: & Caesar Graeco-  
 rum ad Eugenium, primum Ferrariam, deinde Florentiam, Con-  
 cilio Basiliensi translato, ibiq; discussa, Graecorum et Latinorum  
 contentione, cum suis victus poenitentiam egit. Fassi etenim sunt  
 Gra-

Græci, & spiritum sanctum à patre filioq; procedere, homonion-  
 que esse, non à patre tantum, vt ipsi credebant, prouenire, & in  
 azymo sine fermento triticeo pane corpus Christi consecrari, ac  
 purgatorij locum esse crediderunt, Postremo etiam confessi sunt  
 Romanum Pontificem verum Christi vicarium, Petriq; legiti-  
 mum successorem, primum in orbe locum tenere, cui & Orienta-  
 lis & Occidentalis Ecclesia meritò pareret. Abeuntibus autem  
 Græcis re hoc modo composita, Armenij etiam cum fide nostra  
 conuenere, sublatis crebris disputationibus eorum erroribus, pro-  
 mulgatisq; Eugenij literis super ea re, quæ rationem concordie  
 ostenderent, cum inscriptione, Datum in sacrosancta Oecumeni-  
 ca sessione Concilij Florentini, quod in Cathedrali Ecclesia habi-  
 tum est, Anno Domini 1439. vigesima secunda Nouemb. die. Ita  
 pœnitentia totius facile eluxit, & vtriusque imperij corona Eu-  
 genio manifestata fuit: licet quidam occasionem Balac sectati, &  
 Eugenium deturbare, suisq; maledictis commaculare, & censu-  
 ris conficere, conati fuerint. moritur pontif. sui anno 16. septimo  
 Kal. Martij 1446. Iam imago facile patet, Pontifex enim Eu-  
 genius vrsam, id est Cardinalem Vrsinum fouet, & hic sub  
 vmbra Pontificis, catulos suos pascit, sicut expositum  
 est. Valeat ergo Pseudomagus, cum sua  
 fame, & vltima punitione, in-  
 signis impostor.



## VATICINIVM XXIII.



## ANSELMVS EPISCOPVS.

Potestas, cœnobia, ad locum pastorū redibunt.  
 Heu misera, sustinens passiones, ciuitas miserabilis,  
 vt appareat, lumen mox tenebit circa paruum tempus  
 sedens. In te omnino effusio sanguinum, vnde denarij  
 incipientes non deficiant, & quinq; principatus à mo-  
 narchia tua Draconem confringent, quem occidit li-  
 lium:

lium: frustatim laniabunt membra illius non cæsa ad pugnam, intestina excitata: & mirabilem multitudinē cædent gladio, ad milliaria sex, septem numerata, & omnis implicitus fornicationes, & cædes maculatus, adulter, raptor, iniustus, sodomita, videbunt lumen ante oculos eius.

## PAVLVS SCALIGER.

*Depingitur Basiliense Concilium, Basileam appellat ciuitatem miseram, & tribulationibus idcirco subiectam, quòd cupiat in ea Concilium elucere, & potius Florentino esse. Propterea inquit lumen mox tenebit, circa paruum tempus. Philippus Dux Mediolanensis enim, agrè ferens Florentinos, adiuuante Eugenio atque adhortante, Franciscum Sfortiam Venetis auxilio misisse, cum his agit, qui in Basiliensi Concilio erant, vt Eugenium citarent: fecere illi id quidem bis terue, Verum cum id ex sententia ei non cederet, eò dementiæ eos perpulit, vt abrogato Eugenio, Amedeum Sabaudia Ducem socerum suum, qui Eremitanam vitam ad Ripaliam cum quibusdam nobilibus ducebat, Pontificem crearent, Felicemque appellarent. Hinc, vt antea dictum est, magnæ seditiones in Ecclesia Dei exortæ sunt. Hoc porrò lumen Pontificatus Felix exiguo tempore gessit, qui, cum pacis & humilitatis amator existeret, mortuo Eugenio Pontifice, illico nullis pulsatus precibus, Nicolao eius successori humanissimè cessit. relictoque nomine Papæ, Cardinalatus honorem retinuit, & à Nicolao Legatus de Latere Germaniæ creatus fuit. Ex Concilio Basiliensi planè effusio sanguinum seditionesque variæ promanarunt. Hinc enim nomine Basiliensis Concilij triremes Gallicæ in Ionium missæ fuerant,*  
aduero



aduersus Eugenium: Hinc direptiones, & perturbationes ditio-  
 nis Ecclesiasticæ: Hinc Philippi erga Eugenium odium, qui Fo-  
 rumliuuium, Imolam, Rauennam, Bononiam tum opera Picenni-  
 ni occupauit, quo cogitata Eugenij disturbaret: Hinc Christiana  
 Respub. trifariam diuisa, & id genus infinita incommoda nata  
 sunt. Vnde denarij incipientes non defecerunt, id est centuriones  
 milites stipendijs conducti, Eugenio nō deerant. Hic enim cogni-  
 ta iniustitia, Delphinum Caroli Francorum regis filium cum ma-  
 gno equitatu in Basilienses concitauit, cuius impetu conuentus il-  
 lico dissipatus est, & quinque principatus à monarchia Basilien-  
 sis Concilij, id est quinque nationes, Hispaniæ, Galliæ, Germa-  
 niæ, Pannoniæ, & Italiæ, Draconem id est Concilium illud sua  
 dispersione confregerunt: quod occidit lilium, id est Delphinus Ca-  
 roli filius dissipauit. Quocirca frustratim membra Concilij lania-  
 ta sunt, quæ ad pugnam cæsa non erant, & intestina excitata, id  
 est terga dantibus nationibus Cardinalibus Concilij, Basilea di-  
 repta & depopulata est, & eorum magnus numerus cæsus, quæ  
 depopulatio & clades, per sex vel septem milliaria continuata  
 fuit, atque illorum fornicatio cædes, adulterium, rapacitas, iniu-  
 stitia, sodomia resecta, ac tandē potestas Pontifici Nicolao red-  
 dita, & legitimis pastoribus à legitimo Pontifice ordinatis, &  
 cœnobijs, atque id genus Ecclesiæ facultatibus præfectis cessum.  
 Itaque ciuitas armatis plena seditionem denotat Concilij Basili-  
 ensis, & Delphini in Basilienses impetum. Valeat igitur Pseudo-  
 magus cum suis ineptijs, qui per hanc ciuitatem Rhomam à Ca-  
 rolo quinto, nec dum nato, expugnatam, designari somniat. Erat  
 quidem tum Rhoma à Columnensibus & Rhomanis pressa, &  
 Philippo Duce Mediolani, qui omnem vim belli in Eugenium, v-  
 bique antea parta pace, conuerterat: nisi Antonij Ridijs, præfecti  
 arcis sancti Angeli sagacitas fecisset: tum tamen neq; expugna-  
 ta, neque

*ta, neque depopulata aut prorsus direpta fuit. Mirum de in 'e est, quòd Pseudomagus hìc fateatur rem pràeteritā, cū tamē hactenus semper futuram inculcauerit, mendacij insigne argumentū.*

VATICINIVM XXIIII.



ANSELMVS EPISCOPVS.

Bona gratia, simonia cessabit.

Vulpinam figuraſti amicitiam, patientem ſenſum  
refrenas, ſicut multum ſenex & canus habens ſenſum.

O

Veniens



Veniens autem dupliciter, Volutiones septies voluntariæ omnes dimisisti, constringendas ad inuicem, & effusiones vallis sanguinum effundendas. Tu propter victoriam expandisti manus bene gratioſo, & brauium accepisti in fine ſceptri.

### PAVLVS SCALIGER.

*Hoc vaticiniũ vigesimo quinto loco ponit Pſeudomagus, autor verò vigesimo quarto attribuit: quo depingitur Nicolaus quintus, Thomas Sarzanus antea vocatus, à Sarzana oppido Lucensis agri, humili loco & familia natus, vno anno Episcopus Bononiensis, Cardinalis, & tandem Pontifex omnium consensu creatus. Vulpinam inquit figurasti amicitiam, id est hic Nicolaus antequam Cardinalis fieret, cum Ioanne Caruagialla, qui postea sancti Angeli Cardinalis est habitus, in Germaniã missus erat, ad tollendum Basiliense Concilium, neutralitatemq̃. Redeunt es itaque ad Eugenium cum hac opinione, quòd castigatis Germanorum postulatis, schisma & neutralitatem, rem quidẽ Rhomanæ ſedi pernicioſiſſimam ſuſtulſſent, ſi ſtare promiſſis Germani ſtatuiſſent & voluiſſent: idcirco ſubclamantibus omnibus, Cardinales decernuntur. Atque ita venit Nicolaus Rhomã dupliciter, ſcilicet Episcopus & Cardinalis, Vulpinam figurauit amicitiam, id est Concilij Baſilienſis vulpinas artes redigere in concordiam conatus fuit, patientia non ſecus, ac ſi ſenio fuiſſet conſectus ſenſum refrenauit, id quod vel in illis diſputationibus, quæ cum Græcis Florentiæ, et Ferrariæ ſunt habitæ, egregiè oſtendit. Hic dedit Rhomæ aurea ſecula, conſilio illuſtris, omniq̃ virtute illuſtrior: doctos excoluit doctior ipſe viros, abſtulit errorem, quo vr bem infecerat ſchiſma. Reſtituit mores, mœnia,*

nia, templa, domos: Cinxit caput & Friderici & coniugis ipsius, aureo honore. Res Italas iuncto fœdere composuit, et Rhomanæ linguae complurima volumina attica prodidit, quæ sexcentis iam antea annis in situ & tenebris iacuerant: misit & literatos viros per omnem Europam, quorū industria libri conquirerentur, qui maiorum negligentia, & Barbarorum rapinis iam perierant. Eleemosynas quoque multas in pauperes erogavit: maxime verò in nobiles, ad inopiam ob varios rerum humanarum casus redactos, Virgines inopes sua pecunia & munificentia maritis collocavit. Avaritiæ admodum expers fuit, ut neque officium ullum vendiderit unquam, neque beneficium Simoniaca prauitate ductus ulli collocauerit. Gratus erga de se, et Ecclesia Dei meritos, amator iustitiæ, pacis auctor, et cōseruator: clemens in delinquentes, Ceremoniarum diligentissimus obseruator, nihil quod ad diuinum cultum pertineret omittens. Rectè igitur prædixit Anselmus in hoc Pontifice bonam gratiam, & Simoniam cessasse. Septies sponte legatos misit ad Alphonsum regem, Philippū Ducem, Franciscum Sfortiam, Venetos, & reliquos Italiæ Principes ad componendam pacem, sedandos exacerbatos animos, & impediendam profusionem sanguinis. Tandem pacatis rebus Italiæ, expandit manus, ut, si quæ deinceps dissensio discordiæ inter eos orta esset, eius tollendæ ius potestatemq; Pontifex haberet: utq; qui arma alteri intulisset, cognita à Pontifice caussa, is statim communis omnium hostis haberetur. Proinde benè gratiosus, veluti qui in fine sceptri brauium obtinuit, habitus est. In fine autem sceptri ait, quia paulò post, ubi audierat Constantinopolim captam, & Imperatorem Græcorum trucidatum, fatis concessit. anno pontific. sui octauo, 1455. Iam imago constat, Pontifici enim hic vulpes vexillum & clauas defert, id est Felix quintus, qui dolo Philippi Ducis Pontifex in Concilio Basiliensi



liensi fuit creatus, hortante Friderico Imperatore, pontificatu se sponte abdicauit. Quamobrem Nicolaus erga Amadeum vsus est hac benignitate, ad hominem namque galerũ Cardinalatus misit, eundemq; Legatum Germaniæ fecit, ne omnino sine dignitate viueret. Valeat ergo Pseudomagus cum suo termino, & similibus nugis.

## VATICINIVM XXV.



ANSEL-

## ANSELMVS EPISCOPVS.

Potestas & vnitas imminuetur.

Væ tibi ciuitas septicollis, in qua R. litera laudatur, In mœnibus tuis tûc appropinquabit casus, & destructio tuorum potentium & vindicantium iustitiã, quæ habet digitos tuos falcatos, est falx desertitudinis: & in altissimis blasphemabût, syncopa cadit sanguis: Iohannis bona gratia, Constantinus, pauper eris, Vide autem tu qui sancta consideras, & sancta ferens super humerum, ne puluis tuus fiat opprobrium. In barba profunda iustè incidet, & maximè vituperaberis. Item consiliarius mortis cuius nomen Ca. Bo.

## PAVLVS SCALIGER.

*Hoc vaticinio indicatur excidium Constantinopolitanum. Væ inquit tibi septicollis ciuitas in qua R. litera laudatur, id est Rhoma quæ septem colles cõtinet. In mœnibus tuis tunc appropinquabit casus, id est res tua agitur, dum proximi paries ardet. Potentes tui cadent, qui vindicant iustitiam. Græci enim dum imperabant & pro iustitia, id est Christiana Religione & libertate propugnabant, benè cum Rhomanis agebatur. Habebat enim Græcia Rhomanorum digitos falcatos, id est Græci Rhomanis aduersus Thurcam pro falce erant: iam verò ipsi facti sunt falx deserti, in cuius altitudine, id est imperio, dominatur nunc blasphemia, id est fœda Thurcorum gens, & infidelis. syncopa cadit sanguis. Iohannes bona gratia Constantinus, pauper eris, id est abscissus atque è medio sublatus est Constantinus, Iohannis bona gratia, tanquam fratris successor,*  
O 3 propter



propterea quia à Rhomanis vicinis, iunctis fœdere Christiano, derelictus nil habuerit auxilij: quæ res Nicolao quinto mortem acciuit. Quocirca minatur Rhomæ inquit, Vide autem tu Rhoma circa sancta, id est reliquias sanctorum occupata. ne pulvis tuus, id est populus, æquè opprobrio ac Constantinopolis fiat. In barbam enim profundam incidet, id est primò Longobardiâ peruat, cuius præcursor Philippus Dux est. & tunc maximè vituperaberis, id est tunc cumulabitur in te summa blasphemia. sed id fore consilio inquit, cuiusdam consiliarij mortis cuius nomen Ca. Bo. Fortè innuit, quòd sub Clemente Carolus Borbonius, exercitus Caroli quinti primarius Dux Rhomam occupauit, sed non sine graui iactura: ipse Borbonius enim cecidit, idcirco appellat illum Anselmus consiliarium mortis, cuius interitus militum animos, quibus erat charissimus, grauissimè irritauit. Quare militaris insolentia, quam cæterorum Ducum autoritas compefcere nō satis poterat, plurima petulantissimè designauit, acerba auditu ijs, qui Apostolicæ sedi synceriter adhærent. Pontifex qui confugerat in Castrum S. Angeli aliquot pōst diebus, cū arctius premeretur, se dedit, quæ tamen omnia gesta sunt Cæsare nesciente: sicut postea res ipsa testatum fecit. Iam imaginis sensus difficilis esse nequit. Ciuitas hæc Constantinopolis est, in qua digiti Romanorum, siue manus ipsæ abscissæ, id est potentia imminuta est: sunt autem depictæ tres alterutrinque, propter violatam fidem, qua Rhomani Græcis succurrere tenebantur, idq; in virtute triadis, quam homoufion confessi Eugenio fuerant. Valeat ergo insanus Pseudomagus, cum sua Nurenbergensi imagine: hanc ille vigesimo quarto loco ponit, cū autor illam statuatur vigesimo quinto.



ANSELMVS EPISCOPVS.

Bona operatio, thesaurū pauperibus erogabit.

Et reuelabitur virtus, qui habet pronomen monachi, petram habitans. Eia, venit mihi relinquens, iustū agrestem, & gemebundus congregans bona, dissipans omne brauiū iniquitatis, & iniustificatū. Quādo maior stella apparebit nigra? nudus itē vade ad inferiora terrę.

PAV.



## PAVLVS SCALIGER.

Depingitur hic Calixtus, Alphonsus cognomine, Boria antea vocatus, patria Satiuensis, Cardinalium suffragijs Pontifex creatus, qui in omni vita integerrimus fuit, et eleemosynas Christi pauperibus frequentes erogabat, propterea illi Anselmus bonam tribuit operationem, & thesauri in pauperes erogationem, Et reuelabitur, inquit, virtus illius, qui habet pronomē monachi, id est qui veri monachi vitam & mores retinebit. Hic enim fuit in victu parcus, in sermone modestissimus, facilis aditu, quantum ei per ætatem licebat: iam enim octogesimum attigerat annum: nec tamen de studijs suis quicquam remiserat, legebat ipse, aut legentes audiebat, si quid in tanto rerum fastigio ei temporis supererat. Officium transfigurationis Domini nostri Iesu Christi ipse composuit. Tantæ denique fuit sanctitatis, ut non dubitauerit Vsumcassanus Persarū & Armenia princeps, superatis persæpè hostibus, ad ipsum scribere, se quidem victoriam ex hoste reportasse, ob preces ab eo ad Deum habitas, eiusque beneficij diuini potius, quàm humani se aliquando memorem futurum. Itidem & Ioannes Scaliger, Hunnorū princeps, & Dux militiæ Hungarorum, cum Ioanne Capistrano, crucem pro vexillo hostibus inferente, ad Bellogradum contra Thurcos dimicantes precibus Calixti & Christianorum tribuebant, & Bellogradum ingenti clade superarunt. Sex enim hominum millia ex hostibus interfecta sunt, cum parua nostrorum manu. Quare Thureus perterritus Constantinopolim properè se recepit. Actum de crudelissimo genere tum certè fuisset, si Christiani principes, omisis intestinis bellis & odijs, terra ac mari tantam victoriā prosecuti fuissent, quemadmodum Calixtus prædicabat & monebat. Quo fit ut rectè Anselmus de huius Pontificis sanctitate vaticinatus sit, Petram

tram inquit illum habitaturum, quia in palatio diui Petri, id est Ecclesia Christi, vera petra, habitauit firmus. Hic venit Ecclesiae optatus, iustus, & sollicitè congregans bona, aduersus Christiani nominis hostes. Quamobrem Praedicatores per vniuersam Europā statim misit, qui omnes Christianos in Thurcos animarent, suisq; opibus profectionem adiuuarent, sedecim proinde triremes Rhomae edificatas in hostem misit, Patriarcha Aquilegiensi praefecto, qui triennio maritima hostium Asianorum vexauit, Insulas quasdam cepit, & magnas calamitates hostibus intulit. Alphonsus rex, & Burgundiae Dux Crucis signum suscipientes, ituros se in hostem profitebantur, vel armatos milites missuros. Sacerdotibus propterea aliquot dierum supplicationes decreuit, mādauit praeterea vt assiduo rogatu Deus flecteretur: circa meridiem campanis signum dari iussit fidelibus, vt orationibus eos iuuarent, qui contra Thurcos cōtinuò dimicabant. Quocirca etiam officium transfigurationis, vt dictum est, instituit, ac dissipauit omne brauium iniquitatis & iniustitiae prorsus abrogauit. Reliquit centum & quindecim millia nummū aureorum, quos in vsus bellicos contra Thurcos comparauerat, sub ipsa Eclipsi mortuus est pontificatus sui anno tertio, mense tertio, die decimo sexto. Idcirco praedixit Anselmus, Quando maior stella apparebit nigra, nudus item vade ad inferiora terrae. Propterea etiam nudus super saxum durū depictus est, cui adstat alius sui ordinis, id est Dominicus sanctae Crucis Cardinalis, & summus poenitentiarius, vir quidem grauis & sapientissimus, qui & ipse, dum Calixti funus celebrarent, moritur. Valeat ergo Pseudomagus cum sua egestate.



## VATICINIVM XXVII.



## ANSELMVS EPISCOPVS.

Bona intentio, charitas abundabit.

Mortuus quasi non videtur, & nunc oblitus eius  
 aspectus: nouerunt eum multi: quamuis nullus iustū  
 videat: à deitate & oriente manifestatus, ex insperato  
 scepra tenebit istius imperij. Stylus manifestatus in  
 coelo,

coelo, præco inuisibilis ter clamabit maximè, Ite cum festinantia ad Occidentem septicollis, & inuenietis virum habitatorem, amicum meum, fortem, nō in regia domo, caluum, iustum, mansuetum & mitem, ac altæ mentis, acutissimum ad videndum futura præcipuè, Iterum habebit septicollis imperium.

PAVLVS SCALIGER.

*Describitur hic Pius secundus, Aeneas Syluius, cognomine Picolhomineus antea vocatus, natione Italus, Senis Oriundus, Corfiniani ortus patre Syluio, matre Victoria, patrum omnium consensu Pontifex creatus, cuius pater à plebe Senensi cum reliqua nobilitate è Republica deiectus, ad fundum gentilitium Corfinianum vallis Vrciæ oppidum se contulit, infantemque eo loci ex vxore suscepit. Hic tandem ad literas animum applicuit, singulari memoria, & summa docilitate præditus, parcè adeò ac duriter vitam duxit, vt omnia ruris officia ob inopiam adire sit coactus. Hinc est, quod Anselmus ait, Mortuus quasi non videtur, & nunc oblitus eius aspectus: nouerunt multi, quamuis nullus iustum videat, Quasi dicat, abiectus esse videtur, & in ignoratione hominum versari, licet genus illius multis constet, nemo tamen iustum videt, qui ad tantum fastigium euehetur. Deinde dicit, hunc habitatorem ad Occidentem septicollis, non esse in regia domo, sed caluum, id est spoliatum, eiectum, veluti qui non in palatijs, sed ruri vitam inopem agere didicerit. Idcirco cum Senis iuri ciuili operam nauaret, à necessarijs & cognatis adiutus fuit, neque id, propter subortum inter Senenses & Florentinos bellum, caritatem annonæ veritus, & nobilitatem*



plebi Senensi suspectam cernens, diutius continuare potuit: ideoque voluntarium sibi velut exilium adsciuit, secutus amplissimū virum Dominicum Capranicū, qui tum Senis iter faciens ad Basilienſe Concilium proficiſcebatur. Quò cūm perueniſſet, cum Bartholomæo Nouarienſi Episcopo Florentiam, vbi Eugenius Pontifex erat, delatus eſt, & in Nicolai ſanctæ Crucis Cardinalis clientelam inſinuatus, patris certè optimi, ac omnium opinione ſanctiſſimi. Deinde factus eſt ſcriba in Synodo Baſilienſi, & literarum Apoſtolicarum abbreviator, magnoq; in honore ſemper apud omnes habitus, et inter Collatores beneficiorum bis electus: in eoq; conuentu perſæpe orauit, & quoties aliquid per nationes agendum erat, vius ſemper ex Italica deligebatur, qui rebus agendis præeſſet: tanta erat in homine morum facilitas, & ingenij dexteritas. Legationes verò plures Concilij cauſſa obiuit. orator deinde ad Fridericum Imperatorem à Felice miſſus, tantū dexteritate ingenij apud hominem valuit, vt eum corona Poetica donatum in amicos, & Protonotarium receperit, ac tandem in ſenatorium ordinem retulerit: qui poſtea ad Eugenium nomine Imperatoris legationem obiuit. Mortuo autem eo tempore Eugenio, dum alter Pontifex in locum demortui ſuffragijs patrum deligitur, Aeneas conclaui præfuit: nullus enim orator tum in vrbe erat, tanto munere dignior. Interea moritur Episcopus Tergeſtinus, in cuius locum Aeneas, ſe quidem inſcio, à Pontifice, & Imperatore ſuffectus eſt. Hunc poſtea Imperator in Italiam iter ingreſſus præmiſit, vt Leonora vxori è Luſitania, vel Portugallia ad Hetruſcum littus peruentura honoris gratia obuiam fieret: quam vni ſibi creditam ad Imperatorem, qui tum Senis erat, perduxit, Rhomam deinde tum proficiſcens, priuatim & publicè (dum Cæſar Imperij corona donaretur) egit omnia. Imperator prætereà ad Alphonſum ſalutandi hominis cauſſa iturus,

La-

*Ladislauum regium adolescentem, quem Pannonij, & Bohemi furtim à se abducere sæpe tentauerāt, Rhomæ sub tutela, & custodia Aeneæ, cui plurimam fidem præstabat, reliquit. Tandem Imperator Rhomam reuersus, cum gratias Pontifici egisset, in Germaniam proficiscitur, quam vbi attigisset, Aeneam statim ex mandato Pontificis, cum summa potestate oratorem in Bohemiam, & omnes Austriæ ciuitates mittit, ibiq; rebus compositis, haud ita multò post ad conuentum Ratisponensem, ac demum ad Francofordiensem ablegat. Postea mortuo Nicolao Pontifice, Germani ferè permouissent Imperatorem, quo minus Pontificibus amplius obtemperaret, nisi quædam ad pragmaticam tendentia ab ipsis prius impetrassent. Nec certè multum absuit, quin Imperator tumultuantibus obsequeretur. Quo minus autem id fieret, grauissima Aeneæ autoritas intercessit. Quocirca Imperator, spreta populorū postulatione, Aeneam oratorem deligit, qui ad Calixtum mitteretur, & Friderici iuramentum Pontifici de more exhiberet: tota eius oratio autem fuit potissimum de bello Thurcis inferendo: adeò erat ad eam rem animatus. Iussu quoque Pontificis Neapolim ad Alphonsum proficiscitur, quò etiam totius ferme Italiæ Legati de pace acturi conuenerant, & solus impetrauit pacem, ac perpulit regem, copiosissima oratione, ad bellum maritimum Orientalibus inferendum. Inde verò Rhomam abiens iter in patriam facturus, à Calixto Pontifice retentus est, à quo etiam non multò post patrum omnium consensu in numerum Cardinalium refertur. Apud Calixtum verò tantæ autoritatis & gratiæ fuit, vt hominem impulerit oratores ad Senenses mittere, qui tum discordia ciuili laborabant, vt populum tumultuantem ad pacem & concordiam adhortarentur. At verò dū in balneis Viterbianis valetudinis caussa esset, historiamq; Bohemicam inchoasset, mortuo Calixto, Rhomam statim redijt:*



cuius expectatio tanta fuit, vt magna pars populi Rhomani, officij causa obuiam progressa, hominē (quasi diuinarent) vt Pontificem salutant. Ad hunc enim consensu omnium Pontificatus deferebatur. Ingressus itaque conclaue, patrum omnium suffragijs Pontifex maximus creatur. Hinc iam prophetia Anselmi clarè cernitur, quomodo abiectus & spretus Aeneas in aspectum hominum venerit, idq; præter expectationem. Deinde quomodo à deitate & Oriente, id est diuina prouidentia, ab Austrie principe, Friderico Imperatore, multis legationibus & munijs, quæ imperatorio nomine obijt, manifestatus sit, & præter suam opinionem sceptrum pontificatus obtinuerit subito. Stylus enim in cœlo manifestatus, id est vniuerso orbi Aeneas tanquam columna & asylum pacis & sanctitatis innotuit. Præco inuisibilis, id est vox Dei, ter clamauit maximè, hoc est primò per Calixtum, qui illum consensu omnium Cardinalem declarauit: secundò, mortuo Calixtò, per populum Rhomanū, qui illi ex thermis Rhomam properanti obuiam tanquam Pontifici facti sunt: tertio, suffragia omnium patrum in conclaui, quibus Pontifex creatus est. Hæc omnia inuisibilis ille præco maximo clamore, & quidem properè egit. maximus clamor est, Pontificis maximi: maximus clamor est, populi Rhomani: maximus item clamor suffragia omnium patrum. Festinantem hanc vocationem fuisse manifestum est, quia à Calixto Cardinalis factus, vixdū Viterbianas thermas ingressus erat, cū Calixti obitum accepit, & statim Rhomam redijt, quem populus vt Pontificem salutauit: mox conclaue ingreditur, & Pontifex maximus salutatur omnium patrum vnanimi consensu. Quid ergo clamauit ter præco inuisibilis? Itē cum festinantia ad Occidentem septicollis, & inuenietis virum habitatorem: id est virum, quem pontificatu decorare debeatis, oriundus est ab Occiden-

ciden

cidente iuxta situm Rhomanum. Senæ autem, si Rhomā spectes, ad Occidentem posita sunt. Ite, ergo inquit, Senas, ite ad ther-  
mas siue balneas Viterbianas: Hinc vocate amicum meum, &c.  
Hunc Pontificem appellat amicum suum, id est pium, unde  
& re, & nominis Pius fuit: appellat fortem, quia magni animi,  
veluti qui se totum, confirmata prius Ecclesiæ ditione, ad curam  
Reipub. Christianæ conuertit. Nam & bellum ante eius pontifi-  
catum in Vmbria exortum, eo Pontifice sublatum est: Assisina  
& Nuceria ab hoste recepta. Inter Ferdinandum regem, & Si-  
gismundum Malatestam, quod difficillimū factū videbatur, com-  
positæ induciæ. Media hyeme ab vrbe discedit, & per eas ciuita-  
tes iter facit, quæ civili discordia ad bellum potius, quàm ad pacē  
spectare videbantur, atq; populos ad concordiam & quietem ad-  
hortatur: Mantuā postremo vndequaq; ventū est, & in illo cele-  
berrimo conuentu actum, Pio ipso dicente, vt bellū communi om-  
niū decreto Thurcis indiceretur. Nil est certè ab eo prætermissū,  
quod ad mouendos Christianorū animos pertineret. Magna qui-  
dē in dicendo Pij laus fuit, quod cū sæpius ysdem de rebus loque-  
retur, diuersa semper visus est dicere: tāta erat in homine elegan-  
tia et copia. Gallorū querimonias et calumnias, tribus actionibus  
acerrimè cōfutauit. Totā Europā, relicto externo bello, ad inte-  
stinū animos atq; arma conuertentē, ad pacē redexit & sedauit.  
Neminē vnq; bello attigit, ad quē legatos non prius miserit, si quo  
modo ad sanitatē rationibus adduci posset. Minas Gallorū et pol-  
licitationes facile cōtempnit. Sigismundi Malatestæ Eccl. Rho. ve-  
tigalis furores ac rabie compressit. Ac ita grauiß. bellis libera-  
tus, postq; et Ferdinandus de Renate triumphasset, expeditionē  
Asiaticam, q̄ in Mantuano cōuentu, regū ac principū ambitione,  
& auaritia fuerat omiße, repetit: Regi Bohemiæ de fide Catho-  
lica malè sentienti diē dicit. Tanta inq; constantiæ et fortitudinis  
fuit,



fuit, vt tota ægritudine, graui quidem & longa, occupationes intelligendi, cauſas diuerſarum gentium audiendi, inhibendi, discernendi, iudicandi, ſignandi, admonendi, caſtigandi intermiſerit nunquam. Non reges, non Duces, non populos, non tyrannos, in ſe, aut Eccleſiaſticum quempiam delinquentes, bello, cenſuris, interditiſ, execrationibus perſequi prius deſtitit, quàm eos ad ſanitatē rediſſe cognouerit. Nil regibus, nil ducibus, nil populis timore & auaritia conceſſit vnquam. Quosdam verò ſeueriſſimè arguit, quòd ea peterent, quæ ſine Eccleſiæ detrimento, & eius ignominia fieri nullo modo poſſent. Tantum terroris dominis quibuſdam, Italicis præſertim, iniecit, vt officio & fide nil antiquius ducerent. Vt hoſtes publicos conſtanter perſecutus eſt, ſic amicos humaniſſimè & officioliſſimè fouit. Fridericum Rhomanorum Imperatorem, Matthiam Scaligerum Hungarorum regem, Ferdinandum Alphonſi filium, Philippum Burgundum, Franciſcum Sfortiam, Ludouicum Gonzagam vehementer dilexit. Viuendi rationem ita partiebatur, vt ocij & deſidiæ accuſari nullo modo poſſet. Surgebat manè aurora illuſcente, et habita ratione valetudinis, ac re Diuina caſtè & piè facta, ad negocia publica ſtatim egrediebatur. Functus officio, ac per hortos recreandi animi gratia delatus prandeat, mediocri cibo utebatur, non exquiſito & lauto, cibos rarò ſibi apparari iuſſit, quod apponebatur hoc edebat. Vini parcifſimus: dilutiq; ac lenis magis quàm aſteri amator. Sumpto cibo, dimidium horæ cum domeſticis aut fabulabatur, aut diſputabat. Cubiculum deinde ingreſſus, cùm paululum quieuiſſet, horis Canonicis de more repetitiſ, tam diu legebat, aut ſcribebat, donec ei per munera publica licuiſſet. Idem faciebat noctu, quod die, poſt cœnam: Nam & legebat, & dictabat, vſque ad multam noctem in lecto iacens, nec amplius quàm horis quinque aut ſex quieſcebat. Aſpectu ſeueritatem, ſacilitate

cilitate conditam ostendebat. Circū cultum corporis, neque morosus neque negligens, laboris patiens habebatur. Sitim æquo animo, & famem tolerauit. Habuit morbos familiarissimos tussim, calculum, & podagram. Aditu, etiā dum ægrotaret, facilis erat, verborum parcus, inuitus petita negauit. Pecuniarum quantum collegit, tantum erogauit: quarum neque studiosus, neque aspernator fuit. Dum numerarentur, dum reponerentur, interesse nunquā voluit. Multos, muneribus aulicis, & beneficijs Ecclesiasticis inuit, literatos dico. Orantes, aut poemata recitantes, libenter audiuit: eorumq; iudicio, qui aliquid sapere viderentur, sua scripta commisit. Mendaces & delatores odio habuit, iram facile collegit, collectam facillimè repressit. Lacescentibus eum conuijs, & dictis petulantioribus constanter ignouit, nī Sedi Apostolicæ facta esset iniuria: cuius dignitatem adeò acriter tutatus est semper, vt eius causa magnorum regum ac principum graues inimicitias frequēter suscepit. Erga domesticos mira comitate & facilitate utebatur. Nam quos vel inscitia, vel ignauia deliquisse deprehendisset, paterna charitate admonebat. malè de se opinantes, vel loquentes cōercuit nunquam: liberè enim in libera ciuitate loqui omnes volebat. Querenti, nescio cui, apud se, quòd malè audiret, respondit: De me quoque, qui malè sentiant, si in Campum Floræ profiscisceris, multos audies. Rara veste utebatur, & argento frugali magis, quàm regio. Eius enim voluptas omnis, quando à numere publico vacabat, in lectione & scriptione frequenti reposita erat. Libros plus quàm sapphiros & smaragdos charos habuit, quibus Chrysolitorum magnam copiam inesse dicebat. Mensam autem artificiosam ita contempsit, vt ad fontes, ad nemora, ad loca agrestia delatus, quæ sæpe frequentabat animi causa, nō apparatu pontificio, sed humili ac propè rusticano sit vsus. Non libenter solus comedebat. Inter cœnandum

Q destu-



de studijs bonarum artium loquebatur, memoriam veterum repetebat: & quid quisq; laudis vel dicendo, vel scribendo consecutus esset, exquisito iudicio ostendebat. Ad virtutem suos frequenter adhortabatur, à vitijs deterrebat, cùm eorum res gestas commemoraret, qui in vita aut rectè, aut perperam egissent. Homo fuit verus, integer, apertus, nil habuit ficti, nil simulati. Christianam autem religionem ita coluit, & observauit, vt omnem prorsus hypocrisis suspicionem à se remoueret, frequenter confitebatur, & communicabat. Rem diuinam aut ipse faciebat, aut dum fieret, obseruatis de more ceremonijs omnibus, astabat. Somnia, portenta, prodigia, contempsit semper. Fulgura procurauit nunquam. Geomantibus, & cæteris id genus, nullam fidem adhibuit, timiditatis & inconstantie signum nullum in homine cognitum. Extolli secundis rebus, & perturbari aduersis nunquam visus est, suos plerunque vt timidos & formidolosos reprehendit, quod acceptas clades (vt in bello contingit) apertè ei denunciare vererentur. Incommodis enim consilio, & manu mederi posse dicebat, si id tempus, quod accidisset, scitum foret. Socios belli, vel magnitudine impensæ, vel hostium potentia perterritus deseruit nunquam. Bella suscepit, inuitus tamen, & multis, & maximis iniurijs laceßitus, pro tutela Ecclesiæ, pro defensione religionis. Eo die, quo è vita migravit, duas horas ante extremum vitæ spacium patres Cardinales ad se vocatos, constanti animo, & voce non inconcinna, ad concordiam in eligendo nouo pontifice adhortatus est, quibus item honorem summi Dei, dignitatem Ecclesiæ Rhomanæ, bellum à se in Tburcos susceptum, salutem animæ suæ, familiam omnem, nepotes verò maximè, si commendatione dignos se præstiterint, constanti ac graui oratione commendauit. Petijt sponte sacramenta omnia, & signa.

gna integerrimi Christiani omnibus in rebus præse tulit. Prætereà verò acerrimè tum quidem disputauit, cum Laurentio Rouerella Episcopo Ferrariensi, theologo doctissimo, Liceretne extremam vñctionem iterare, qua semel inunctus fuerat, dum Basileæ pestilentia grauissimè agrotaret. Orationes Canonicas, vt intermitteret in tanta animi anxietate, neque domesticorum quidem precibus exorari potuit. Symbolum Athanasij constanter pronunciauit: & pronunciatum verissimum ac sanctissimum esse dixit: non mortem exhorruit, non perturbationis, aut inconstantia, dum supremum spiritum efflaret, signum aliquot edidit. Extinctus profectò magis, quàm mortuus, dici potest. Affirmant polinctores, viuacissimum cor in homine inuentum. Mortuus est Anconæ anno sexagesimoquarto supra quadringentos & mille, decimoseptimo Calendas Septembris horam circiter tertiam noctis, anno pontificatus sui sexto, diebus sex minus. Hinc iam abundè satis constat, quod de hoc pontifice optimo prædixit Anselmus, idque ex Rabano, illum pium fuisse, fortem, iustum, mansuetum, & mitem, atque prudentem, veluti qui præterita diligenter recognosceret, præsentia sedulò pensaret, & futura pernecitate quadam diuini ingenij prospiceret. Verè ergo in hoc pontifice septicollis, id est Rhoma, habuit imperium, & bonam intentionem, atque charitas abundauit. Idcirco etiam depingitur hic papa, coronam suam, à capite suo deponens, eamque sibi commissis ouibus dans & impertiens. Vtinam non tam pontifices, quam vniuersus clerus, hunc optimum, maximum pontificem, & patrem vniuersæ Ecclesiæ, id quod noster optimus maximus pontifex Pius quintus sedulò facit, imitentur, & eius vestigia insequantur, nihil quicquam dubitarem, quin Ecclesiæ simul cum ordine rediret pristina tum dignitas, tum tranquillitas, ad omnipotentis Dei gloriā, & accederet



ei labascenti, quod accessit nascenti, videlicet timor principibus, qui sic Rempub. administrarent, tanquam breui regi regum de singulis rationem reddituri: prophetiæ donum pastoribus, charitas triplex, quam dominus à Petro stipulatus est, ouium curam illi demandaturus: hanc certè in optimo hoc pontifice perspicuè cernimus: Sacerdotibus sobrietatis & castitatis amor: populo bona voluntas obtemperandi præceptis diuinis, ac promptitudo obsequendi ijs, per quos iuxta suum animum Deus voluit res humanus administrari. Quis det viuere vt id videre contingat? O si viderem in vita mea, Ecclesiam Dei talibus innixam columnis. O si domini mei sp̄sam cernerem tantæ commissam fidei, tantæ creditam puritati. Quid me beatius quidue securius? cùm eiusmodi circa me vitæ meæ & custodes spectarem simul & testes: quibus omnia mea secreta securè committerem, communicarem consilia: quibus me totum refunderem, tãquam alteri mihi. Qui si vellem aliquatenus deuiare, non sinerent, frenarent præcipientem, dormitantem suscitarent: quorum me reuerentia & libertas extollem reprimeret, & excedentem corrigeret, quorum me constantia & fortitudo nutantem firmaret, erigeret diffidentem: quorum me fides & sanctitas, ad quæq; sancta, ad quæque honesta, ad quæq; amabilia, & bonæ famæ prouocaret. Vt autem ex plurimis huius optimi pontificis scriptis, in multos libros multa. que volumina digestis, saltem aliquem gustum illius candoris & pietatis habeas, ex sententijs, quas in prouerbij modum reliquit multas, partem aliquam, quod ad institutionē humanæ vitæ pertinere visæ sunt (quam ob rem & nos hunc laborem suscepimus) subiungere institui.

Diuinam naturam credendo melius, quàm disputando intelligi, ac comprehendendi posse dicebat.

Omni sectam autoritate firmatam humana ratione carere.

Chri-

*Christianam fidem, etiamsi miraculis non esset approbata, honestate sua recipi debuisse.*

*Vnius diuinitatis tris esse personas, non qua ratione probetur, sed à quo dicatur, animaduertendum.*

*Mortales mēsores cœli & terræ, audaces magis videri, quàm veros.*

*Siderum inuestigare cursus, pulchrius esse, quàm vtile.*

*Amicos Dei & hac, & futura perfrui vita.*

*Sine virtute nulli solidum esse gaudium.*

*Neq; auarum pecunia, neq; doctum cognitione rerum unquā repleri.*

*Cui plura nosse datum est, eum maiora sequi dubia.*

*Plebeis argenti, nobilibus auri, principibus gemmarum loco, literas esse debere.*

*Bonas medicos non pecuniam, sed bonam valetudinem ægroti querere.*

*Artificiosam orationem stultos, non sapientes flectere.*

*Sanctas esse leges, quæ vaganti frena licentiæ imponunt.*

*In plebem vim habere leges, in potentes mutas.*

*Res grauiiores armis, non legibus diffiniri.*

*Urbanus suam domum ciuitati, ciuitatem regioni, regionem mundo, mundum Deo subijcit.*

*Lubricum esse primum apud reges locum.*

*Vt in mare flumina omnia, sic vitia in magnas aulas fluere.*

*Assentatores maximè, quò volunt, reges ducere.*

*Nulli magis principes aures, quàm delatori præstare.*

*Pessimam regibus pestem adulatoris linguam.*

*Regem, qui nulli fidit inutilem esse: nec meliorem, qui omnibus credit.*

*Qui multos regit, à multis regatur oportet.*



*Non esse regio nomine dignum, qui suis commodis publica me-  
titur: neq; qui sacra neglegit, Ecclesiæ prouētum: neq; regem qui  
iuri dicundo non assidet, vectigalia digna petere.*

*Litigatores, aues: forum, arē: iudicem, rete: patronos, aucu-  
pes dicebat.*

*Dignitatibus viros dandos, non dignitates hominibus.*

*Magistratus alios mereri & habere: alios habere & non me-  
reri.*

*Graue pontificis onus, sed beatum ei qui benè fert.*

*Indoētum Episcopum a sino comparandum.*

*Corpora malos medicos, animas imperitos sacerdotes occidere.*

*Vagum Monachum Diaboli mancipium esse.*

*Virtutes Clerum ditasse, vitia pauperem facere.*

*Sacerdotibus magna ratione sublatas nuptias, maiori resti-  
tuendas videri.*

*Fideli amico nullum thesaurum anteferendum.*

*Vitam amico, inuidiam morti comparandam.*

*Hostem in se nutrire, qui nimis filio ignoscit.*

*Nulla in re avarum placere hominibus, nisi in morte.*

*Vitia hominum liberalitate obtegi, nudari auaritia.*

*Mentiri seruire vitium esse.*

*Vini vsum & labores, & morbos auxisse mortalibus.*

*Vinum quod mentem excitet, non quod obruat sumendum.*

*Libidinem ætatem omnem fœdare, senectutem extinguere.*

*Quietam vitam non aurum ipsum, non gemmas præbere.*

*Dulce bonis, durum iniquis, mori.*

*Generosam mortem turpi vitæ, omnium philosophorum sen-  
tia, anteferendam.*

*Hæc & similia multa prouerbia Pius secūdus solebat in me-  
dium proferre. Valeat ergo Chimæra pseudomagi.*

VATICINIVM XXVIII.



ANSELMVS EPISCOPVS.

Præuaricatio concordia erit.

Ecce iterum homo de primo genere abscondito intrans, simul nudus venit de petra tenebrofa, & secundus splendentem incipit vitam, imago secundæ vitæ: verissimè tantùm solidè solidus duplicatorum annorum introibit mortuus petram.



## PAVLVS SCALIGER.

Describitur hic Paulus secundus, Petrus Barbo antea vocatus, patria Venetus, pontifex creatus prid. Calend. Septembris 1464. quem Anselmus dicit esse de primo genere abscondito. Eugenij enim pontificis ex sorore nepos erat: Hic nudus venit de petra tenebrosa, id est de vrbe Veneta, quæ tenebrosa est, partim propter aquas, partim propter mercaturam, partim propter tyrannidem, quibus rebus candor petræ Petri, atque etiam imperij obscuratur, tum quod diuites difficilè regnum Dei apprehendant, tum quod omnia rapinis, dolis, fraude, & tyrannide Veneti, eiectis & pulsis veris dominis, & heredibus, ac Imperij principibus, cōtra Dei & Ecclesiæ doctrinam, naturæq; & legum omnium constitutiones, possideant: quocirca Venetiæ meritò dicuntur tenebræ, & Ecclesiæ & Imperij. De vrbe ergo Veneta, ex mercatura, prorsus indoctus, venit iste Paulus. Adolescens enim adhuc iturus in mercaturam erat, & iam scrinium & arma in triremes detulerat, cū ei nunciatum est, Gabrielem Condelmarium, auunculum suum pontificē creatū esse. Substitit itaq; adhortantib. amicis, & Paulo Barbo maiore natu, ac literis licet iam adultus esset, operam dedit: nec tamē ob ætatem admodū profecit: qui quoniā potius quietem, quā negotia appetebat, opera fratris Pauli, apud Eugenium sollicitantis, Petrus ab Eugenio auūculo vocatus, Archidiaconus Bononiensis, ac nō ita multo pōst Episcopus Ceruiæ, & Protenotarius creatus est. Quibus facultatibus aliquot annis vitā ducens, tandem Cardinalis creatur, instantibus quibusdā Eugenij familiaribus. Ita ergo nudus bonis artib. & virtutibus, de petra tenebrosa accitus fuit, & tandē successit Pio secundo & ipse sibi Pauli secūdi nomē deligēs,

licet

licet dissimilis moribus, splendentem vitam agere cœpit, imaginem saltem secundæ vitæ, id est Pij secundi, non rem retinens. Nam statim ubi magistratum inijt, siue quòd ita pollicitus erat, cùm permutare Episcopatum Vincentinum in Patavinum, obstante Pio non potuerit, siue quòd Pij decreta & acta oderat, abbreviatores omnes, quos Pius in ordinem redegerat, tanquam inutiles & indoctos (vt ipse dicebat) exautorauit, & bonis atque dignitate, indicta caussa, spoliauit: quos etiã propter eruditionem, & doctrinam ex toto orbe terrarum conquisitos, magnis pollicitationibus, & præmijs vocare ad se debuerat. Si quis illorum prouocabat ad publicos iudices (quos Rotæ auditores vocant) hunc ille toruis oculis aspiciens, Ita nos, inquit, ad iudices reuocas? ac si nescires omnia iura in scrinio pectoris nostri collocata esse? sic stat sententia, inquit: loco cedant omnes, eant quò volunt, nihil eos moror, Pontifex sum, mihiq; licet pro arbitrio animi aliorum acta & rescindere, & approbare. Hic prætereà nihil nisi noctu agebat. Multos innocentes in exilium egit, multos carceribus mancipauit, quæstionibus subiecit: multos etiã Canonicos viros pios suis Canonicatibus se abdicare impulit: licet quidam eius minas contemnentes, tempus vindicandæ libertatis expectarint: quod postea eo mortuo eluxit. Scarampos magnis facultatibus spoliauit. Auersanos comites oppressit, & nouem castellis exuit. Frigidæ caussas prætendebat quibus iniurias inferret. Nam & eos pro hæreticis habebat, qui nomen Academiæ vel seriò, vel ioco commemorarent. Omnia ferè dolo et insidijs aduersus omnes agebat. Ideo inquit Anselmus, præuaricatio concordia erit. Vnde abundè patet Paulum secundum, neque Eugenij auunculi, neq; Pij secundi mores, quin potius imaginẽ quandam nudam pontificatus retinuisse. Vitam splendentem illũ duxisse historia testatur. Erat enim magni ac vasti corporis, ad-

R

eò, vt,



eò, vt, dum ad rem diuinam proficisceretur, solus emeretur. Fuisse qui dicerent eum, cum in publicum prodiret, faciem sibi fucis concinnare. De apparatu Pontificio, non est cur ambigas, maiores ab hoc vno superatos, regno præsertim, siue mitram velis appellare, in quam multas opes contulit, coemptis vndiq; ac magnis precijs, adamantibus, sapphiris, smaragdis, chrysolitis, iaspidibus, vnionibus, & quicquid gemmarum in precio est, quibus ornatus tanquam alter Aaron in publicum forma humana augustiore prodibat. Inspicere ab omnibus volebat & admirari. Hanc ob rem nonnunquam peregrinos in vrbe retinuit, intermissa ostendendi sudarij consuetudine, quò à pluribus eodem tempore cerneretur. Præterea verò ne solus à cæteris differre videretur, publico decreto mandauit proposita pœna, ne quispiam bireta coccinea (ita appellant capitis tegmen) præter Cardinales ferret: quibus etiã primo pontificatus sui anno pannum eiusdem coloris dono dedit, quo equos vel mulas sternerent, dum equitant. Vult præterea in decretum referre, vt galeri Cardinalium ex serico coccineo fierent: sed id quo minus decerneretur, vetuere illi, qui bene sentientes, diminuendam esse Ecclesiæ pompam, non augendam cum detrimento Christianæ religionis, prædicabant. In pecunijs colligendis ita diligens fuit, vt ferè semper Beneficia, & Episcopatus his cõmitteret, qui officium aliquod venale haberent, vnde elici munus posset. Omnia enim officia tempore suo venalia erant, quamobrè factum est, vt qui Episcopatum, aut beneficium vellet, officium aliquod emeret, quo lenocinio, quod vellet, consequeretur, superatis competitoribus omnibus doctrina et probitate vitæ quouis magistratu et honore dignis. Præterea verò cum Episcopatus vacaret, quo plures annata eodem tempore soluerentur, digniores (vt ipse prædicabat) ad vberiores Episcopatus mouens, magnam pecuniarum vim vndiq; colligebat. Redimendarum quoq; pensionum vsum non improba-

probauit. His aut pecunijs interdū etiam ad liberalitatem utebatur. Nā & Cardinales, pauperes maximè, & Episcopos, et principes ac nobiles domo extorres, virgines & viduas: agrotos frequenter iuuabat. Curauit item, vt Rhomæ annona, ceteraq; ad victum pertinentia vilius, quàm antea venderentur. Fecit etiā, vt Matthias Scaliger, rex Hungariæ, et stirpē Georgij Bohemi funditus sustulerit, & nomen hæreticorum fuerit deleturus, nī Poloni id regnū ad se pertinere dicentes Matthiā tenuissent bello laceßitum, quo minus regno Bohemiæ potiretur. Aedificauit etiā Paulus splendidè ac magnificè tum apud S. Marcū, tum verò in Vaticano, quod ad munificentiam pertinet. Venationē quoq; miro apparatu edidit Duci Ferrariensi in campo Merulæ. Adire hominem die dormientē, ac noctu vigilantē, attrectantemq; gemmas, & margaritas difficile erat, nec nisi post multas vigilias: quod si tibi patuissent fores, audire hominē, non audiri ab homine necesse erat. Sæpè quod promiserat, mutata sententia, inuertebat. Amicitias principū ac populorū non diu seruauit, quòd variarum partiū haberetur. Varia cibi genera sibi apponi volebat, & peiora quæq; semper degustabat. Clamabat interdū, nisi quæ expetebat ex sententia ei apposita fuissent. Bibacissimus quidem erat, sed vina parua admodum & diluta bibebat. Peponum esu, cancrorum, pastillorū, piscium, succidiæ admodum delectabatur. Quibus ex rebus creditū est ortam apoplexiam illā, qua è vita solus in cubiculo, nemine vidente, secūda hora noctis, cū eo die letus etiam consistoriū habuisset, sublatus est, pont. sui anno sexto, mense 15. Kal. August. 1471. Nā duos pepones et quidē prægrandes comederat eo die, quo sequēti nocte mortuus est. Iustus tamen est habitus, et clemēs. Plerosq; aut latrones pœna carceris ad sanitatē redigere conatus est: fures, parricidas, perfidos, piuros. Humanitatis aut studia ita oderat, et cōtemnebat, vt eius studiosos



vno nomine hæreticos appellaret. Hanc ob rem Rhomanos ad-  
 hortabatur, ne filios diutius in studijs literarum versari pateren-  
 tur, satis esse si legere & scribere didicissent. Durus interdum, et  
 inexorabilis, si quid ab eo peteres, habebatur: neque hoc conten-  
 tus, conuicia & probra in te conijciebat: plura tamen præstabat  
 quàm vultu præ se ferret. Vno postremò tamen laudari potest,  
 quòd domi monstra non aluerit, quodq; domesticos suos & fami-  
 liares in officio continuerit, ne ob fastum, & insolentiam populo  
 Rhomano, & aulicis stomachū facerent. Ita satis apparet quan-  
 tùm mutatus fuerit à suo prædecessore Pio secundo, & auunculo  
 Eugenio, quorum non nisi fictam quandam imaginem, & splen-  
 dorem externum vitæ præ se tulit. Idcirco inquit Anselmus, ve-  
 rissimè tantùm solidè solidus duplicatorum annorum  
 introibit mortuus petram, id est, putabat ad senectutē vsq;  
 se vitā perducturū: Ceterum falsus opinione, cū iam firmasset  
 pontificatum, et omnia integra pro voto composuisset, duplica-  
 torum annorum petram introiuit, hoc est sex annis ela-  
 psis mortuus sepultusq; est. Solidum namque dicitur quod tres di-  
 mensiones habet: Hic autem dimensio pro anno accipitur. Tria  
 igitur duplicata, efficiunt sex: sexto etenim anno, mense decimo  
 sui pontificatus è viuis excessit, vt dictum est. Imaginis proinde  
 sensus est, Angelum astare Pontifici, coronam capitis illius ad se  
 inclinatam primis digitis tangere, ex quo tactu attonitus, subi-  
 tò manus ad Deum tendens concidit, id est apoplecticus moritur:  
 quod vel apoplexiæ etymon secum adfert: addit hîc quædam  
 ex Rabano Theolosphorus minus apta. Valeat er-  
 go Pseudomagus cum sua chimæri-  
 ca electione.

VATICINIVM XXIX.



ANSELMVS EPISCOPVS.

Bona occasio viuentium, sacra cessabunt.

Accipe Cidarim mundam tibi commissam, & superinduere nouis vestimentis senex sensu, sacerdos Dei magne, ne pigriteris, sed recipias: potentissimè pensa de fine, & ad bonum dirige sceptrigeram, alia quidem non metuens. Tempus enim desuper istud recepisti, so-

R 3 lum



lūm tribus auroris circumdati anni, & vndenario stel-  
larum completam: vni tandem fini sacratum, quod  
admiraris, reliquisti: placidè placasti altercationem,  
sequere vocationem: ad præsentem gloriam benè ve-  
nisti. Dixit autem principijs, Benè comple vniuersam  
culturam, & habitationes cœlestes ambula. Cœlesti e-  
nim inest principium bonorum & finis.

### PAVLVS SCALIGER.

*Hoc vaticinium ad Sixtum quartum, Franciscum à Ruere  
antè dictum, genere Ligurem, vrbe Sauona oriundum, ordinis  
fratrum Minorum ministrum accuratissimum, spectat. Hic vir  
certè non minus arte, quàm ingenio clarus fuit, politioribus lite-  
ris apprimè à teneris annis imbutus, labore incredibili ad diui-  
narum humanarumq; artium apicem conscendit, vt omnes Ita-  
los literis laceffere, & vincere facillè potuerit, quod facillè pro-  
dunt ex eius scrinio chartaceo nonnulla eius opera, nō minùs con-  
cinnè, quàm eleganter scripta: quæ iam in lucem prodierunt: sci-  
licet, De potentia Dei, De sanguine Christi, De conceptione bea-  
tæ Mariæ, & aliorum innumera propè supellex, fortasse pulue-  
rulento situ squalida iacent. Et vt ante pontificatū adeptum, cle-  
mens, pius, & in omnes mansuetus extitit, ita magistratu ponti-  
ficio insignitus, omni virtute cœpit cæteros præcellere: ad vitia  
testudineus: ad virtutis & bonarum artium studia equis velisq;  
ocys anhelabat. In pauperes pius, in religiosos munificus, & ad  
ius cuique reddendum vigilantissimus erat. Principes clade mili-  
tari patria extorres & proprio regno pulsos, præsertim Paleo-  
logorū liberos, ex quibus Magdalenam Thomæ Paleologi filiā,  
ac neptem Constantini vltimi Græcorum Imperatoris, Matthia  
rege*

rege procurante, Bonifacio filio Nicolai Scaligeri, cuius supra mentio facta est in Eugenio quarto, elocauit: & Bosna reginam Stephani Scaligeri regis uxorem, Magdalenam Lazari Despotæ Seruiæ filiam et hæredem (Stephanus enim à Mahomete excommunicatus fuerat anno Domini 1464. & regno exutus) aliosq; complures à Thurco infestatos summa opera iuuare curauit. Urbem Rhomam cœnosam, & strati penè expertem, cariosa vetustate desolatam, nec non debilioribus fulcris nutantem, eiusq; templa, omni ope instaurare satagit, nec non omnia eius compita cultissime strauit, & varijs beneficijs sibi Rhomam adeò astrinxit, vt non iniuria ipsius alter Rhomæ conditor vocandus sit. A quarto sui pontificatus anno Iubileū per totum Christianitatis orbem honorificè celebrauit, vt quàm diu vitia delituerant recondita, statim corde contrito confessa Christi fidelibus abluerentur. Et licet hic multos habuerit detractores (id quod viris sanctis propriū est) optimus tamen Pōtifex fuit. Summa enim alacritate & animarum custos extitit, & cupiditatem à se rescauit, & iras compressit, & malitias extirpauit. Quocirca inquit Anselmus, Accipe cidarim mundam, id est pontificium capitis insigne tuæ fidei cōmissum: & super induere nouis vestimentis senex sensu, id est sapientia & potestate noua atque diuina. Hoc onus sacerdos magne Dei, ne recuses, sed recipias animo prōpto atq; hilari: & in potestate constitutus pensa, id est age de fine, hoc est inter Italiæ principatus, compositis rebus, tam immanem tumultum seda, eiusq; furori finem impone, Et ad bonū dirige sceptrigeram, id est regnum Apuliæ: alia quidem non metuens. Nihil enim Italiæ magis exitio fuit, quàm contentiones et bella, quæ suscepta erant pro regno Apuliæ. Spacium autē huius pensitationis datur Rhomanis pontificibus tempus, quod tribus auroris annuæ reuolutionis, id est tribus Imperatoribus,

Fri



Friderico, Maximiliano & Carolo quinto, atque stellis completis vndecim tantum, id est vndecim Pontificibus duntaxat, constat. videlicet Sixto quarto, qui diem suum obiit 1483. Innocentio octauo, qui mortuus est 1492. Alexandro sexto, sub cuius pontificatu natus est Michael filius Bonifacij Scaligeri pater meus, anno Domini 1498. in festo Margarethæ: decessit autem Alexander 1503. Pio, Pij secundi nepote, qui fatis concessit sui pontif. die 16. Iulio secundo, qui vitam morte commutauit 1513. Huius pontif. anno tertio, hoc est 1506. Albertus Dux Bauariæ, & Rupertus Dux & comes Palatinus, Monachio per literas, in festo Pentecostes exaratas, apud Sigismundum Franciscum Ducem Beneuenti, & principem Vironitica in Croatia, Michaelis Scaligeri tutorē, intercedunt pro Scaligeris in Bauaria existentibus, quò illorum testamentaria ratio habeatur, si Michaelem sine hærede contingat mori: quòd illos Bonifacius Michaelis pater neglexisset, & omnia in Benedictum fratrem & quosdam alios trāstulisset. Leone decimo, qui excessit è viuis 1522. sub quo à Vladislao Hungariæ rege vocatur Michael Scaliger, ad comitia Hungarica Budam &c. vt suo loco videre est, anno 1514. & 1515. Hadriano sexto, qui vitam cum morte permutauit 1524. Clemente septimo, qui è vinculis corporis euolauit 1533. Ad hunc Clementem anno pontif. illius primo, id est 1525. ablegatus fuit à Michaele Scaligero Valentinus Scaliger Dominus Nemesgiangæ: qui etiam Mantua in festo Paschæ Michaeli rescripsit: Itē anno 1527. Ioannes Scaliger Dominus Nemesgiangæ ad nuptias Michaelis Scaligeri quosdam principes inuitatum, ex quorū numero Dux Beneuenti, Mantuæ princeps, Carlouich &c. fuere, missus erat. Paulo tertio, qui mortem obiit 1549. sub quo ego Paulus, Michaelis Scaligeri, ex Catharina Sigismundi Francisci Ducis Beneuenti & principis Vironitica filia, atq; nepte Ferdinandi regis

di regis *Apulie*, filius, anno 1534. in festo trium Regū natus sum:  
 & Ioannes Christophorus Scaliger Bauarus ad Michaelē patrem decimo septimo Ianuarij literas dedit, referens quid apud Cæsarem in caussa illius effecerit: & Laurentius Ripach Secretarius, regis Ferdinandi postea Cæsaris nomine, Catharina, Michaelis Scaligeri consorti viduæ matri meæ anno 1537. in festo Michaelis *Viennæ*, idque in conspectu regio, tanquam interpres retulit, maiestatem suam benignè petitam tutelam mei & sororis meæ *Vrsulæ* suscepisse. Iulio tertio, qui animam Deo reddidit anno 1555. quo anno Ferdinandus rex tandem Cæsar gloriosissimus, prima Martij ex certa scientia & animo benè deliberato, mihi Paulo & patruelibus meis priuilegia Scaligerorum, id est Belæ regis donationem, quo ad omnes illius clausulas & articulos, in publicis Comitijb; *Augustæ Vindelicorū*, confirmauit. Marcello secundo, qui non superuixit pontif. sui diem vigesimum. Porro Paulus quartus, qui animā exhalauit 1559. quis fuerit omnes norunt: & itidem quis Pius quartus, qui fato functus est 1565. nemo ignorat. Hodie Pius quintus felicissimus Ecclesiæ Pontifex viuat ad multos annos, qui verè pius est, & Catholicus. Ceterum sub Carolo quinto tertiæ auroræ Imperatore quantas calamitates *Rhoma* & *Italia* ob regnum *Apuliæ* passa sit, nemo non nouit. Itaque inquit vni fini sacratum quod admiraris reliquisti, id est cū hoc tempus transactum fuerit, tum scias sacratorum, qui apud te in precio sunt, profanationē ad futuram. Neq; falsus est Anselmus. Nam sub imperio Caroli quinti variæ hereses & contentiones subortæ sunt. Hereses autem, quarum princeps Lutherus, omnia sacrata, & sanctorum Martyrum reliquias, & sanctos, & præsules, & vniuersum Clerum, et ceremonias Ecclesiæ, & venerabile atque tremendum sacrificium, & quicquid in Ecclesia sacratum admiramur, euerterunt: quin, ne



*sacراتي quidem sacراتorum ratione habita, in sacratos desceire omiserunt: quod Caraphæ historia, illo ipso tempore, de quo hîc Anselmus agit, manifestè docet: miser è enim Cardinalis existens iussu Pontificis Pij quarti, qui duodecimus consecratus, & decimus tertius electus à Sixto numeratur, exactis illis vndecim, vt superiori vaticinio dictum est, laqueo è medio sublatus, spiritum exhalauit magno Catholicorum scandalo, & hæreticorum iubilo: vnde haud postrema his accessit calumniandi Rhomanam Ecclesiam, ansa & occasio. Poterant autem delicta illius aliter expiari. Adycit Anselmus, Placidè placasti altercationem, id est tumultus Italicos composuisti. Ideo inquit, Sequere vocationem: ad præsentem gloriam benè venisti. Annos enim tredecim & vocationi incubuit, & piè pontificatum gessit, tandem principijs illius, id est auspicijs dixit, Comple omnem culturam, id est fac Pontifex officium & peruadas cœlestes habitationes, scilicet fines terræ verbo Dei instaura. Cœlesti enim inest principium bonorum & finis, Quasi diceret, Qui ita complet, & consummat cursum suum, ille repositam gloriæ coronam, cui & principium & finis omnium bonorum inest, in cœlis cum sanctis & electis Dei, quam omnibus legitime in hac vita decertantibus Deus pater Domini nostri Iesu Christi promisit, certò accipiet. Hic textus apud Theolosphorum de Cusentia ita habetur, lib. De magnis tribulationibus & statu Ecclesiæ, folio vigesimo primo. Tempus etenim desuper istud redemisti, solùm tribus auroris, circundati anni, vndenario stellæ completo, bono fine sacratu. Quid admiraris? Reliquisti placidè vanitatem, planta nunc habitationem, sequere vocantem ad præsentem gloriam. Benè finisti diem in principijs. Bono fine comple vniuersam culturam, & habitationes ambula cœlestes.*

Et.

Etenim in te principium bonorum & finis, id est vt sceptriferam dirigas impetrasti tempus triginta sex mensium, felici omine, & in bonum finem Pontifex inauguratus: non est ergo quod mireris. Agè, iam antea monachum agens, huius seculi vanitatibus valedixisti: in staura nunc templum Rhomanū, & vocationi obtempera, atque sicut principium monachatus benè iecisti, ita in pontificatu exequere officium tuum, & ea, quæ coelestia sunt, spectato. sic fiet, vt ad tuam vocationem omne bonum referatur ex eaque principium & finis bonorum in Ecclesia militanti dependeat. *Idem Theolophorus ibidem fol. vigesimo sexto hoc ipsum vaticinium recitat variatum inquit,* Respice donum ne prigriteris senex sensu: sed recipias potentissimè, pensa de fine: ad bonum dirige sceptrigeram, alia quidem non metues: tempus etenim desuper istud redemisti: solùm tribus auroris circumdantur anni: vno denario stellas comple: benè fini, sacramentum quod amittis admiratione recipis: reliquisti placidè planctam à luctatione. sequere vocantem ad præsentem gloriam. Benè fuisti diem in principijs: bono fine comple vniuersam creaturam (vel culturam) & habitationes ambula coelestes. In te enim principium bonorum & finis. *Hac varietas arguit Theolophori hallucinationem. Itaque iuxta symbolicam scientiam textus à nobis recitatus, cuius olim copiam ab optimo Cesare Ferdinando, ex peruetusto manu scripto exemplari habuimus, veritati per omnia optimè conuenit. Iam vtrunque patet, quid Anselmus innuere voluerit per bonam occasionem viuientium, quidue per sacrorum cessationem. Bonam occasionem, viuentes habent, id est magnam*



commoditatem ad vitam æternam, si cœlestia sectentur: magnā item occasionem ad mortem, si terrestria amplectuntur, & despiciant cœlestia, vnde profanatio & cessatio sacrorum nascitur. Neque enim hodie propter alias causas sacra profanantur, id est Clerus, Ecclesiastica ceremonia, sacramēta, et maximè tremendum illud sacrificium, quàm propter facultates istas terrenas. Omnes malunt delicatè ex bonis Ecclesiæ, scilicet eleemosynis pauperum, & peccatis populorum viuere, terrestria occupare, quàm ad vitam Angelicam, et cœlestem patriam anhelare. Pauci sanè hodie Ecclesiastici inuenirentur, si patrimonium Petri nō faceret, Quod cū opulentum sit, bonam occasionem ex illis viuendi habent ij, qui illo potiuntur. Et propter hanc ipsam occasionem fit, vt principes huius seculi affectent Episcopatus & principatus Ecclesiæ, & sacrorum immemores, sacra negligant, ne dicam spernant. Quotus quisque est hodie, etiam ex Catholicis, qui syncerè & ex animo aut faciat, aut audiat sacra? omnes Ecclesiastici ferè, malunt hodie militiam, aut mercaturam, & id genus alia incitamenta malorum sequi, quàm Ecclesiam. Piget vnā horulam pietati incumbere, & officio diuino insumere: nō piget continuos menses, me dicam annos, dies noctesq; poculis, aleis, scortis, canibus, venationibus, et similibus rebus magna cum alacritate & hilaritate transigere. Hæc res facit, vt delicatè viuentes sacra non tam negligamus, quàm etiam ab illis abhorreamus. Quo fit, vt non modò hæresibus, sed multò magis nostræ ignauia, secordia, & impietati adscribamus, quòd sacra hodie cessarint. Propterea etiam aufert Deus bonos Pontifices ex oculis nostris: peccata enim nostra merentur, vt non bonum, sed hypocritam habeamus Pontificem, regem, magistratum. Quia cū cognouissemus Deum, non sicut Deum glorificauimus, aut gratias egimus, sed euauimus in nostro luxu, crapula, & prauitate,

te, abutentes donis diuinis ad nostram libidinem. Idcirco obscuratum est insipiens cor nostrum, vt indigni simus vlllo pio & iusto magistratu. Quod si aliquando nobis Deus optimos magistratus donat: id certè non nostris meritis, sed sua infinita misericordia, qua ouibus palantibus, & erroribus turbulentis implicitis vltro succurrit. Iam ergo sensus imaginis hic est, quòd propter negligentiam, & contemptum sacrorum, atq; ingluuiem nostram, moresque perditos, & deprauatam atque impiam vitam Angelì, iussu summi Dei, bonum Pontificem & magistratum, cidari antea ornatum, tandem verò expansa & explicita, ex perditorum hominum cœtu in cœlestem patriam, subuehant. Valeat igitur Pseudomagus impostor cum sua noua missa.

S 3 VATL





PAVLI SCAL. EXPLANATIO IMAGINVM  
VATICINIVM VLTIMVM.



ANSELMVS EPISCOPVS.

Bona vita.

Inuenisti vitam ab ingloriatione , à virtute accepisti  
plus quàm à fortuna : sed nequaquàm virtuosam lucra-  
beris gratiam. Inuidia enim contingens iudicia tibi no-  
centia inducet, vt priueris à sole desuper (*Refert Theo-*  
*lopho-*

*loosphorus*, Inuidi enim contingētes iudicia tibi recentia, non priuaberis à sorte desuper. *Verūm Caesaris exemplar censeo imitandum*) Væ ciuitas sanguinum, vniuersa mendacij, dilaceratione plena, non recedat à te rapina, vox flagelli, vox impetus, rotæ, & equi frementis.

Reuerentia & deuotio augmētabuntur. cor eius ab habitatione commutabitur. cor feræ datur ei, & septem tempora mutabuntur, super eum.

## PAVLVS SCALIGER.

*Depingitur hoc vaticinio Innocentius octauus, Ioannes Baptista antea dictus, patria Genuensis, ex mediocri genere, honorato tamen, patre Aaron viro sanè probo ortus, cū virtutis atq; disciplinarum omnium specimen foret, Cardinaliū auspicijs, Sixto è medio sublato, summus Pontifex creatus anno Christi 1484. Idib. Augusti. Propterea ait Anselmus, Inuenisti ab ingloriatione, id est ex non glorioso stemmate, sed virtute magis quā fortuna, ad fastigium pontificatus conscendisti. Affabilis enim erat, mansuetus, eloquio facundus & comis: quem maturus incessus, morum non morosa grauitas, nec non gemina indoles exornabant. Perspicacis ingenij fuit, vt altiora rimanti faciliter innotescerent. nec defuit illi verborum lepos, non iniucundus, multis salibus cultus cū tempestiuum erat. Pacem Christianis principibus commendans, eos, abiectis mutuis odijs, fœdus percutere hortabatur, ne Thurcorum insidias molientum viribus Christianitas detrimentum subiret. Non iniuria igitur Innocentius dictus est, cū vitæ innocentia, mansueta indole clariùs,*

*non*



non iracundus, inexorabilis, aut morosus, inter cæteros veluti sy-  
 dus emicuerit. Et cùm consideratius consilio maturo animad-  
 uerteret pro Ecclesie dignitate, & subditorum tutela, ea armis  
 quærenda esse, quæ raptu, aut temerarijs aliorum Pontificũ do-  
 nis ablata fuerant, dicebat arma sumenda non propter victoriã  
 aut gloriam, sed vt pax inde sequatur. Singulos principum Chri-  
 stianorum oratores, cùm in sui Pontificatus principio eum de mo-  
 re salutatũ venirent, ad pacem admonebat, suadens armis tem-  
 pla profanari, funditus demoliri, Dei cultum intermitteri, puellas  
 incestari, fruges & bonorum quodcunque genus populari: quod  
 testatur Lucanus dicens:

Nulla fides pietasq; viris, qui castra sequuntur.

Quàm plurima Italiae templa crebris donis cumulatisima reddi-  
 dit. Summa, hic Pontifex fuit morum probitate, vitæ sanctimo-  
 nia, atque omni disciplinarum genere ornatus, tam proceribus,  
 quàm plebeis dilectissimus, quorum omnium non paruo mœrore  
 vitam exhalauit anno sui pontif. octauo, die 26. Iulij, 1492. Cæ-  
 terùm nequaquam, sicut virtus illius merebatur, reportauit gra-  
 tiam. Vrsini enim & Columnenses Rhomani proceres eius pios  
 hortatus aspernati, intestinis bellis urbem infestantes, se inui-  
 cem lacerabant, & incredibili damno, inuito Pontifice, urbem  
 affecerunt. Idcirco inuidia gloriam consecuta, iudiciaque  
 nocentia super se inducta sentiens, tum quia valetudinarius e-  
 rat, tum propter crebros bellorum & pestis insultus, quibus to-  
 ta Italia laborabat, complura, quæ sanctius consultiusque animo  
 conceperat, reliquit, atque fatis concedens vita excessit. Hoc er-  
 go illud est, quod Anselmus inquit, vt priueris à sole desuper.  
 Supremus enim Sol est Deus, qui nos bonis magistratibus priuat,  
 cùm à nobis pro nihilo ducuntur. Cæterùm quid tandem huius o-  
 ptimi Pontificis mortem consequitur? sanè non aliud, quàm quod  
 Ansel.

*Anselmus prædixit, Væ Ciuitas sanguinum, vniuersa mē-  
dacij, dilaceratione plena: Vrsinos & Columnenses tum san-  
guinolentos, se inuicem dilacerantes, expressè innuens: atq; id ge-  
nus alios. Quid sequitur? Non recedat, inquit Anselmus, à te ra-  
pina, vox flagelli, & vox impetus, rotæ & equi fremen-  
tis, id quod Rhoma, mortuo Innocētio sub Alexandro sexto per-  
sensit. Rhomam enim Carolus Francorum rex octauus subegit,  
& Valentinum Borgiam pontificis propinquum, cum quibusdam  
castellis obsidem à Pōtifice accepit. Breui tota Italia subacta, Eu-  
ropam Asiamq; tāto terrore oppleuit, vt, audita eius fama formi-  
dabili, Thurcus de bello cogitare cœperit. Nihil dicam de Iulij se-  
cundi intestinis bellis, multi sudoris & sanguinis: profectò Caro-  
lus Borbonius, vt antea dictū est, acerbissimè in Rhomā inuasit,  
& crudelissimè in ea capta sæuitū est, capto etiā Clemente ponti-  
fice, ipsaq; Rhoma populata, direpta, & propemodum solo aqua-  
ta fuit, atq; sedes Rhomana grauissimam cladē accepit. sed tandē  
cū omnia gesta Cæsare nesciente fuissent, reuerētia & deuo-  
tio Rhomæ restituta est. Non multò post enim Cæsar pontificē  
priori dignitati restituit, & facta barbarum omnium obliuione,  
in amicitiam recepit. Cæterū vt imago fidem inueniat, Caroli  
Francorum regis cor ab habitatione, id est obediētia Rhoma-  
næ Ecclesiæ cōmutatum fuit, eiq; cor feræ, id est crudele & as-  
tutū, quod bestia crudeli, & cauda vulpina testatur, datū, quo tā  
formidabilis omnibus est effectus. Huic coactus est pontifex co-  
ronam pontificiam, id est obsides dare. Hac sæuitia per se-  
ptē tempora durauit, sicut Nabuchodonosoris cū beluis pastus  
Dan. 4. Aut si ad pontificē referatur tunc symbolicus sensus erit.  
Cor pontificis est Germania, veluti cui pōtifex imperij Rhomani  
sceptrū adimēs Græcis, dedit. Posteaq; enim Cōstantinus Magn⁹,  
relicta Rhoma ad Orientē desedit, et sublatū Imperiū 330. annis*

T post



post Augustulum in Oriente cessauit, Leo Papa tertius, Carolum Magnum contra quorundam tyrannidem euocauit Rhomam, ibique Imperatorem etiam populi Rhomani precibus declarauit, & diademate Imperatorum peruetusto, Anno Christi 801. inauguratum consecrauit, tandem defunctis Carolinis, Otto primus Germanorum imperator à Ioanne XII. pont. anno Christi 962. creatus. Itaq; imperio ad Ottones deuoluto, in Germaniam translatum est: vbi huc vsq; cōseruatur, quod vt apud Germanos solidius, & firmitus subsisteret, supra quatuor columnas fundatum est, vt omnes dignitates quaternionibus cōstarent, exceptis Electorib. Ecclesiasticis, qui triade consistunt. Electores proinde septem cōstituti Imperatorem delectum, vltimò in perpetuam memoriam potestatis Pontificiæ, & donationis, Pontifici Rhomano inaugurandum & consecrandum relinquūt, vt qui ab eo in auguratus nō sit, non nisi electus Imperator dici possit. Hæc ideo addere volui, vt omnes principes Imperij reluctantes Pontificiæ potestati, intelligant, se crimine læsæ Maiestatis teneri, & ab ingratitude non multum distare, cū illum spernunt, à quo omnia habēt. Igitur Cor Pontificis, id est Germania ab habitatione commutabitur, id est auertetur ab Ecclesia Rhomana: cor feræ dabitur ei, id est Germania fera, agrestis, ingrata, indomita, scilicet hæresibus infecta, schismaticis factionibus & tumultibus agitabitur, donec septem tempora mutantur super eam, id est septem reges vel Cæsares: Hæc enim ad inuicem Geometrica proportionem intelligenda veniunt. Quocirca imago bestię Germanicam denotat hæresim, quæ pontificiam potestatem sibi arrogat. Id quod & Ioachim super Esa. part. 1. De onerib. sexti. temp. expressit, inquiens, Futurum est, vt Ecclesiam Rhomanā in partibus occiduis constitutam, Theutonicorum potentia conculcet. Nam sicut peccati radix Antiochus

finem

finem Iudaicis dedit historijs: sic imperio perditionis  
filius, prælijs Germanorum. Nullus enim populorum  
legitur ad tantam amaritudinem perduxisse Rhoma-  
nam Ecclesiam sicut domesticus Alemannus: ab Aquilone  
Germaniæ illa pandetur hæresis & afflictio, quæ  
non solum inuoluet reprobos, sed & electos afficiet,  
temporibus præfinitis. Huius Aquilonis mater est Saxonia:  
filix verò Magdeburgum, Brádenburgum, Mis-  
nia, Mechelburgum, Islebium &c. leuantes contra do-  
minum spiritum pestilentem. *Hæc ille. Quid obsecro clari-  
us dici poterat de Luthero? patria illius Saxonia, & locus nati-  
uitatis Islebium, quod est Mansfeldiorum ditionis oppidū nomi-  
natim exprimitur. Hunc ait tantum fore hæreticum, ut non so-  
lùm reprobos, sed etiam electos sua hæresi sit implicaturus, idque  
vsq; ad tempus diuinitus præfinitum, & permissum. Hæc prophe-  
tia noua non est, sed anno Domini 1178. Ioachimo tradita, & po-  
stremò, quod sciam, typis, Lazari Soardi Venetys anno Domini  
1516. excusa, cuius exemplar penes nos est: cùm tamen Lutherus  
cœperit insanire anno Domini 1517. De hoc Luthero Ioannes  
Liechtenbergius, anno Domini 1488. Calend. Aprilis hæc prædi-  
xit, quæ sequuntur. Monachus, inquit, in cuculla, & diabo-  
lus in scapulis eius retro, habens loripium longum ad  
terram, cum amplis etiam brachijs habens discipulum  
secum stantem. Hic propheta erit dijs & dæmonibus  
terribilis, signa multa, & prodigia faciet, eius quoque  
aduentum prauis dæmonum spiritus fugient, præclarū  
habebit ingenium, multarumq; rerum scientiam & sa-  
pientiam in hypocrisi, tamen mendacium sæpius lo-  
quetur, & cauterizatam habebit conscientiam. Erit  
quoque multi sanguinis effusionis causa. Quanquam*



ita signa multa & prodigia dederit, iuxta tamen salutiferam Christi doctrinam minimè ei adhærendum erit: imò de illis esse videbitur, quos Christus futuros annunciauit, quemadmodum sacris literis à saluatore nostro proditum reperitur. Matth. 24. Si quis vobis dixerit, Ecce hic est Christus, aut illic, nolite credere. Surgent enim Pseudochristi, & Pseudoprophetae, & dabunt signa magna & prodigia, ita vt in errorē ducantur, si fieri possit, etiam electi. Ecce prædixi vobis. Si igitur dixerint vobis, Ecce in deserto est, nolite exire. Ecce in penetralibus est, nolite credere, &c.

*Hæc ille. Imago, vt illam Liechtenbergius depinxit, talis est.*

*Recte*





Rectè hic Lutherus depingitur. Fuit enim Monachus sub  
 instituto Eremitarum beati Augustini. Tot signa edidit ut e-  
 tiam electis imposuerit. Fuisse autem illum causam multi  
 sanguinis effusionis, nemo est, qui nesciat, & hodie passim nō  
 videat. Porro mendacia splendidissima sepe illū protulisse,  
 scripta illius testatur. Discipulum habuit Melāchthonem,  
 & suum logodædalum. Optimè igitur Ioachim loco citato prædi-  
 xit. Alemanni, inquit, insidiabuntur Ecclesie cum suo filio perdi-  
 tionis: & cum Francis conspirabunt aduersus apostatricem Eccle-



siam in pontificibus bellicosus. Idcirco in spiritu Amon & Moabitarum, Angli & Franci verè fallaces & duplices in angustia temporis secuturi, non solum in reges suos descendent, sed & præfules de terra proscribent. Hæc ille. Nihil poterat clarius de nostris turbulentis istis temporibus & calamitosus dixisse. Filium perditionis Lutherum intelligit, cum quo, id est cuius doctrina freti Alemanni insidiatur Ecclesiæ. Nec sufficiebat id illos tantum moliri, nisi & Anglos & Francos in illam concitassent. Quod autem apostatricæ Ecclesiæ Rhomanam appellat, non est quod id nobis Pseudomagus obijciat: nō enim hic fidei quicquam derogat, sed luxui & malis illius operibus. imò eodem loco, hæc sunt Ioachimii verba. Quoniam, inquit, Rhomana Ecclesia non sicut Iudæa, & Græcia in fide refriguit: etsi ab operibus iustitiæ deniauit: quia tamē aliarum respectu sedium, in atrium exterius, quod est foris templum gentibus datum tributarium, Solis æterni ciuitas reputatur: semen in ea Dominus benedictionis & gratiæ dereliquit: per quod vsq; in finem seculi, filij pro patribus surgerēt, indisciſsam fidei tunicam, inter mūdāna disſidia conseruarent: unde sequitur, Nisi Dominus exercituum reliquisset nobis semen, quasi Sodoma fuisset, & quasi Gomorra similes essemus. Sed non auferetur sceptrum de Iuda, nec dux de fœmore. Genes. 49. Deinde inquit Dominus Matth. 16. Tu es Petrus, & super hanc petram ædificabo Ecclesiam meam: ipsa est firmamentum in medio aquarum Gen. 1. Portæ inferi non præualebunt aduersus eam. Venerunt flumina & flauerunt venti & impetierunt domum illam, nec corruit: fundata enim est super petram. Matt. 7. Idcirco spiritus Domini, illud septiforme candelabrum reprobauit, scriptura dicente, Repulit tabernaculum Silo: & iterum, Tribus Ephrem non elegit, sed tribum Iuda, montem Sion, quem dilexit. Ex quibus colligitur, quòd Orientali Ecclesiæ reprobata pro meritis, Rhoma

Rhomanam Ecclesiam ubiq; diffusam Dominus reseruauit in tēplum. Itaq; etsi ad subuertendam humilium pietatem, furor istiusmodi Chaldaeorum ferocium in odium Petri sedis exeritur: tamen diebus Aquilæ discurrentibus, vnde quaq; fulminibus reprimetur, vt tam in Citenſibus, quàm Saltzburgensis ex Iuda omnis armatura depereat, vel persequendi materia reticescat. Quocirca Rhomana Ecclesia mysticè præfecta est cunctis Ecclesijs, sicut tribus Iuda cæteris tribubus Israelis. Ipsa enim est de qua Zacharias scribit, Ponam Ierusalem in lapidē oneris: licet à pressura seculi expers esse non poterit. Hac ille. Plura in effigie duplicis Ecclesiæ, eiusdemq; duplici facie. Vnde abundè satis constat, quid de potestate & principatu Rhomanæ Ecclesiæ, atq; perpetuitate, & puritate fidei illius Ioachim sentiat: quamuis à iustitiæ operibus defleat aliquando: quia militans est, non triumphans, quæ & cadit & resurgit, & bonos illa & malos continet. Neq; verò quisquam in Ecclesia, Apostolorum pietati cōferendus est: tamen Apostolos docuit dominus ipse orare, vt dimittātur illis debita: Si ergo Apostoli peccatores fuerunt: sicut & Ioannes inquit, Qui dicit se absq; peccato esse mendax est, & veritas in eo nulla: quid igitur Pseudomagus, neglectis suis peccatis, tātoperè aliena perstringit? Ejciat prius trabem ex oculo suo, tandem ad festucam proximi se conuertat: sed valeat turpissimus pseudomagus cū suis nugis. Et hic enim bestiam formidabilem in agnum commutauit: cui tamen nec vaticinium respondet, nec vetustissimum exemplar. Ita patet iuxta veritatem historicam, & Symbolicam scientiam, quam primo tomo Miscellaneorum tradidimus, hæc vaticinia omnia iam transacta esse, nihilq; horum imminere, & Pseudomagum turpissimè errasse, & multis pijs imposuisse, atque omnia illa ab eo non in alium finem excogitata & conficta esse, quā ad concitandos aduersus Clerum vulgi animos, & factiones atq; sedi



seditiones constituendas : quod auertat is, qui est pacis omni-  
umque rerum autor & Dominus, Amen. Postremò diligen-  
ter obseruanda sunt paradoxa vaticiniorum. Quotiescunque  
enim in aliquem magistratum incidit aliquod illorum, non  
dubites quin illud idem vaticinium, illi  
paradoxo conueniens,  
eueniat.

FINIS

